

WANTOK

NIUSPEPA BILONG YUMI OL PAPUA NIUGINI STRETI - 27 YIA NAU

32 pes Namba 1,198 Wik i stat long Fonde, Jun 12, 1997 50 toea

Ombudsmen bai sekim gen Sandline Kontrak

OMBUDSMEN Komisn, i wok long mekim nupela wok painimaut gen i go insait long Sandline Kontrak long lukluk gut na skelim ol wok bilong ol lida husat i stap insait long Sandline toktok.

RAPHAEL SEMEL
i raitim

Bos bilong Ombudsmen Komisn, Simon Pentanu i tok aste olsem dispela kain wok painimaut long hevi ol lida i save mekim i kam aninit long Ombudsmen

Komisn bodi. Em i no laik mekim wanpela toktok long Komisn bilong Enkwari Ripot bikos ol tu i mekim narapela ripot bilong ol yet.

Mista Pentanu i tok seksen 218 bilong mama lo long kantri i givim pawa na strong long Ombudsmen long was gut long ol lida bilong gavman.

Ol i save was long ol lida bilong nesenel na provinsal gavman na ol bos bilong ol gavman dipatman. Ino ol lida tasol, Ombudsmen i save lukluk tu long ol kampani na kontrak i no save mekim gut wok na brukim lo. Em tu i save lukluk gut long ol no gut, we bai bagarapim ol wok bilong kantri. Na tu ol i save harim komple na wari bilong ol pipel na mekim wok painim long ol dispela trabel o wari.

Olsem na Ombudsmen i laik mekim wok painimaut long Sandline na ol lida husat i stap insait long dispela kontrak. Olsem na em bai mekim narapela ripot gen long givim long palamen. Dispela ripot bilong Ombudsmen bai i wankain o i no inap wankain olsem ripot bilong Komisn bilong Enkwari Andrew Warwick wantaim ol wokman bilong en i mekim. Dispela tu bai i givim gutpela taim long palaman long skelim gut tupela ripot pastaim na ol i ken patim toktok long en.

Andrew Warwick wok painimaut bilong en long mekim ripot i kisim 6-pela wik olgeta na long namba Me 29 dispela ripot i go long Ekting Praim Minista John Giheno. Ripot bilong Andrew Warwick i traim long painimaut ol asua long Sandline kontrak.

Kausel loya bilong Brigadia Jenerel Jerry Singirok; Peter Donigi i raitim wanpela leta i go long Ekting Praim Minista John Giheno long namba Jun 1.

Insait long dispela leta Mista Donigi i tokim Mista Giheno olsem ol i brukim sekyuriti lo long givim ripot bilong Komisn i go long han bilong ol man i no

gat pawa long kisim dispela ripot na autim long pablik. Em i tok dispela ripot i mas go stret long han bilong Mista Giheno long lukluk long en pastaim long pablik i ken save bihain.

Mista Donigi tu i tokaut insait long dispela pas olsem Komisn bilong Enkwari i no lukluk gut long Sir Julius Chan na Nicos Violaris na skelim namel na wok bilong tupela. Em i tok Sir Julius i makim tem bilong dispela Enkwari i mas kamap bihainim. Olsem na wok painimaut i no go insait tumas long em yet (Chan) na ol poroman bilong em olsem Nicos Violaris.

Olsem na ol poroman bilong Sir Julius i stap yet long kantri na mekim kainkain wok bilong ol na i no wari long lo. Mista Donigi i tok mama lo bilong kantri i no givim pawa long Praim Minista long stap antap long lo. Praim Minista i bosim gavman na sapos ol namba tu bos o minista bilong en i mekim rong em i mas kisim hevi tu.

Mista Donigi i askim Minista John Giheno insait long leta long mekim tem bilong referens long dispela Enkwari i go bikpela na karamapim olgeta samting kamap long Sandline kontrak. Em i askim tu, Mista Giheno long mekim wok painimaut long Nicos Violaris na Sir Kenneth Tresize na sasim tupela long wanem tupela i kisim Komisn Ripot pastaim long em.


Em i tok sapos ol bikman olsem Mista Giheno i no mekim wanpela samting long ol dispela kain man insait long gavman ol bai go het long mekim rabis pasin long kontrolim na ranim eksekutiv han bilong gavman.

Mista Donigi i tok olgeta pablik bai sapat na sanap strong bihain long yu (Mista Giheno) sapos yu sanap long rait bilong gavman na ol pipel. Sir Julius wantaim ol poroman bilong en ino mekim gutpela pasin long Mista Singirok na ol pablik bikos ol kisim ripot bilong Komisn pastaim. Ol i no larim yu husat i lukautim gavman long ritim pastaim na givim long pablik. Olgeta man na meri i lusim rispek long sir Julius taim em i mekim dispela pasin. Olsem na mi askim wok painimaut i go insait long wanem rot na Komisn Ripot i kamaut na husat ol i holim kopi bilong ol dispela ripot. Ol plis fos tu i mas sasim ol man o meri i no gat pawa long holim dispela ol ripot.



Han bilong man o yam ... Bikman bilong Isten Hailans i holim ol yam em i kamautim long gaden. I no liklik yam. Ol i makim piksa bilong ol finga.

INSAIT	Mista Giheno pasa pes 3	Pasam Nesenel Hai Skul hevi
		- pes 2



MUTRUS

MAJOR SPONSA BILONG RAGBI LEAGUE INSAIT LONG PAPUA NIUGINI

GOVERNMENT WARNING: SMOKING IS DANGEROUS TO HEALTH

PLIS RIPOT

NCD:
Stilpasin we ol raskol i wokim bihain long ol i hensapim ol man na ol stua i wok long go bikpela gen long Nesenel Kapitel Distrik.

Long las wiken tasol i bin gat 12-pela bikela stilpasin i kamap we ol plis i kisim ripot long en.

Bos bilong ol plis long Nesenel Kapitel Distrik Sam Inguba i wari long dispela kain pasin i go antap long siti na moa yet, plis i holim tasol tupela man long ol. Bihainim dispela, Mista Inguba i singaut i go long pablik long ripotim husat lain ol i lukim wantaim ol gan na ol arapela samting moa olsem we ol raskol i yusim bilong pretim ol man na wokim ol stilpasin.

Plis i wok long painim wanpela meri we sampela raskol grup i banisim na kisim em long Erima setelmen long las Sande. Ripot i tok ol raskol i bin kisim em i go long wanpela ka. Nau yet plis i wok long askim ol manmeri long tok-save i go long ol, sapos ol i save wanem hap gel i stap long en.

Wanpela man i dai pinis na sampela arapela i bin kisim bagarap long wanpela birua itaim ka we ol i ron long en i kapsait long rot.

Mista Inguba i tok dispela birua i bin kamap klostu long ples Gaire. Wanpela man i bin dai na em i wanpela skul tisa. Em wantaim ol arapela wanwok bilong em i bin ron long skul trak taim draiva i bungim sampela hevi long kontrolim ka na birua i kamap. Ol i wok long ron i go olsem long Kwikila Hai skul taim draiva i lusim kontrol long stia na ka i kapsait.

Plis i no tokaut yet long nem bilong tisa husat i dai long dispela birua.

Kantri:
Gavman i skruim kefiu o taim tambu tude i go long Ogas 11 taim ol wok long nesenel ileksen i pinis.

Long wankain taim tu, ol i putim tambu long ol man i baim strongpela dring na karim i go long haus.

Kefiu o taim tambu insait long NCD na ol arapela hap long kantri i bin stat yet long las yia Novemba taim ol trabel long siti i go bikpela.

Tambu long strongpela dring bai i pinis long Julai 14.

Plis Komisina Bob Nenta i tok dispela em i hap long lukautim ol wok bilong nesenel ileksen i go gut.

Mista Nenta i tok olgeta stoa we i salim ol strongpela dring i tambu long salim ol insait long wanpela mun.

Em i tok tu olsem moa long 7,000 plis bai i stap insait long wok bilong lukautim ileksen long kantri.

Hailens:
Plis long hailens rijon long wanpela operesen bilong ol i painim 10-pela ka we i no orait long ron long ro na ol i sasim ol man na kisim K440 long ol asua long ka.

Provinsal plis komanda long Westen Hailens Titus Pamben i tok long hap bilong Baiyer Riva, plis i bin holim pasim tupela man long rausim bris antap long Gum Wara.

Pasam Nesenel Hai Skul bai stat gen

...Bod rausim olupela hetmasta

"PASAM Nesenel Hai Skul (PNHS) i no pas," Siaman bilong Gavening Kaunsel bilong PNHS, Valentine Kambori i tok. "Mi mas tok klia long planti pipel husat i kisim krangki tingting olsem PNHS i pas olsem, dispela em i no tru."

WENCESLAUS MAGUN i raitim

Mista Kambori i tok PNHS Gavening Kaunsel (PNHSGC) i stapim wok bilong PNHS long stretim ol hevi i bin kamap namel long ol Sepik na Hailans sumatin long las mun na bilong makim nupela menesmen. "Mipela i rausim ol olupela wokman bilong menesmen na makim ol nupela bilong mekim gutpela wok. Long sem taim mipela i traim long stretim gen ol domitori, klasrum, na mes bilong ol sumatin," em i tok.

Samting olsem tripela wik i go pinis, moa long 500 sumatin bilong PNHS i no moa go long klas bikos, PNHSGC i pasim olgeta skulwok bihain long wanpela bikpela pait i kamap namel long ol sumatin bilong Hailan na Sepik. Tasol, PNHSGC i bilip olsem ol bai singautim ol sumatin long kam bek na skruim stadi bilong ol long tupela wik bihain long dispela mun. Mista Kambori i tok PNHS em i no bilong ol menesmen na ol bikman. "PNHS em i bilong ol sumatin na ol i gat olgeta rait long kam bek na pinisim gret 11 na 12 skul bilong ol. Long dispela as, mipela i no inap larim dispela hevi i bagarapim save na skul laip bilong ol," Mista Kambori i tok strong. Pait i bin kamap bikos wanpela Hailans sumatin i sutim tok olsem ol Sepik manki i brukim kabot bilong em na stilim ol samting bilong em. Taim

em i toksave long wanpela diuti tisa, dispela diuti tisa i tokim ol Hailans sumatin long go na sekim olgeta kabot bilong ol Sepik sumatin na painim ol samting i lus. Bihain long ol Hailans sumatin i mekim dispela, ol Sepik sumatin i kros na pait i bruk. Mista Kambori i tok kain pasin olsem i no inap kamap sapos diuti tisa i no bin askim ol Hailans sumatin long go sekim kabot bilong ol Sepik sumatin. "Mipela long PNHSGC i no amamas tru long pasin bilong dispela diuti tisa. Namba wan samting em i mas mekim, em long go em yet na sekim sapos toktok bilong dispela Hailans sumatin i tru o nogat," Mista Kambori i tok. Em i tok, bikos long dispela liklik hevi, dispela bikpela hevi i kamap. Mista Kambori i tok planti bikpela hevi i save kamap bikos long ol paul tingting.

Em i bilip olsem kain ol hevi i bin kamap bikos menesmen i slek. "Na long stretim dispela hevi, yumi mas rausim ol slek lain na makim ol gutpela lain," em i strongim tok bilong en.

Nau yet PNHSGC i rausim pawa bilong Het Masta Arnold Lakamanga. Ol i raitim tu wanpela rekomendesen ripot i go long Edukesen Dipatmen long wok tisa long Pasam. Long kisim ples bilong Mista Lakamanga, PNHSGC i makim Mary Toliman olsem Ekting Het Mistres.

PNHGC i makim tu Namba Wan Asisten Seketeri bilong Edukesen, Ouka Laveki long go pas long "Crisis Committee" bilong glasim olgeta hevi i bin kamap long PNHS na traim stretim ol dispela hevi.

Ol sumatin husat i no bin go long ples, i bin stap bek long skul na helpim ol wokman bilong skul long stretim skul.

OI BRA na BIG kibung wantaim Momis

BOGENVIL rijenol memba na biknem ida bilong provins na kantri John Momis i stap nau long Panguna.


VERONICA HATUTASI i raitim

Em i stap gut long han bilong ol Bogenvil Revoluseneri Ami (BRA).

Ripot i kam long Bogenvil i tok olsem Mista i stap nau long Panguna bihain long ol BRA i bin kisim em i go long Sentrel Bogenvil long las wik Fonde.

Ol BRA i bin kisim Mista Momis na kemen manesa bilong Melanesen Alaens Pati Jame Bili long Tinputs Katolik Misin stesen bihain long lotu las Sande Jun 1. Ol BRA i lusim pinis Mista Bili i go long Buka na nau em i stap wantaim ol famili bilong em. Em i tok ol BRA i no bagarapim ol tasol ol i lukautim ol gut. Tasol ol i bin brukim tupela na kisim Momis i go long Sentrel Bogenvil na em yet (Bili) i go bek long ples bilong em long Buka.

Bogenvil Primia Gerard Sinato i tok long no ken wari bikos Mista Momis i stap gut wantaim ol BRA na Bogenvil



Mista Momis husat i stap kalabus yet long han bilong ol BRA.

Interim Gavman (BIG) lain.

Mista Sinato i tok long ol ripot we ol i kisim long Sentrel Bogenvil, Mista Momis i wok long holim ol miting wantaim ol lida bilong BRA/BIG long Panguna.

Ol memba bilong Not Nasioi Pis Komiti i toksave tu olsem Momis i stap nau long Panguna na ol BRA bai i lusim em bihain long ol i pinisim ol miting wan-

taim em. Na ol bai lusim em long han bilong pis komiti long sampela taim dispela wik.

Ol BRA i tok strong olsem ol i lukautim gut Momis i stap na famili bilong em, ol pipel bilong Bogenvil na PNG i noken wari, Primia Sinato i tok.

Mista Sinato i tok olgeta samting long ailan i stap gut tasol na opis bilong em wantaim ol sekuriti fos na ol siefs, ol meri na sios grup i wok gut wantaim long lukim olsem sindaun long ailan i stap orait tasol.

Em i tok ol siefs, meri na sios grup bilong Buka na Notwes distrik husat i laik wok long kisim bek Momis long han bilong ol BRA i stapim dispela wok nau bikos Mista Momis i stap gut.

Long sampela toktok we Wantok Niuspepa i kisim, miting we ol BRA/BIG lida i holim wantaim Mista Momis i sut long ol askim bilong ol we ol i laik Bogenvil i mas bruk lusim PNG na kisim independens na tu long gavman i kisim bek ol sekuriti fos long Bogenvil. Na ol i laikim gutpela tekim i kam long nesenel gavman long ol dispela askim bilong ol.

Wewak taiswara projek i op

DIPATMEN bilong Nesenel Plening i mekim bikpela tok promislong pipel bilong ls Sepik long givim helpim mani long bikpela projek bilong rausim ol taiswara na mangro long Wewak taun.

Namba tu dairekta bilong Nesenel Plening Opis, Camilus Midire i makim maus bilong Nesenel Plening Minista Moi Avei na givim dispela tok promis i go long gavman na pipel bilong ls Sepik. Mista Midire i mekim tok promis bilong Nesenel Plening bai givim fainensel helpim long las wik Tunde, June 3 long wanpela seremoni insait long Wewak taun. Seremoni ya i bin kamap long brukim graun na opim dispela bikpela projek bilong rausim ol taiswara na mangro insait long Wewak taun.

Dispela bikpela projek em gavman bilong Ripablik bilong Korea na Papua Niugini i putim kamap mani long karimaut.

Mista Midire i tok bihain long projek ya i stat na go het, Nesenel Plening dipatmen bai givim fainensel helpim long olgeta yia inap dispela projek i pinis. Mista Midire i tok i tru olsem dispela projek i kisim longpela taim tru long stat. Tasol em i tokaut olsem dipatmen bilong em i gat bikpela amamas long olgeta lain i wok hat na wok-bung long mekim dispela projek i go het.

Namba tu dairekta bilong Nesenel Plening i tok projek ya bai givim planti gutpela na bikpela helpim i go long ol pipel bilong ls Sepik.

Trabel bilong Aitape haiwe inap kamapim hevi long ileksen

FELIX RAMRAM i raitim

OL TRABEL i kamap long ples Lowon insait long ls Sepik bai i kamapim sampela hevi long wok bilong ileksen sapos ol bikman bilong plis na gavman i no mekim sampela samting hariap. Aitape/Lumi Distrik Ritening Opisa Mista Rori Rawa i tokaut insait long wanpela pablik bung long Me 28.

Mak long 2,000 manmeri i bung na autim tingting bilong ol long trabel bilong rot blok na hensapim bilong wanpela ka bilong Aitape long ples Lowon long Me 15 na wanpela man i dai.

Mista Rawa i tok taim bilong poling i klostu na trabel i stap yet, bai i pretim ol poling opisel

long mekim wok bilong ol. Bikpela tru em ol i no inap go long ls Kos bilong Aitape stat long ples Natapau long nambis na ol ples insait long Aitape eria.

Em i go het na tok Nesenel Gavman i mekim wanpela gutpela samting long stapim ol pipel long no ken wokabut nambaut long taim bilong ileksen. Taim tambu o kefiu. Dispela tambu i karamapim olgeta taun wantaim tu wanwan liklik ples. Na sapos plis i painim pipel i wokabut nambaut long taim bilong ileksen namel long 10 kilok nait na 4 kilok moning bai plis i holim ol na kotim. Olsem na pipel i mas stap tasol long haus stat long 10 kilok nait na 4 kilok moning.

Long tambu bilong salim na baim strongpela dring, Sandaun Edministrata na Siaman bilong

provinsal Lika Laisensing Bod Gerald Povi i tok. tambu ya bai stat long 11 Jun na pinis long 12 Julai insait long Sandaun provins.

Tasol tambu em Nesenel Gavman i putim bai stat long 11 Jun na pinis long 15 Julai. Mista Povi i tok em i sotim dispela tambu long tripela de. Tasol sapos pipel wantaim ol bisnis lain i brukim dispela tambu., em bai yusim pawa bilong em aninit long Lika Laisensing Lo long surukim tambu ya long pinis stret long de we nesenel gavman i makim long en.

Long Aitape bai ol opisel i kaunim olgeta botol na katen bia na putim mak long ol. Sapos bihain long ileksen ol i painim olsem ol bisnis lain i salim strongpela dring bai plis i holim pas ol na sanapim ol long kot.

WANTOK

All departments. Phone: 325 2500 - Fax: 325 2579
P.O. Box 1982, Boroko, NCD, Papua New Guinea

Published Weekly, Thursday, for
Word Publishing Company Pty. Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola for Word Publishing Co. Pty Ltd.

Acting General Manager and Group Editor in Chief, Anna Solomon	Papers distributed by air throughout PNG
Advertising Manager, James DeLisle	Available by airmail subscription within Papua New Guinea and overseas
Editor of Wantok, Leo Waliwa	
Advertising Deadlines Display Bookings and Camera ready copy Tuesday midday Classified Advertising Wednesday 2pm	

Word Publishing Company Pty Ltd is owned by the four major churches of Papua New Guinea: Catholic 55%, Lutheran 25%, Anglican 10% and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms of acceptance are available at Word Publishing Company Pty. Ltd., and are set out in full on the reverse side of its official Display Advertising Booking Form.

WANTOK

NIUSPEPA BILONG OL PAPUA NIUGINI STRET

No ken baim vot

Pasin bilong baim vot em i no gutpela. Sapos yu votim wanpela kendidet long taim bilong ileksen bikos em i baim vot bilong yu, ating yu no man. Gutpela man i gat tingting, i no inap larim narapela man i grisim em long mekim pasin em i no laikim.

Long Jun 14, ol pipol bilong PNG bai yusim wanpela bikpela rait bilong ol long votim husat man o meri long nesanel palimen. Wanem kendidet i win long dispela ileksen i makim maus bilong olgeta lain i votim ol. Long dispela as, husat lida i go insait long palimen i mas tingim gut. Yu karim maus bilong olgeta pipol bilong yu. Bikos yu karim maus bilong ol lain i votim yu, yu gat wanpela bikpela wok long mekim tu. Yu gat wok bilong mekim ol gutpela na trupela pasin ol pipol bilong yu i bilip yu bai mekim taim ol i votim yu. Olsem na no ken lus tingting long ol lain i votim yu taim yu go long palimen. Sapos ol pipol bilong yu i no votim yu, sori tumas yu no inap stap long palimen.

Sir Julius i tok em i orait long baim ol indipenden kendidet na fomim Gavman. Long Tok Inglis ol i kolim kain pasin olsem "horse-trading". Long tingting bilong Sir Julius em i ting i no gat rong long mekim dispela. Tasol, mipela i laik tokim yu olsem "horse-trading" em namba wan rot bilong baim vot insait long palimen. Taim ol memba i larim ol politikel pati i baim ol, ol i no moa sanap strong olsem ol pipol bilong ol i laikim. Husat memba i larim wanpela politikel pati long baim em, i semim tru ol lain i votim em. Ol lain i votim yu bilong yu karim dispela bilip bilong ol i go long palimen. Sapos ol pipol bilong yu i gat bilip long yu, orait soim ol dispela bilip taim yu stap memba long palimen.

Namba wan pawa nau i stap long han bilong yumi ol pipol. Sapos yumi no laikim pasin bilong baim vot. Yumi mas glasim gut ol kendidet na votim man o meri yumi bilip bai sanap long tok tru, rispektim yumi na makim yumi long palimen.

Enkwairi mas kamap long sekim ol timba projek: NGO

Papua Niugini Fores Atoriti (PNGFA) i mekim bikpela asua stret taim ol i mekim plen bilong givim rait i go long ol kampani bilong go katim diwai long 9-pela eria long PNG.

WENCESLAUS MAGUN i raitim

Dispela disisen i brukim tru mama lo bilong PNG na inap bagarapim tru ol bus graun bilong dispela kantri. Ol bikpela Non-Gavman Ogenaisesen (NGO) long PNG husat i save glasim na mekim wok insait long envoirnmen i tokaut.

Ol NGO i askim Gavman long statim wanpela Komisn bilong Enkwairi long sekim ol wok bilong PNGFA, PNG Fores Bod (PNGFB) na Provinsel Fores Menesmen Komiti (PFMC) kwik.

Ol NGO i askim Gavman long glasim ol pasin PNGFA na PNGFB i save mekim long givim rait i go long ol kampani long go na katim diwai. Dispela Enkwairi i mas painim wanem kain rot PNGFA na PNGFB i bihainim. Enkwairi i mas glasim tu wanem as na ol dispela kampani i save go het na katim diwai maski, ol i brukim sampela lo bilong envaromen we mama lo i ban-

isim. Na Enkwairi i mas glasim gut mani i save kam na go we.

Ol i tok, Gavman i putim wanpela toksave i go aut las wik na askim ol kampani long resis long winim tenda bilong katim diwai long bus bilong Hunstein. Ol NGO i tok dispela eria em wanpela bilong ol eria long PNG we i gat planti ol wel abus, binatang, pis, pisin, diwai, na ol gutpela samting bilong bus i stap long en.

"Pasin PNGFA i mekim long givim rait i go long ol kampani bilong go katim diwai i rong tru," Grinpis Pasifik Fores Spesialis long PNG, Brian Brunton i tok. Em i tok, ol NGO i painimaut olsem i gat sampela samting ol PNGFA i mekim i soim olsem ol i brukim mama lo bilong PNG. Dispela i mekim ol NGO long kamap wantaim sampela askim long wok bilong PNGFB na ol PFMC. Ol i laik bai wok bilong sekim ol dispela lain i mas kamap kwiktaim.

"Pasin bilong givim rait i go long ol kampani bilong go katim diwai long maunten bilong Hunstein i soim ples klia olsem nogat man inap bilip long PNG Gavman. Bikos, long Februari 1997, Gavman i kamap memba bilong Wol Heritage Konvensen (WHC),"

Mista Brunton i tok. Em i tok, dispela kain pasin PNG Gavman i mekim long kamap memba bilong WHC, yu bai ting olsem Gavman nau bai lukluk long lukautim na divelopim ol bus graun bilong en.

Tasol Gavman i no mekim dispela. PNGFB i kamapim ol sot tem plen na strongim tingting bilong katim diwai. "Yumi ken lukim ples klia olsem PNGFB i no wari long sindaun na laip bilong ol pikinini na tumbuna bilong ol long bihain taim," Mista Brunton i tok.

Long sapatim Mista Brunton, WWF mausman long Pasifik, Peter Hunnan i tok ol dispela NGO i mekim planti wok bilong lukautim na yusim ol bus, graun, wara, sol wara, ol wel abus, pisin na binatang long PNG na long wol. Olsem na ol NGO i gat bikpela save long wanem samting ol i toktok long en. Em i tok wan wan bilong ol dispela grup i mekim wok pinis wantaim ol lokol komyuniti long projek we ol asples lain inap katim diwai, salim, kisim mani na lukautim sindaun bilong ol na ples bilong ol.

Na tu ol dispela NGO i lukautim ol wel bus, graun, wara, sol wara, pisin, abus, pis

na ol binatang long eria bilong ol long i no ken bagarap.

"PNG i gat ol planti wail abus, na graun, long wol na em i no gutpela long bagarapim," Dairekta bilong Pasifik Heritage Faundesen, Max Handerson i skruim tok. Em i tok, Gavman i no ken larim nating ol bikpela kampani bilong katim diwai i kam insait long PNG na mekim samting long laik bilong ol.

Em i tok, ol NGO i ting olsem PNGFA na Dipatmen bilong Envoirnmen na Konsevesen i kisim bikpela presa long givim tok orait long ol kampani long go insait long ol nupela eria na katim diwai long sotpela taim tasol. "Ol i mekim olsem bilong amamasim gavman tasol. Gavman bai kisim gutpela samting long bus, na graun bilong ol asples pipel. Tasol ol papagraun bai karim bikpela pen long nau na bihain taim," Mista Handerson i tok.

Ol NGO husat i sapatim dispela toktok em long Konsevesen Melenesen Inc., ENB Sosel Eksen Komiti Inc., Grinpis Pasifik Limited, Individual na Komyuniti Raits Edvokesi Forum, Pasifik Heritej Faundesen Inc., Viles Developmen Tras Inc., na WWF Saut Pasifik Program.

Mesa Enuma tok ol plis na ami stap wantaim

MAN i go pas long ol ami long rausim ol Sandline ami bilong ovasis long kantri long dispela yia, Mesa Walter Enuma i tok ol ami na plisman husat i wok long Bogenvil i sanap wantaim long sapat na wok bung wantaim.

Mesa Enuma i tokaut olsem ol ami na plisman husat i bin stap wantaim long hevi insait long 9-pela krismas long Bogenvil i pilim hevi na karim hevi wantaim. Na sanap bilong ol long wok bung wantaim i bin strong long dispela taim bilong Bogenvil hevi i kam.

Mesa Enuma i mekim dispela toktok bihainim ol toktok bilong holim na kalabusim ol ami husat i bin rausim ol Sandline ami long kantri. Tasol em i tok dispela i no inap brukim wok poroman na sanap wantaim bilong ol.

Tasol Mesa Enuma i tok em wantaim ol lain ami husat i bin wok wantaim bai soim sapat bilong ol na wok aninit na karimaut oda bilong ol long nupela bos Kenel Leo Nuia na praim ministra Sir Julius Chan.

Em i tok bikpela wok nau em long wok bung wantaim long karimaut wok bilong ileksen insait long kantri. Wanem samting

i bin kamap long rausim ol ovasis ami na ol manmeri long kantri i holim straik i kamap bikos hevi ya i kamap insait long mama lo bilong kantri, em i tok.

Tasol Mesa Enuma i tok ripot bilong Sandline Enkwairi i mas go long palamen bai ol memba i ken paitim toktok long en na kabinet bihain long ileksen i mas mekim eksen long en.

Bihain long Sir Julius Chan i bin go bek long opis na kisim wok bilong em olsem praim ministra long las wik, kabinet i bung na makim Kenel Leo Nuia olsem nupela komanda bilong PNG Difens Fos. Em i kisim ples bilong olpela bos, Jerry Singirok.

Mesa Enuma i tokaut olsem nupela komanda i mas wok strong nau na tingting moa long helpim ol 1,000 plisman na ami husat i wok long lukautim hevi long Bogenvil i stap.

Tasol Ekting Sief ov Staf bilong PNG Difens Fos Kenel Regginal Renagi i tokaut olsem Mesa Walter Enuma i no rait man bilong mekim ol kain toktok olsem long niuspepa. Bikos ol mausman bilong

ami long mekim ol toktok we i sut long wok edminstresen, operesen na hevi bilong ami i mas kam long Minista bilong Difens Fos, Jenerel Leo Nuia, em yet Kenel Renagi na seketeri bilong Difens Dipatmen.

Liklik taim bihain tasol long Sir Julius Chan i bin kam bek long sia bilong em olsem praim ministra, kabinet i bung kwiktaim na makim Kenel Leo Nuia olsem bos bilong ami long kisim ples bilong Jerry Singirok.

Tasol ripot bilong Kenel Nuia long bipo i kamapim pret nau long ol manmeri bilong Bogenvil. Bikos ol ting bai planti manmeri i kisim taim long ami gen. Kenel Nuia i gat rekot long tromoi ol Bogenvil lain long namel bilong biksolwara.

Tasol praim ministra Sir Julius Chan i tok olpela bos Jerry Singirok i yangpela boi nau tasol i kalap hariap i go antap olsem Komanda. "Mipela i mekim asua long makim em (Singirok) hariap tumas.

WANTOK

NIUSPEPA BILONG OL PNG STRET

P O Box 1982 BOROKO

Telepon namba: 325 2500

Feks namba: 325 2579

PE BILONG WANPELA VIA 52 NIUSPEPA

PLES	AIR
Mosbi	K 40.00
Arapela PNG eria	K 75.00
Australia na Nu Silan	K115.00
Esia pasifik na Japan	K150.00
Amerika na Yurop	K215.00




Bogenvil ripot wantaim VERONICA HATUTASI

Pipel laikim lida long stretim hevi



CATHOLIC COMMISSION FOR JUSTICE, PEACE & DEVELOPMENT
 P.O. BOX 6576
 BOROKO, N.C.D
 PAPUA NEW GUINEA.



Redi long 1997 nesanel ileksen

6. Yumi redi nau long ilékxen na yumi mas skelim gut tingting. Kantri i nidim ol stropela na stretpela lida, ol man na meri husat inap stretim wari bilong PNG tude.
7. Yumi no mas votim ol lida husat i gat nem long paulim mani, i no wok gut na i brukim lo.
8. Pasin bilong paulim mani na kisim gris mani bai kamap sapos yumi votim ol gridi lida husat i baim vot na i tingting tasol long helpim ol wantok na husat i no bihainim stret kristen pasin long laip bilong em.
9. Yumi mas tingting long gutpela sindaun bilong kantri long taim yumi i vot.
10. Bai kantri i gat sans long lukim gutpela sindaun, sapos yumi votim ol gutpela lida i go long Nesanel Palamen.
11. Yumi ol vota is mas putim kantri i go pas long taim yumi votim ol mida.
12. Yumi mas skelim gut pasin bilong ol kendidet. Yumi mas skelim laip bilong ol kendidet pa i ken skelim tasol ol mauswara bilong em.

OL PIPEL long Bogenvil bai i makim ol lida husat ol i ting bai i helpim long pinisim dispela hevi long ailan long gutpela rot. Dispela em tingting bilong planti Bogenvil pipel.

Planti i tok dispela hevi i wok long go long planti yia nau tasol ol pipel i karim hevi yet. Na ol i laikim ol lida husat i win long sanap strong long go hetim ol toktok na painim gutpela rot long pinisim hevi.

Narapela bikpela samting em ol lida we ol i makim i mas kisim sevis i go long ol pipel.

"Planti taim mipela i makim ol lida tasol taim ol i stap long gavman planti i no tingting tumas long sanap makim ol pipel. Planti pipel i luksave pinis long dispela na ol bai i lukluk gut long husat ol lida ol i votim long dispela ilékxen.

Long rijenol sit, i gat bikpela resis namel long tripela man. Em long man husat i holim sia long 25 yia, John Momis na tupela nupela man. Nem bilong ol em George Lesi husat i bin holim wok olsem olupela administretiv seketeri long Not Solomons administresen na

wanpela pailot bilong balus long Bogenvil yet, Isaiiah Moroko.

I gat bilip olsem vot long tupela man bai i bruk long Buka, Long bikailan i gat ol sapota bilong tupela man tasol Momis i gat sapot tu long planti pipel yet long provins. Resis bai i stap namel long tripela tasol meri kendidet tu, Elizabeth Burain em wanpela bilong lukaut long en bikos em i gat bikpela sapot i kam long ol meri.

Long Saut Bogenvil, ol nupela man olsem Moses Koiri wanpela loya bilong Buin husat i stap long Mosbi, Peter Rumbali husat i wanpela biknem man long sait bilong edukesen long Bogenvil bilong Bana eria em i narapela husat i putim bikpela salens long Michael Laimo, man husat i holim sia nau. Tasol Laimo i gat bikpela sapot yet long saut Bogenvil.

Long Sentrel Bogenvil, resis bai i stap namel long Sam Akoitai husat i lida bilong ol resistens paitman long Bogenvil na Joseph Egilio. Akoitai i bilong Wakunai, sem ples we Mista

Egilio i kam long en. I gat ol arapela man bilong Sentrel Bogenvil husat i sanap resis long dispela sia na i kam inap nau, i no klia husat tru long ol inap long winim sia long Mista Egilio.

Long Not Bogenvil, planti man i lukluk olsem resis bai i stap namel long tripela man. Em long man husar i holim sia nau Michael Ogio na James Togel man husat i bin salensim Ogio long kot bilong disputet ritens long las ilékxen bilong 1992.

Narapela man husat ol i ting bai i gat strongpela salens long dispela sia em long Leo Hannett. Em i gat strongpela sapos tu long ilektret bilong em. Hannett bilong Nissan Ailan em i wanpela biknem man husat i gat rekot long sait bilong politikis long Bogenvil.

Dispela em nem bilong ol lain long Bogenvil we planti pipel i ting olsem nem bilong ol bai i pairap long winim ol foapela sia long provins.

Samting olsem 30,000 pipel i bin putim nem bilong ol long vot

long Bogenvil. Dispela i 12, 000 moa long mak we i bin vot long 1992 ilékxen.

Mak long ol dispela i bin stap olsem 18,000. Mak i go antap bikos long dispela ilékxen, ol pipel bilong bikailan Bogenvil bai i vot.

Long 1992, sindaun i bin bagarap tru na ol pipel bilong saut, sentrel na planti hap bilong bikailan Bogenvil i no bin vot. Ol pipel bilong Buka, sampela hap bilong Tinputz, Wakunai na notwest Bogenvil i bin vot.

I kam inap long dispela trabel las wik we ol BRA i holim pasim Mista Momis, ol wok long kempin i bin go gut tasol, maski ol BRA lida i bin putim ol toktok long bagarapim ol wok bilong ilékxen. Nau yet, planti hap long Bogenvil em ol i ting ilékxen bai i ron gut tasol.

Long Saut, Sentrel na sampela hap long not Bogenvil, bai ol i holim wanpela de ilékxen tasol. Long Buka na Atols distrik, ilékxen bai i go het inap long pinis bilong em.

Wari na hevi bilong pipel pusim Elizabeth long train ilékxen

WANPELA meri kendidet tasol long dispela ilékxen husat i sanap resis long Bogenvil rijenol sit i lukim dispela sit olsem wanpela bikpela salens long em.

Meri ya em Elizabeth Tanji Burain. Em i bin wok olsem kodineta bilong Bogenvil Provinsal Wimens Kaunsel pastaim long em i risain long resis long Bogenvil provinsal sit. Dispela em sit we biknem Bogenvil lida na lida bilong Melanesien Alaens nau ol BRA i holim i stap, John Momis i holim insait long 25 yia pinis.

Elizabeth i bilong Sapos Ailan long Buka. Em i marit na em i gat foapela pikinini. Em wantaim 13 arapela man i

sanap resis long sia bilong Bogenvil rijenol.

Planti long ol dispela man em ol biknem man Bogenvil husat i wok long gavman na praivet sekta. Ol lain olsem George Lesi, John Siau, Simon Kenehe, Isaiiah Moroko wanpela pailot bilong Buka husat i namba wan man long ronim AirLink balus i go long bikailan long 1992 long taim hevi i stap yet. Dispela em sampela long ol biknem man husat i laik salensim Mista Momis.

Planti moa man i sanap tasol Elizabeth i no wari. Em i tok taim nau long ol meri long Bogenvil long go pas long lidasip wok na ol wok go het bilong Bogenvil.

Elizabeth i sanap olsem wanpela independen kendidet. Sampela ol bikpela samting we Elizabeth i tingting long mekim em;

- Traim daunim hevi long Bogenvil;
- Ol meri i mas stap insait long wok bilong go hetim gavman na bisnis long Bogenvil;
- Glasim helt na edukesen sevis long lukim olsem ol pipel i kisim gutpela sevis;
- Sios, ol yut na ol meri i mas stap insait long wok bilong soasel na bisnis developmen long Bogenvil;
- Stap insait long wok na ol toktok long risos developmen na
- Ol developmen i mas kamap long ol rot, bris na ol arapela samting moa olsem.

Elizabeth i go mekim ol wok kempen long saut na sentrel Bogenvil. Dispela em ol eria we i no gutpela tumas bikos em ol ples bilong ol BRA paitman.

Long Buka, em i bin kam bek bihain long foapela wik wokabout i go long Bana, Siwai, Buin na Sentrel Bogenvil. Long saut Bogenvil, Elizabeth i bin wokabout tasol na em i no yusim wanpela ka, balus o sip. Em i bin wokabout na slip long wanem hap nait i bungim em wantaim ol arapela meri husat i kempen wokabout wantaim em. Em i bin go long ol ples bihainim singaut bilong ol asples lain long sindaun wantaim ol na givim sampela toktok long ol. Wokabout bilong em i bin stat long Bana distrik. Em i bin wokabout stat long Sovele i go olsem long Boku na Siwai, Mamagota, Buin. Bihain em kisim helikopta na go long Sentrel Bogenvil. Long wan wan distrik, em i bin stap inap long 5-pela de.



Elizabeth Burain

"Mi amamas long wokabout long lek bikos mi bin lukim long ai bilong mi stret kain laip ol pipel long ples i stap long en bikos long Bogenvil hevi. Tu mi laik glasim ol sevis we ol pipel long planti hap bilong bikailan Bogenvil i kisim. Long Buin distrik, ol pipel i kisim taim tru bikos nogat sevis i go long ol", Elizabeth i tok.

Elizabeth i amamas tru long brukim skru i go long bikailan Bogenvil na em i gat bikpela laik long husat manmeri i win long mekim gut wok bung wantaim ol ples lain na kisim ol sevis i go long ol. Moa yet em i laikim helt na edukesen sevis i go long ol.

Ol meri long Bogenvil i bin go hetim strong wok long kamapim bel isi na sekan pasin na toktok wantaim ol BRA. Na ol i gat gutpela sans long toktok wantaim ol (BRA) long rot bilong daunim hevi long ailan, Elizabeth i tok.

Elizabeth em i wanpela meri husat i laikim samting i mas karim kaikai. Em i gat bikpela tingting long ol arapela tasol long wankain taim tu em i no meri bilong bikmaus.

Samting we i bin mekim em i gat bikpela tingting long sanap resis long ilékxen em long velu bilong laip, em i tok.

"Mi bilip strong olsem nogat man inap long kisim laip bilong narapela man. God tasol i gat rait long dispela. Husat manmeri ol pipel bilong Bogenvil i makim olsem

lida i mas stapim pait na pasin bilong kilim dai narapela man. Planti man i dai, planti i kisim hevi na planti i stap long ol kea senta. Yumi i mas stapim dispela na larim gutpela sindaun i kamap bek long Bogenvil", Elizabeth i tok.

Ol meri long Bogenvil i makim 60-65 pesen mak long namba bilong olgeta pipel long Bogenvil. Na Elizabeth i amamas long sapot we em i kisim long netwok bilong ol meri long provins.

Wok bilong em wantaim ol meri insait long laspela 10-pela yia i givim em save long daunim ol hevi long soasel sait na komynuniti.

Elizabeth i bin skul inap long yunivesiti tasol bikos long hevi long famili, em i no pinisim skul bilong em. Em bin wokim komynuniti na hai skul long Buka yet. Bihain long em i lusim yunivesiti, em i bin marit na stap long Arawa. Long hap em i bin wok wantaim BCL Savings na Lons bipo long em i pinis na go wok wantaim ol meri. Em i putim strongpela tingting bilong em long sapot we ol meri bai i givim em long kisim namba long dispela ilékxen.

Tasol em i tok "Bikman i gat we bilong €... yet na mi lusim ol samting long han bilong em. Maski mi win o lus em i liklik samting. Mi bai amamas tasol long lukim olsem mi sanap long mekim samting helpim komynuniti bilong yumi long Bogenvil".



TU MINIT TINGTING

PASIN BILONG GO LONG LOTU

LONG sampela yia i go pinis ol i wokim wanpela muvi long Sen Fransis. Nem bilong en: "Brata San na Sista Mun." Em i bikos Sen Fransis i save kolim san em i brata bilong em, na mun em i susa bilong em.

Sen Fransis em i gat biknem long laikim ol diwai na sayor na pinis na animal na binatang husat i stap nabaut long em. Long sampela de em i save sindaun aninit long wanpela diwai na ol pinis i flai i kam na sindaun long solda na han bilong Sen Fransis na em i save toktok long ol. Tru tumas: Sen Fransis i bin painim God insait long ol samting i stap nabaut long em.

Tasol long taim Sen Fransis i laik toktok wantaim God long wanpela spesel we, em i save visitim wanpela liklik haus lotu. Insait i gat wanpela bikipela diwai kros i hangamap long banis. Na Fransis i save lukluk long en na tingting na beten long God.

Namel long yumi ol Kristen i gat sampela manmeri i save les long go long lotu long wiken. Ol i save givim kainkain ekys na tok, "Mi olsem Sen Fransis, mi painim God long ol samting nabaut long mi." Sampela arapela i save tok, "Mi

stap bek long haus na mi save beten long ples hait, olsem Jisas i bin skulim yumi long Matyu 6.6. Maski long go long haus lotu." Tasol mi yet mi no bilipim kwiktam dispela hap tok.

Harim! Jisas tu i bin painim-God insait long ol gaden na maunten na wara. Tasol Nupela Testamen i soim yumi planti taim we Jisas i bin go long haus lotu bilong ples long olgeta Sarere. Em i bin wokim planti mirakel insait long haus lotu yet.


Yumi olgeta Kristen i gat pasin bilong go long lotu long wiken, we yumi bungim planti arapela bilipman na yumi beten wantaim. Tasol nau moamoa Kristen i wok long lusim pasin bilong go long lotu. Mi laik soim dispela long wanpela stori.

I no longtaim i go pinis na wanpela Kristen i raitim wanpela pas i go long edita bilong niuspepa. Insait long pas em i komplem olsem: "Inap long 30 yia nau mi bin go olgeta Sande long lotu. Insait

long ol dispela yia mi bin harim samting olsem 3,000 (tri tausen) toktok bilong pasto. Tasol mi bin lus tingting olgeta long ol dispela toktok; bihain long ol dispela yia mi no inap tingim wanpela aidia mi bin kisim long maus bilong pasto. Long tingting bilong mi, ol pasto na pris i westim taim tasol"

Man! Ol rida bilong niuspepa i bekim planti pas i go long edita. Ol i pairap tru long dispela man i raitim pas. Na sampela rida i egensim ol dispela pas gen, na ol i rait i go i go..... Bihain long tu mun samting wanpela man i salim wanpela pas i go long edita, na dispela pas in pinisim olgeta tok kros.

Dispela man i rait olsem: "Mi bin marit inap long 30 yia nau. Insait long dispela taim meri bilong mi i bin redim kaikai bilong mi inap long 32,000 (terti tu tausen) taims. Tasol sapos mi tingting bek nau long ol dispela kaikai, mi no inap tingim wanem samting tru i stap insait long wan wan kaikai. Tasol mi save gut long wanpela samting:



FRANK MIHALIC i raitim

bikos meri bilong mi i bin givim kaikai long mi long olgeta wan wan de, mi stap strong na helti nau. Sapos meri bilong mi i no bin redim ol dispela kaikai, ating bai mi matmat pinis."

Bihain ol rida i ritim dispela pas, i no gat sampela komplén moa. Dispela pas i sutim bel bilong ol tru. Watpo? Bikos em i tok tru tumas.

Wanpela las aidia bilong Sande i go olsem: Baibel i stori long God

i bin wokim heven na graun insait long 6-pela de. Na long de namba seven em i malolo. Yumi tu i mas bihainim eksampel bilong Em na mekim wankain.

Long tok Inglis yumi gat tok long "Holi de" na "Holidé." Na tupela i narakain "Holi de" em de bilong lotu. "Holidé" em i de bilong malolo. Long Tok Pisin i wankain: "Holidé" em i de bilong pilai. "De holi" em i de bilong lotu. Long holidé yumi kisim win; long de holi yumi taitim bun. Long holidé yumi no laik tingting long wok; na long de holi yumi save tingting na skelim wok bilong yumi. Long ol holidé, yumi save pati liklik na kaikai gut. Long de holi yumi gat spesel kaikai tu, em yukaris tasol. Long ol holidé yumi save amamas long ol samting bilong graun; long de holi yumi mas amamas long ol samting bilong God. Long ol holidé yumi save tingim bodi bilong yumi, long ol de holi yumi mas tingim sol na sprit na tewel bilong yumi. Holidé em bilong aut-sait na de holi em bilong insait.

Long olgeta 52 wik bilong yia yumi gat ol holidé na ol de holi. Yumi mas larim ol Sarere i holidé bilong yumi, na larim ol Sande i de holi. Olsem na bai ol samting i ken skel gut long laip bilong yumi.

Kiunga na Daru i holim riniuol miting

DAIOSIS bilong Daru na Kiunga insait long Western Provins i wok long kirapim wanpela program long kisim ol manmeri i kam bek long God. Long mun i go pinis samting olsem 22 manmeri i kism skul long helpim ol pipol long lukluk long laip bilong ol na tanim bel.

As tingting bilong dispela riniuol miting em bilong stringim tingting bilong daiosis long givim wok bilong Sios i go long planti lokol manmeri bilong strongim tingting bilong Vatican II we i laik lukim Sios i olsem Bodi bilong Krais.

Ol in bin holim dispela miting long painim aut watpo tru sampela manmeri i save painim hat long kamap gupela manmeri.

Ol i bin holim dispela miting long Epril 20 igo long Me 16.

Dispela miting i kamap olsem kaikai bilong hat-wok bilong daiosis long helpim ol manmeri long tanim bel na kamap klostu long God.

Nius i kam long daiosis i tok olsem: "Sapos yumi i no save long ol samting yumi laikim, yumi no inap long luksave long ol wari bilong yumi na yumi i no inap long painim gupela rot bilong bihainim."

Ol manmeri i bin statim dispela miting wantaim tupela de ritrit long helpim ol long kisim gut tingting na bel isi. Planti manmeri i kamap long dispela skul in tok olsem dispela miting i bin helpim ol long luksave long ol wari na hevi i save pasim ol man long tanim bel, kamap gut na kan klostu long God.

Ol Katolik i redi long Jubili yia 2000

BARBARA MASIKE i raitim

OL KATOLIK manmeri long olgeta hap bilong wol i wok long redi nau long bikipela jubili bai kamap long yia 2000. Long Mosbi, ol pater na ol man i go pas long lotu i kism toksave pinis olsem bai i gat wanpela bikipela lotu i kamap long Sir John Guise Stadium long Jun 29.

Man i go pas long dispela bikipela bung na Ekting Akdaiosis Edministreta Pater Roger Mount husat i wok long oganaisim dispela bung i salim pinis ol pas i go long ol pater na ol wokman bilong Sios. Insait long dispela pas Pater Mount i bin salim long Me 7, em i tok olsem: "Long mipela ol kristen manmeri, dispela bikipela jubili bai makim hamamas bilong mipela long taim mama i karim Jisas na long de em i dai bilong kisim bek yumi."

Long dispela as yumi olgeta kristen i mas amamas. Mipela i holim dispela bilip olsem Jisas i pikinin bilong Papa God, na Em bin kamap olsem yumi na i bin dai long kisim bek yumi inap long 2000 yia olgeta. Pater Roger i tok klia olsem bai i gat tupela hap bilong redim ol samting long dispela Jubilee yia 2000.

Em i tok olsem, namba wan hap bilong redi long yia 2000, em i sapos long stat long 1996 tasol long Mosbi yumi i statim long dispela yia. Long dispela taim ol manmeri i mas kirapim tingting na bel bilong ol long wanem as tingting tru bilong Jubili yia 2000.

Long namba tu hap bilong em, we i mas kamap long 1997 na i go long 1999, Pope John Paul II laik ol kristen i luksave long wok bilong Jisas long laip bilong yumi wan

wan. Orait long 1998 em i laik bai yumi ol kristen imas luksave long pawa bilong Holi Spirit insait long Sios na insait long laip bilong yumi wan wan. Na long 1999 Pope i laik bai yumi i luk save long pawa bilong Papa God. Na long yia 2000 olgeta manmeri i mas givim biknem long Papa God, God Son na God Holi Spirit o Trinititi. "Yumi olgeta Katolic manmeri i mas hamamasim dispela bikipela de long olgeta

hap bilong graun," Pater Mount i tok makim maus bilong Pope Paul II.

Em i tok olsem bai i gat wanpela bikipela bung i kamap long Rom long makim laip na dai bilong Krais long kisim bek yumi. I luk olsem planti kristen long olgeta hap bilong wol bai i go bung long beten, na lotuim God long dispela bikipela pestode. Pater Mount i tok: "Dispela em i wanpela singaut long

yumi wan wan long lukluk go bek long laip bilong yumi. Dispela pasin em i olsem ritrit."

Em i wanpela singaut long traim na kamap gut na stret long tingting, na bel bilong yumi wantaim Papa God. Long bihainim laik bilong God. Em i wanpela singaut long kamap stret long ai bilong God, ol arapela na yumi yet. Pater Mount i tok, taim yia 2000 i kamap yumi

bai hamamasim dispela jubili olsem yumi givim ol nupela pikinini i go long God.

Sampela toksave:

Program bilong redi long Jubili yia 2000 bai kamap i olsem: Taim bilong lainim singsing bai kamap long wan kilok long olgeta Sande abin-un long Santu Joseph's peris long Is Boroko. Resis long wokim Logo disain bilong Jubili yia 2000 bai stat long Jun 2. Ol Jubili komiti i askim

olgeta skul na peris lain long traim resis long dispela. Nem bilong lain i win bai kamap long ol niuspepa long Septemba 29.

Pater Mount i tok tu olsem ol bai wokim ol sampela pepa long toksave long ol man long as tingting bilong Jubili yia 2000. Long Disemba ol bai traim kamapim wanpela spesel ripot na givim i go long ol pablik long ritim.

Dispela ripot bai givim gupela skul na toksave long ol samting bai kamap long Jubili. Komiti i go pas long Jubili, i wok long tingting tu long holim ol semina na woksop long helpim ol pater, na ol peris minitri lida olsem ol yut, meri na ol narapela lain long peris.

• RAITHAN: Rev Paxul na Mrs Marie Senff, Lecturer long ELC PNG Hailans seminari Ogelbeng. Poto: Ulrike Sauerbier. Lukim stori long pes 11

• ANINIT: Diken Frank Joseph bai kisim Odinesen long Jun 29, 1997. Em bilong Gusawefa peris long Trobrian Alian, wanpela Katolik misin long Milne Bay provins. Poto: Wenceslaus Magun.



Komonwol sekim PNG ileksen

Siaman bilong Komonwol Obseva Grup, Sir Robin Gray i tokim Wantok olsem namba wan as tingting ol grup bilong en i kam long mekim em long sekim sapos Papua Niugini i save bihainim tru mama lo bilong ol Komonwol kantri aninit long prinsipel bilong "Herere and Millbrook Agreement".

WENCESLAUS MAGUN
i raitim

Insait long "Herere and Millbrook Agreement" olgeta kantri insait long komonwol i mas holim ileksen bilong ol long demokratik we.

Dispela i min olsem nogat wanpela man i mas bosim o fosim ol narapela lain long votim ol o ol sapota bilong ol.

Ol lain bilong Komonwol Obseva Grup i kam long PNG, bihainim

askim bilong PNG Gavman. Ol bai glasim pasin bilong ileksen stat long Jun 14 i go inap long Jun 18, 1997.

"Mipela i kam bilong glasim pasin bilong ileksen long PNG na sekim sapos PNG i save bihainim tru prinsipel bilong "Herere and Millbrook Agreement" Sir Gray i tok.

Em i tok ol lain bilong Obseva Grup bilong Komonwol i kam bihainim singaut bilong PNG Gavman.

"Dispela em i namba wan taim stret bilong Komonwol long salim wanpela grup i kam long PNG long glasim PNG ileksen," Sir Gray i tok.

Komonwol i bin salim pinis ol kain grup olsem i go long Gambia, Pakistan na Sierra Leone.

Sir Gray i tok Komonwol i no save go na glasim ileksen bilong ol kantri i stap memba bilong Komonwol long laik bilong ol. Nogat. Pastaim Gavman bilong ol dispela kantri yet i mas askim ol long go.

Sir Gray i amamas long tokaut olsem Komonwol Sekreteri-Jenerel, Siv Emeka Anyaoku i stap tu insait long dispela Obseva Grup nau i kam long PNG.

"Mipela i kam bikos Gavman bilong PNG wantaim sapot bilong ol bikpela politikel pati husat i resis long dispela 1997 ileksen i askim mipela long kam," Sir Gray i strongim toktok bilong em.

Olsem ol lain i kam long glasim dispela ileksen, mipela wan wan bai mekim wok long pawa bilong mipela wan wan.

"Mipela i gat wok bilong glasim gut ol kainkain wok bilong Iektorel Komisen na pasin bilong vot long PNG. Mipela bai sekim sapos ol pipol bilong PNG i save bihainim tru mama lo bilong PNG long vot o nogat? Long pinis bilong dispela wok painimaut, mipela bai tokaut sapos i tru ol pipol bilong PNG i gat sans long vot gut olsem mama lo i laikim o nogat? Mipela bai sekim na lukim sapos ol pipol long PNG i no painim birua, hevi, na pret long taim bilong ileksen."

Wanpela samting mipela bai sekim gut em long lukim sapos ol kendidet wantaim ol sapota bilong ol i yusim gan o ol samting bilong pait na baim vot o fosim ol pipol long vot," Sir Gray i tok.

Em i tok, bihain long dispela wok painim, Obseva Grup bilong ol bai raitim wanpela ripot i go long Komonwol Sekreteri Jenerel. Na em bai givim wanpela ripot i go long PNG Gavman.

PNG Gavman bai givim kopi i go tu long ol politikel pati i resis long ileksen. Sir Gray i tok tu olsem Obseva Grup bilong ol bai givim tu wanpela ripot i go long olgeta Gavman insait long Komonwol.



□ Indipenden kendidet bilong Madang Open, Katherine Mal (lephan) go pas long singsing grup taim em igo kempen raun long ol ples long Madang. Foto: ROBERT KAIA

Ol kampani i kamapim Risev Plis Yunit long Banz

LAS wik Sarare Plis Komisina, Bob Nenta i bin bung wantaim ol kampani menesa, ol komuniti lida na ol pablik long Banz long Western Hailan provins long lukim 27 man bilong mid-Waghi Risev Plis Yunit i greduet.

JAMES SAKUL
i raitim

Dispela Risev Plis Yunit i bin kamap bihain long sampela wok painimaut namel long plis stesen komanda bilong Not Waghi, Maija Michael Kapal na provinsol plis komanda bilong WHP, Titus Pamben wantaim ol menesa na papa bilong ol plentesen na kampani long Not na Saut Waghi.

Ol i bin holim dispela miting long sampela mun i go pinis na pasim tok long kamapim dispela Risev Plis Yunit bikos planti taim i gat trabel na hevi long hap bilong ol tasol ol i no save kisim helpim hariap long ol plisman.

Sampela ol hevi ol i lukim long ol plisman em olsem, sampela taim i no gat inap plisman na sampela taim i gat asua long plis kar na ol i no inap kam.

Long dispela as ol dispela bisnisan long Banz i putim het wantaim na redi long putim mani i go insait long kamapim na helpim wok bilong ol Risev Plis Yunit.

Ol i tok ol i redi long baim ol yunifom, pe na ol arapela samting bilong dispela 27 plisman.

Mista Nenta i tok em i amamas tru long harim ol kampani bilong Waghi Veli i kamap wantaim dispela tingting long helpim ol yet na strongim wok bilong ol plisman. Em i tok olsem planti taim ol kampani, komyuniti na planti pipol i

save lukluk long gavman tasol long mekim olgeta samting.

Mista Nenta i tok i tru wan wan taim gavman i save lukluk long sampela askim bilong ol pipol tasol planti taim i nogat o i save kisim longpela taim.

Olsem na em i tok "yupela yet mas traim na kamapim sampela samting pastaim na askim gavman long kam insait.

Em i tok olsem ol dispela 27 plisman i no man nating nau. Ol i gat namba na wok bilong ol i wankain tru olsem ol arapela plisman.

Em i tokim ol dispela 27 Risev plisman long mekim wok long stretpela na honas pasin. "Yupela mas strongim gutpela nem bilong plis fos olgeta taim.

Noken ting yupela i gat yunifom nau na yupela traim long abrusim pawa bilong plis na mekim pasin long laik bilong yupela.

Dispela bai bagarapim rekot na gutpela nem bilong plis," Mista Nenta i tok. Long pinisim toktok, em i givim bikpela tenkyu na amamas i go long ol kampani bilong Waghi Veli long givim sapot long plis fos.

Mista Nenta i givim ful sapot long dispela Risev Yunit na tok em bai sapotim dispela Risev Yunit taim em i stap olsem Plis Komisina yet.

OL narapela bikman husat i bin kamap long witness dispela seremoni, em Hailans Divisen Plis Komando Mathew Minok, PPC Western Hailans Titus Pamben, Depyuti Administreta bilong WHP, Michael Wandil na Jenerol Menesa bilong Waghi Mek Plentesen, Diek Hagon.

Tambul skul kisim moa long K100,000

Depatmen bilong Edukesen, long Western Hailan provins i givim Tambul top-ap skul moa long K100,000 ananit long nupela edukesen rifom sistem.

MICHAEL MONDA
i raitim

Planti ol top-ap komyuniti skul na hai skul i kisim dispela kain mani long wokim ol klasrum, ol haus tisa na tu bilong baim ol sampela skul samting bilong skul.

Provinsel Gavman i givim kontrak i go long Boinamo Builders bilong Lae long wokim wanpela nupela klasrum long Tambul. Wok bilong dispela dabel stori klasrum i stat pinis long las mun.

Dispela nupela klasrum bai i gat foapela rum tupela long antap na tupela long aninit wantaim tupela opis wanpela antap na narapela aninit.

Wanpela bilong ol dispela klasrum bai stap olsem "science laboratory" narapela bai stap olsem "Practical Skills" klasrum,

narapela bai stap olsem "Home Economics" klasrum na narapela bai stap olsem wanpela klasrum bilong ol gret 8 sumatin bilong 1998.

Het masta bilong Tambul Mista Drum i tokaut olsem taim dispela dabol klasrum i pinis, Tambul Skul bai i gat 15 klasrum olgeta. Ol tisa bai yusim wanpela bilong ol dispela klasrum olsem opis bilong ol.

Long nau yet Tambul Skul i gat 8-pela klasrum. Sampela ol kapenta i wok long tripela olpela klasrum we bipo ol i save stap olsem singel klasrum tasol nau ol kapenta i mekim olsem dabol klasrum.

Bos bilong Boinamo kampani husat i go pas long dispela projek i tok olsem olgeta 7-pela nupela klasrum bai pinis long namba 8 mun bilong dispela yia.

Bihain long liklik miting bilong dispela bos bilong kampani na skul tupela i tok olsem, Boinamo Kampani bai helpim skul na putim pawa i go insait long ol nupela

klasrum sapos skul i putim sait mani bilong pawa.

Boinamo kampani i wokim tu tripela nupela haus tisa.

Dispela developmen long Tambul skul i wanpela bikpela senis tru long skul we ol papamama na komuniti i lukim na amamas. Tambul skul i kisim tu wanpela poto kopi masin, wanpela dupliketing masin na tu wanpela taip raita.

Gavana bilong WHP Mista Wingti i tok em bai lukluk long olpela klasrum na putim mani long stretim ol dispela klasrum.

Sapos em i no mekim dispela em i tok long rausim ol na wokim nupela.

Dispela em long wanem, em i bin promisim ol tisa na bod memba long miting olsem bihain long 7-pela krismas olgeta komyuniti skul insait long WHP bai i gat ol pemenant klasrum. Dispela ol klasrum i ken stap moa long 50-100 yia.

Have You Paid Your Bill Yet?



TELIKOM
Now we're really talking!

There days, we need phones to stay in touch with our family, friends and relatives. And in business, profitability is essentially dependant on phones. Don't disrupt your phone service you now enjoy. Regularly pay your Telikom Phone Bill by the due date shown on your statement.

Avoid embarrassing disconnections, please pay your phone bill today!

Tanim bel long taim bilong hevi na trabel

TAIM hevi i kamap long wanpela famili, hauslain, wanpela ples, provins, kantri, kampani, gavman dipatmen, lida bilong sios na bilong gavman, olgeta birua bilong en bai amamas tru na patim han na singsing. Na ol bai sutim pinga hariapi go long em tu na mekim ol kainkain tok baksait wantaim.

Olsem na mi tu, olsem wanpela sitisen bilong dispela demokratik kantri bilong yumi PNG, mi laik mekim wanpela tok olsem.

Long dispela taim bilong bikpela hevi ong Bogenvil na ol praivet ami bilong Sandlain International, planti bilong yumi i sutim pinga i go long ol maus man bilong sios, ami na lida bilong gavman bilong yumi.

Olsem wanem yumi i mekim stret o nogat? I luk olem taim yumi sutim pinga i go long Gavman o ol lida, amaspela pinga i go long em na amaspela i kam bek long yumi wanwan? Ating wanpela tasol i go long em na foa-pela olgeta i kam bek long yumi wanwan.

Na dispela i soim yumi olsem wanem? Long dispela hevi, mi skelim olsem, ating yumi wan wan sitisen bilong PNG, i wok long hevi tu olsem Kristen sitisen.

Long wanem yumi yet i save tokaut long arapela kantri tu olsem PNG em i Kristen kantri.

Na dispela i min wanem samting tru? Long dispela kain nek, yumi i save tokim ol arapela susa kantri olsem mipela olgeta wan wan manmeri i Kristen. Sapos dispela tok yumi i mekim i gat as tru orait,

yumi wan wan kristen manmeri insait long wan wan hauslain, ples, rijen, provins na long ol kristen sios na gavman dipatmen, mas pret long God papa long heven na laikim em tru pastaim long ol arapela samting.

Tasol ating nogat? Planti hap insait long kantri i bin gat planti samting em Aposel Pol i bin tokaut long Galesia 5: 19-21.

Na ol i laik i go het na mekim moa yet, olsem Revelesen 22: 11a i tok. Em i tok olsem, "Olsem na man i save mekim pasin nogut, em i ken mekim pasin nogut moa. Na man i save mekim pasin doti, em i ken mekim pasin doti moa".

Olsem wanem sapos man i kamap kristen pinis, i go bek gen na bihainim olpela bel, em bai isi long tanim bel o nogat? Ating nogat? Na olsem wanem, dispela kain pasin tudak i kamap bikpela. God bai larim tasol? Nogat. Em i mas stretim na lainim gut pikinini bilong em. Proverbs 13:24.

Olsem na dispela hevi i wanpela sans bilong God papa i laik stetim yumi na lainim yumi long ol kain krangi pasin na sindaun bilong yumi.

Na sapos yumi go bek long sampela histori bilong ol manmeri bilong God (ol Israel) long Olpela Testamen insait long Baibel, bai dispela inap lainim yumi tu.

Taim ol Israel i tanim baksait long God Yaweh, Em i save, larim ol sampela hevi nogut i save i kam na mekim save tru long ol. Sampela taim God i save givim strong bilong en i go long ol birua

bilong ol na ol i save kam kisim ol i go na kilim na kalabusim ol.

Inap ol i luksave na tanim bel tru na lusim pasin nogut bilong ol pastaim? God i save kisim ol bek.

Long dispela tingting mi no sutim pinga i go long ol brata Bogenvil Revelusineri Ami (BRA), ol Sekyuriti fos na ol arapela grup husat i stap insait wantaim long dispela hevi bilong Bogenvil, na kamapim dispela kain hevi.

Nogat, mi mekim dispela tok namel long yumi olgeta i ken lukim na skelim long yumi yet. Olsem na mi tokaut olsem, nogut dispela em i wanpela sans, we God i laik stretim na lainim yumi olgeta

Kristen manmeri na gavman bai yumi i ken pilim dispela pen long asua bilong yumi.

Na yumi i ken tanim bel na givim baksait long ol kain pasin nogut bilong yumi yet na go bek long Papa God.

Olsem na mi ting i gutpela pasin long nau yumi ken lukluk i go bek gen long wan wan kristen laip bilong yumi, insait long sios, hauslain, provins gavman na ol wanwan grup na mekim gut ol kristen wok bilong yumi.

Na putim i go long beten bilong yumi wan wan, tanim bel na tok sori long God. Orait na antap long dispela, yumi i ken painim stia tingting bilong God tru, long pinisim tru dispela hevi bilong yumi long Bogenvil wantaim helpim bilong God Triwan.

GLASIM LEWA
na
TINGTING

wantaim

Eddie
Saunders



Ol meri ting wanem? Ol famili na skul i mas skulim ol meri long rait

Dispela wik Wantok i bringim long yupela tingting bilong moa long 50 skul meri krismas bilong ol i stap namel long 13 na 25.

Olgeta wantaim i tok strong olsem ol meri i mas stat long save long rait bilong ol, taim ol i liklik meri yet. Na ol pikinini man tu i mas save. Wan wan famili i mas stat long lainim gutpela pasin bilong rispektim meri. Ol tok tu olsem planti ol meri long PNH i no save long rait bilong ol.

Dispela i daunim ol meri. Ol lain i kam long sosaiti we ol meri i bosim graun ating i gat rispekt long ol yangpela meri.

Klostu olsem 25 meri i skul long yunivesiti na kolis i tok: "mipela i no bin save long rait bilong mipela olsem meri inap taim mipela i kam skul long yunivesiti na kolis".

Ol i tok, ol i save liklik tasol long nesenel hai skul o taim ol i ridim niuspepa na ol buk we i promotim rait bilong ol meri na mama. Na ol dispela yunivesiti meri i tok: "dispela i kamap bikos ol yia bipo na bihain long independens ol meri i no kisim na winim skul na save long ol rait bilong ol". Na ol i no pait na mekim wok long tokaut long ol arapela long rait bilong ol.

Dispela pasin nau bai senis. Planti meri i tok: "Em wok bilong mipela ol save meri long mekim dispela wok bilong tokaut long ol meri long rait bilong mipela". Ol meri i

amamas tu long ol ogenais-esen olsem, PNG Council of Women, YWCA, Country Womens Association, Women in Politics, Professional and Business Womens Club, ol NGO, United Nations, na naut PNG Womens Entrepreneur Association i kamap na karim maus bilong ol meri, long wan wan eria bilong laip na developmen.

Tasol ol 25 skul meri Wantok i toktok wantaim, i skul long Praimeri skul, Vokesenel skul, na Hai skul i no klia long rait bilong ol olsem meri. Ol i stap longlong tasol na i go skul olsem pikinini.

Ol i laik bai ol tisa o papa-mama bilong ol i tisim ol long rait bilong ol meri. Sampela i save tasol long dispela het tok: 'Rait bilong ol meri' taim Wantok Nius i askim ol. Ol i amamas tru na i laik save moa.

Ol yangpela meri na pikinini i tok, ating i gutpela ol pikinini meri i mas save long rait bilong ol olsem meri, pikinini na manmeri insait long skul bilong famili pastaim.

Ol i laikim olsem ol skul i mas tisim dispela samting. Ol i tok tu olsem sapos dispela skul bilong rait bilong ol meri i stap long kalenda bilong skul, bai ol yangpela man tu bai stat long save long rait bilong ol meri na rispektim ol meri. Bikos long dispela, planti yangpela man long ol skul i no save rispektim ol meri. Tingting bilong ol man i paul.

Sir Julius i no klin yet

PRAIM Minista, Sir Julius Chan i no klin yet. Ol wok painimaut bilong Jastis Warwick Andrew i kamapim planti moa askim. Planti samting i no klin yet. Olsem na Sir Julius i noken giamanim ol pipel.

Planti askim i stap

Ripot bilong Jastis Andrew i tok olsem, nau i luk olsem ol lida i bin kamap long wok painimaut bilong em i no kamapim wanpela paul pasin.

Tasol Jastis Andrew i no tokaut sapos sampela bilong ol dispela samting inap kamap ples klia long bihaintaim. O sapos gavman i givim moa taim, bai Jastis Andrew inap long kliarim.

Tupela samting Jastis Andrew i gat tok long en. Nambawan em olsem Chris Haiveta i no mekim trupela tok tok long raun bilong em long Hong Kong na tu long tingting bilong gavman long salim ol hevi bilong Bogenvil Kpoa Limited i nambatu em olsem Jerry Singirok i bin save long olgeta toktok i bin kamap long kisim Sandline i kam insait long kantri.

Askim nau em olsem Jastis Andrew gavman bai mekim wanem nau long dispela toktok?

Mipela harim tu olsem gavman i no bin bhainim stretpela pasin long kisim mani long baim Sandline Intenesenol olsem wanem long dispela nau? Bai i gat kot o? Mi gat hevi bikos bikpela mani ol inap long yusim long stretim ol hevi bilong ol pipel i lus nating. Mi tok gen. Ol haus sik i sot long ol marasin. Ol pipel bilong Papua Niugini kisim taim. Ol skul i pas, bikos ol i nogat moni. Ol yangpela bilong Papua Niugini kisim taim. Ol lida bilong mipela i go spenim nating mani bilong kantri na i nogat tok o kot long en. I gat save i stap.

Mi gat bilip olsem, Ser Julius olsem Praim Minista bilong kantri i bin save long olgeta samting i kamap taim

gavman i kisim Sandline Intenesenol. Na em i givim tokorait bilong em. Olgeta hevi i kamap long kantri long 17 Mei, 1997 i kam inap long nau i stap long han bilong Ser Julius.

Long dispela wik mi bin stap long wanpela redio progrem i lukluk long "koropsen" long kantri. I gat bikpela tok nau olsem koropsen i bagarapim kantri. Lawrence Sause, wanpela tisa long Yunivesiti i tok olsem koropsen i kamap taim mipela i wokim ol samting em komyuniti i ting i no stret olsem pasin stil i kisim grisman, o pasin pamuk na planti moa.

Tasol bikpela tok bilong em i sut long ol politisen na ol pablik opis holdas bikos planti tok i kamap olsem i gat koropsen long wok bilong dispela lain. Ol dispela lain i wokim wok bilong ol long makim ol pipel bilong kantri. Olsem na wanem samting ol i mekim, ol i mas makim long kamapim gut, sindaun bilong ol pipel long kantri.

Tasol planti taim yumi lukim olsem, toktok na ol wok ol dispela lain i mekim i givim moa hevi long ol pipel. Olsem wanem bai mipela stretim ol dispela hevi? Sapos mipela lukim dispela pasin i kamap, mipela mas autim long ol arapela i bai luksave.

I gat lo givim tokorait long ol politisen na ol pablik opis holda long makim ol pipel. Tasol i nogat lo long stretim ol dispela lain sapos ol i no bihain tingting bilong ol pipel. Ol pipel i gat rait long makim ol memba i go long palamen. Tasol sapos dispela memba i no mekim gut wok long helpim ol pipel em i makim, ol pipel i nogat rot long rausim dispela memba inap long nupela ileksen.

Wankain tu long ol pablik gris holda na ol arapela sinia pablik sevans. Gavman yet i makim ol dis-



pela lain. Wik bilong ol, em long amamasim ol lain long gavman. Olsem na ol asples i save kisim taim long ol dispela tu.


Nau yet i gat ol lo i sapos long kotim ol dispela lain sapos ol i brukim. I gat Ombudsman Komisen long lukluk long wok bilong ol lida. Tasol yu no inap kamap long kot inap narapela i kotim yu. Sapos i nogat narapela i kotim yu, yu bai mekim yet dispela pasin na nogat sevis bai kamap.

Long sait bilong Ombudsmen Komisen, ol i sot long planti samting long mekim gut wok bilong ol. Ol i sot long woklain na mani. Na lo ol i wok aninit long en i no karamapim olgeta samting kabinet i makim husat i wok long hap. Olsem na long stretim koropsen i mas gat wanpela bodi we gavman o narapela lain i nogat kontrol long en. Dispela bodi i mas gat inap woklain na mani long makim wok bilong ol. Ol i mas gat rait long sekim gut olgeta samting. Na sapos i gat ol samting i no klin, ol i mas kliarim.

Wok bilong ol i mas karapim ol lida long gavman, long bisnis na long komyuniti tu. Planti lida bilong mipela i no makim gut ol pipel. Tasol lo i no tambuim dispela. Yumi mas kamapim wanpela rot we yumi kam mekim save long ol lida husat i no wokim gut wok bilong ol.



Ol meri na mama i mas kisim save long wok bilong lukautim famili na save long mekim ol arapela wok tu.



Namba wan hap

Soim Ol Liklik Wok Bisnis

LUKLUK MOA LONG OL LIKLIK BISNIS LONG PNG

LONG kisim moa save long wok bilong liklik bisnis insait long kantri bilong yumi, yu mas glasim ol bikipela wok em i mekim long ol wok bisnis, ol pipel na ol samting i stap raunim yumi long mekim bisnis.

1.1 HELPIM OL LIKLIK BISNIS I GIVIM

Olsem insait long ol bikipela na liklik kantri, ol liklik wok bisnis i save kamapim bikipela helpim tru long developmen bilong kantri na bihain taim tu. Hia em ol sampela bikipela helpim bilong em:

- Kamapim ol nupela eria bilong wok - ol liklik wok bisnis i save kamapim ol gutpela na isi wok long

olgeta famili memba na arapela tu. I no papa bilong bisnis tasol.

- Planti bikipela bisnis tude i bin stat bipo olsem liklik bisnis.

- Ol liklik bisnis i save yusim gut ol lokol risosis olsem, famili seivings, save bilong mekim wok na ol samting bilong yusim long wok.

- Liklik bisnis em bikipela samting long givim wok insait long provins.

- Liklik bisnis i helpim long givim planti wok moa na kantri i no lukluk tasol long wok bilong wanpela maining o ol arapela bikipela projek.

- Wankain tu, ol i helpim long muvim ol bisnis wok insait long taun i go long ol ples na provinsel level.

- Ol i ken helpim long stopim strong bilong mani (Kina) long i no ken go daun, we em inap kamapim ol samting long hia yet na kirapim eksport maket long ol kaikai na prodak bilong mipela.

- Ol liklik bisnis i rot bilong kirapim nupela samting na wokim kamap, we em inap kamapim gutpela na isi prodak na sevis long ol pipel bilong mipela.

1.2 OL LUKLUK BILONG KANTRI NA OL BISNIS WOK

Wantaim namba bilong ol pipel olsem 4.0 milion, biksiti Mosbi long

saut kos bilong kantri i gat mak olsem 150,000 manmeri. Arapela bikipela taun olsem Lae, Goroka, Hagen, Rabaul, Madang na Wewak.

Ol rekot na ripot bilong nau i soim olsem:

- klostu 75 pesen manmeri i gat strong long mekim ol bisnis wok.

- planti manmeri long dispela grup i stap long wok fama o pulim pis.

- liklik lain husat i ken mekim ol bisnis wok i stap long ol wok bilong pulim mani.

- Wok painimaut i soim long 1980 olsem, 32 pesen (%) ol bikipela manmeri bilong PNG i ken rit na rait.

- kirapim wok na ikonmik developmen insait long ol liklik wok bisnis i mas gat:

- a) trening na yumen risos developmen long apim level bilong save long mekim wok;

- b) opim moa rot na mekim isi long skelim ol samting;

- c) kisim ol lokol maket i kam klostu wantaim; na

- d) ol kain kain rot bilong mekim mani we i kamapim na pusim ol bisnis long kamap.

Arapela spesel samting long kantri bilong mipela.

- Olsem tok Inglis i bikipela toktok na tu long toktok bisnis, moa long 700 tokples em PNG i gat. Tok pisin em olgeta hap bilong PNG i save yusim na tok Motu em ol lain long sauten hap bilong PNG i save yusim.

- Kantri bilong mipela em oltaim i save ren na drai. Taim bilong drai i save pundaun namel long mun Mei na Novemba, tasol ples i save hot olgeta taim. Ples i stap longwe long solwara o hailans i save kol.

1.3 Ol pipel bilong PNG i stap long tupela hap eria. Gavman sait na entaprais o praivet sait. Entaprais sait i save makim ol lain bilong mekim wok na kisim profit. Praivet bisnis na pablik entaprais i ken bruk go daun long tupela sabsekta: fomol na infomol.

1.3.1 Fomol Sekta

Fomol sekta i lukluk long sait bilong ol gavman risosis insait long kisim takis. Em i stap moa insait long wok ikonmiks, kain olsem maket wok we i save kisim mani stret long wok na i makim olgeta industri sekta we nesene akaun i gat rekot long ol.

1.3.2 Infomol Sekta

Infomol sekta i karamapim bikipela eria bilong wok insait long Papua Niugini we i sut long ol wok

sabsistens o fama. Sabsisten krops o kaikai samting em ol samting olsem kopi, kokonas, kakao, pam oil, raba na ti.

Long bipo, planti plentesen yet i go pas long ol dispela wok prodaksen bilong ol, tasol long dispela taim nau i gat moa smol-holda prodaksen i kamap. Dispela senis i kamap bikos long ol rot bilong kisim mani long dinau o lon long Ruel Developmen Benk na arapela benk na produs maketing bod we i helpim long salim ol dispela kes krops.

i) Agro-Beis: Papua Niugini i sanap strong long wok agrikalsa we i gat planti samting bilong graun na i bikipela samting long ol industriel developmen olsem ol liklik prodak o samting we masin i no save wokim.

ii) Manufeksaring Sekta: Sais bilong dispela eria em i stap wankain yet long 1990 i kam na i olsem 9 pesen (%) bilong olgeta samting i go aut. Ol samting i wok isi isi i bihainim drop long ol askim na ol samting we gavman i save tromoi mani long ol.

iii) Mesa Industri Sekta: Bikipela groa insait long industri long sampela taim nau em maining bisnis, trenspotesen, stores na komyunikesen sekta.



Makim Gutpela na Trupela Lida

- **Votim man husat i ken bosim na lukautim gut nem bilong Papua Niugini.**

- **I noken votim kendidet husat givim yu moni o bilas nating. Sapos yu mekim olsem, yutupela wantaim i kamap birua bilong kantri.**

- **Votim ol lida husat gat i rispek long yu na kantri bilong yumi.**




• Noken ting olsem manki i sanap long graun nating, nogat. Mak yu lukim em na boi i sanap long en em mak long lek bilong wanpela bikpela animel bilong bipo bipo yet na em i bilong dainaso famili. Dispela we mak bilong em i kamap em ol i kolim long diplodocus. Mak long lek bilong dispela animol em ol i painim antap long wanpela bikpela laimston long Dorset, Ingran. Ol saveman i stadim mak ya na ol i painimaut olsem animol i bin stap laip long graun 140 milion krismas i go pinis. I kam inap long nau, dispela em bikpela long ol mak bilong ol dainaso we ol i painim long wol. Wanpela man husat i wok long kwari long Dorset i bin painim dispela lek mak bilong diplodocus. Em i painim tu ol arapela liklik lek mak bilong ol animol long hap.

• (Aninit lephan) **Biknem blakmeri singa bilong Amerika, Oprah Winfrey.** Long tude, em i kamap olsem wanpela top ris na bikmeri long Amerika. I luk olsem Oprah bai i kamap olsem namba wan bilionea blakmeri long Amerika. Tasol bipo long em i kamap wanpela singa na karim biknem, em i wanpela trangu husat i bungim hevi long kisim ol strongpela marasin (drags) tasol hatwok bilong em na em i kamap wanpela topmeri nau. Oprah em i bes pren bilong wol. Em i susa bilong olgeta lain, em i kwina na mak bilong ol samting i gutpela na nogut long Amerika. Bikos long ekspiriens bilong em, em i bin statim wanpela welfea faundesen long Chicago, Amerika long helpim ol trangu famili, stat long 1994.



• Nupela Praim Minista bilong Ingran, Tony Blair wantaim ol meri MP o palamen memba. Leba pati long Ingran i gat rekot namba bilong ol meri MP wantaim 101 mak. Nupela kabinet i kamapim histri taim em i wokim disisen long ol wanwok long kabinet i edresim ol bikman long fes nem bilong ol na i no olsem Mista. Tok piksa em ol bikman olsem praim minista, husat bai ol i kolim em tasol olsem Tony.



• Kantri Ingran i laik sevim ol pisin ol i kolim long "Bittern" bikos i nogat planti bilong ol i stap nau long Ingran. Ol man bittern pisin i save wokim buming singaut (booming call) na long singaut bilong ol, ol man i ken painim ol. I bin gat planti ol dispela pisin inap long 1950's taim ol pipel i wokim wanpela pai ol i kolim long bittern pie na ol i kilim ol pisin



• Drag opisa Vu Xuan Troung i sanap long ai bilong kot long Hanoi, Vietnam. Planti hundred pipel bilong Vietnam i bin pulapim Hanoi kotrum long las wik long harim kot we i harim pasin bilong karim ol drags o ol strongpela marasin nogut i go aut long kantri. Sampela long ol dispela man i fesim kot em ol plis, kastom opisa na sekyuriti opisa. Ol i stap long saspek long stap insait long wok bilong haitim na karim ol drag i go aut long kantri. Sampela ol biknem man long kantri bai i sanap long ai bilong kot, ol ripot i tok.

LAPSTAIL



■ Kanage raun go lukim Mosbi So. Feveret bilong em long go sindaun na lukim ol ben i pilai laiv long steij. Em sindaun namel stret na lukluk i stap na ol boi Wali bilong Wali Hits long Madang i go antap long gren sten na pilai. Kanage lukim na em kalap singaut nogut tru na mekimsave long danis long musik bilong Wali Hits. Long dispela taim ol manki nabaut i winim ol kondom olsem balun na tromoi i go antap. Kanage kilim skin long danis i stap na win i kisim wanpela kondom balun ya i kam stret long em. Man Kanage ting olsem balun na em kalap i go antap na holim na danis danis wantaim i stap. Ol manmeri lukim na lap indai nogut tru tasol boi nogut i no wari. Bikos em ting balun tru olsem na em kisim. Tasol husat save, nogut em save tasol em i gat tingting long yusim bihain, olsem na em kalap na kisim.

Kanage Spai Mosbi

■ Kanage lukim musik i go moa yet na Saugas ben i kam na pilai. Nau Saugas i pilaim wanpela song ol i kolim 'wai na yu beks long mi'. Kanage harim na em sanap gen wantaim kondom balun bilong em na danis. Em danis i go na lukim stret eks gel pren bilong em i sanap long sait na harim musik. Kanage danis i go singsing tu bihainim Saugas. Nau em danis na holim kondom balun ya na poinim long eks gelpren bilong em na singim, 'wai na yu beks long mi'. Gelpren bilong Kanage belhat nogut na bikmaus long em, "mi beks long yu bikos olgeta taim yu raun, ol dispela gumi yu holim ya i save pulap long poket taim yu raun nating. Yu mas wanpela paul tru ya. Kanage kisim bikipela sem tru long ai bilong ol manmeri.

Kanage Bikbro Mosbi

■ Kanage wantaim sampela wanwok i kisim wanpela Subaru ka bilong wanwok na go painim 6 peks long las Sarere nait. Ol draiv i go olsem Mobil Stesin long kisim petrol na painimaut olsem wanpela taia i flet. Tasol taia bilong ka i flat. Ol kam aut na painim aninit long ka tasol i nogat spea taia i stap. Mekim na ol ting spea taia i stap long haus. Ol salim wanpela bilong ol i go kamap long haus. Papa bilong Subaru kalap long ka na ol go bek long Mobil Sevis Stesin. Taim ol i kamap, isi tasol em go opim dua bilong ka. Na opim bonet bilong ka, na soim spea taia long ol wanwok. Ol wanwok i lukim na bel kaskas olgeta. Bikos long moa long tupela aua, ol ting i nogat spea taia. Na sanap wetim wanpela ka long helpim ol i go kisim spea taia long haus.

Papa Kanage MOSBI

Lukim moa tok pilai long pes 16

Olpela ELC-PNG misineri go bek long asples Amerika

WANPELA olpela misineri bilong Amerika Dokta Pol Senff na meri bilong em Marie Senff i lusim pinis Evangelikal Luteran Sios bilong PNG na igo bek long asples bihain long mekim planti yia wok gutnius.

PASTO TOXCEY NAMOK i raitim

Dr. Rev Pol Gerhard, 65 krismas na Marie Senff, 52 krismas, i bin kamap long Papua Niugini long yia 1964. Tupela i bin lusim asples bilong tupela insait long Amerika bihain long Pol i pinisim skul bilong em long Seminari.

Pastaim long Pol na Marie Senff i kam long PNG, tupela i mekim wok olsem pasto pinis insait long kantri bilong ol. Tingting i sanap strong yet olsem tupela i kam long hia, bihain long Pol i pilim orait long wanpela sik i bungim em long bodi. Dr. Pol Senff i prea planti long laik bilong God i ken kamap ples klia kwik long em i mas go long PNG.

Rev. Dr Paul na Marie Senff, bin kamap namba wan taim na sindaun long Raipingka Seket long Kainantu distrik wantaim Misineri Rev. Johannes Hans Flierl. Em i kisim save long laip, sindaun na pasin bilong ol manmeri insait long Kainantu eria. Bihain misineri Johannes Hans Flierl i lusim PNG na go bek gen long Jemeni, tupela i kisim ples bilong ol.

Dr. Pol em i pikinini bilong wanpela Luteran pasto long Teksas, Amerika. Em i gat tripela pikinini meri na 6-pela tumbuna.

Namba wan pikinini meri Tanya, nau i stap long Afrika wantaim man bilong em Rev. Mayer David, husat em i wanpela tisa long wanpela seminari. Namba tu pikinini meri Miriam na famili nau i stap insait long Australia. Namba tri pikinini meri Grace na famili ol i stap long Amerika.

Tok bilong Pol na Marie insait long ELC-PNG i stap long Goroka distrik olsem Seket Misineri, pasto. Dr. Pol Senff tu i wok olsem dairekta bilong Skruim Save Opis, administreta na tisa bilong seminari. Wok bilong Skurim save Opis na tisa long Olgelbeng seminari i helpim Pol oltaim long helpim ol pasto na evangelis long save na tingting long strongim dispela sios bilong Kraist.

Tupela i bin bungim planti hevi na amamas bilong kamap soldia bilong bikipela bilong yumi insait long dispela sios bilong yumi. Sampela taim Pol na Marie i save bungim hevi

bilong ol raskol pasin i laik daunim tru wok bilong tupela. Tasol tupela oltaim i save sanap strong long bilip long papa God.

Dispela i kirapim tru bel na tingting bilong em long i gat wok na nid long bringim ol dispela yangpela man i ken lusim rot nogut i kam insait long banis bilong Jisas Kraist. Olsem wok kaunseling (wok sambai) ol lo na oda hevi insait long kantri.

Wanpela hap tingting Dr. Pol i save kisim strong long en em long singaut bilong em long autim gutnius long olgeta hap

God husat i bin wokim olgeta samting long graun. Pasin bilong bosim, lukautim na givim bek glori na samting long God.

Mista Gotthold Rometach na meri bilong em Leena i tok olsem, "em i hat tru long painim wanpela kain man olsem Pol. Dr. Pol em i man tru bilong olgeta manmeri na pikinini, sumatin na tisa long kainkain hevi bilong ol em i save karim. Em i man tru bilong ol manmeri husat i givim bikipela taim tru long ol.

Inap olsem 33 krismas, Pol na Marie Senff i lusim laip

Rev. Umba Bomai long wok sios oltaim i mas sanap long mak bilong "wok poroman". Ol ovasis wokman na meri i mas sut na tingim "pasin wokporoman" i mas stap long tingting.

Long namba 19-pela greduesen bilong Luteran Seminari, Olgelbeng, Mt. Hagen, Dr. Pol i autim tok long manmeri na greduats olsem, "Sos igat bikipela nid na sot long wokman long autim gutnius. Wokman Trening wantaim ol seminari igat dispela wok long kamapim ol nupela wokmanmeri long gaden bilong papa God". Het tok bilong dispela greduesen em i sanap olsem, "Papa salim mi na mi kam, olem tasol mi salim yuela na igo." (Jon 20:21b).

Prinsipol Rev. Bomai itok olsem, "Pol em i wanpela strongpela wokman husat i save givim bal tru long wok bilong em. Wok eksperiens na save bilong em i helpim tru long ol tisa na ol sumatin insait long seminari".

Dr. Rev. Pol Senff i mekim planti toktok long Luteran Sios insait long sios. ELC-PNG i mas lukave long strong bilong ol yangpela bilong helpim groim dispela sios. Lukluk bilong sios i mas stap long ol nid na sot bilong gutnius inait long ol kongrigesen, seket, distrik na bai dispela i ken helpim dispela sios long bihain taim tu.

Taim Dr. Pol Senff i laik lusim PNG, em i soim nara-pela tingting tu olsem em wantaim meri bilong em Marie i gat bikipela laik long kam bek gen long PNG na wok gen olem voluntia insait long ELC-PNG. Tingting bilong em long kam bek hia, em long helpim raitim sampela komentero o buk long buk bilong Timoti na kaunseling (Wok Sambai).

Prinsipol, Rev. Bomai i strongim tingting bilong Dr. Pol Senff na i tok olsem, "Ovasis pasto na tisa i gat gutpela save long helpim kamapim ol kain buk o material olsem komentri long helpim nid na sot bilong Wokman Trening dipatmen na sios i ken kam na mekim olsem".

Tasol long kam bek bilong Dr. Pol na Marie Snff olem voluntia em istap long han bilong Nesanel Sios Kausil i ken pasim wanem tingting na singautim Avangelikal Luteran Sios insait long Amerika (ELCA) long tupela i ken kam bek o nogat. Nau yet Dr. Pol i bin i gat bikipela hevi na amamas wantaim na lusim PNG.

Taim tupela i go pinis long asples, bai tupela i mekim wok pasto na i no longtaim liklik bai pinisim wok (lusim wok) na sindaun long asples.



• Rev Paul na meri bilong em Marie. Foto: Ulrike Sauerbier.

graun. Namel long manmeri bilong dispela taim husat ol yet inap helpim arapela long wok-misin. Pasin bilong bikipela bilong yumi Jisas Kraist i bin soim yumi long kam daun long dispela graun na dai long diwai kros bilong kisim bek yumi (Matyu 18:11-14).

Dr. Pol i save laikim long bosim gut ol envaironmen bilong em olsem ol graun, diwai, wara na ol animol. Dispela ol samting God i givim manmeri olsem blesing long helpim sindaun na laip bilong ol i ken stap na kamap gutpela. Long dispela rot, ol inap givim tok tenkyu i go long papa

bilong tupela long wok gutnius insait long dispela sios ELC-PNG. Pasin bilong karim diwai kros, tupela i soim long planti pasto, evangelis, tisa na ol kristen manmeri.

Dr. Rev Pol Senff i bin pinisim skul bilong em long Luther Notwesten Theolojikol Seminari, Minesota insait long Amerika long 1989 wantaim dispela mak bilong dokta digri bilong ministri (D Min). Bihain tasol Pol i kisim singaut long mekim wok tisa long Olgelbeng Seminari, Mt. Hagen.

Insait long Seminari, Dr. Pol i save helpim tru prinsipol,

Buakap, gutpela ples bilong malolo long Salamaua

PLANTI manmeri long tude i gat save long nem bilong planti provins na ol liklik ples insait long kantri. Wanpela bikpela askim em ol dispela lain i bin krungutim ol dispela ples pinis o harim nem na toktok tasol.

TONY LUKE i raitim

Mi wanpela bilong ol lain husat i save long nem bilong planti liklik ples insait long Morobe provins. Tasol lek bilong mi i no krungutim ol dispela ples yet.

Buakap em wanpela naispela liklik ples long Salamaua eria bilong Morobe em planti taim mi save harim stori long en. Tasol mi no bin lukim dispela ples inap wanpela wiken dispela sans i kamap.

Long go long Buakap, em bai kisim olsem wanpela aua long ron long spit bot. Tasol sapos solwara i slip sore o bot i kisim planti pasindia, em bai kisim moa long wanpela aua. Pe bilong baim spit bot em K5 tasol long wanwan pasindia.

Sapos yu sanap long Voko Poin long Lae na givim beksait long Lae Yot Klab na lukluk i go long solwara, bai yu lukim ples Buakap. Tasol ples i no klia tumas. Buakap i stap long not daireksen.

Long Kwins betde long Jun 1987, wanpela meri, nem bilong em Supora Ewing i bin askim mi long go wantaim em na lukim dispela naispela ples ol i toktok long en. Meri ya gat planti pikinini man na meri wantaim ol tumbuna. Na mi save kolim em 'Abung', we long tokples Buakap i min olsem lapun mama.

Abung save stori long mi long Haus Kibung na Salamaua Poin we mi mas lukim. Bikos dispela em tupela bikpela samting we save pulim planti waitman na meri pikinini i go long Buakap. Long wanem em i gutpela hap bilong kisim win na malolo, kisim poto na tu holim piknik o pati.

Long namba wan de bilong mun Janueri long dispela yia, driman bilong mi i karim kaikai. Wanpela de Nu Yia tonamen i bin kamap long Buakap long dispela taim. Tupela bikpela pilai long dispela tonamen em soka na volibal.

Kwikitaim mi bungim tupela susa, Alice na Esther (tupela tumbuna meri bilong Abung) na mipela wkabaut i go kamap long Voko Poin long kisim bot. Planti manmeri tu i wet long Voko Poin i stap long kisim bot. Mipela wet i go inap 10 klok na wanpela bot i kam insait.

bikpela pis i kalap lusim solwara long 4-pela sait bilong bot. Ol pis ya soim bodi bilong ol. Na tu ol i mekim ol kainkain solwara disko o danis.

Sem taim tu ol sap nus pisin bilong solwara i flai antap na kisim was tasol long nekim ol bikpela pis ya. Mipela ol pasindia bilong bot i stap isi tasol na lukluk long mipela yet.

Bipo mipela i kamap long Buakap, kepten bilong bot i tanim bot i go kamap long wanpela liklik ples ol i kolim Wamasu. Na mipela lusim 4-pela pasindia long hap.

Bihain mipela stat ron isi isi nau i go long Buakap. Mi ting olsem ensin bilong bot i bagarap. Tasol kepten i lukim planti timba i drip long solwara i kam. Olsem na em i ron isi long abrusim ol timba ya.

Sapos yu bilong Sepik Wara, bai yu ting ol pukpuk i swim i kam long pait olsem mi tingim. Tasol nogat ya.

Mipela ron isi i go na sua long liklik brus bilong Buakap. Na kisim ol kago na go long haus bilong kandre bilong tupela susa bilong mi. Bihain mipela bihainim ol mangi i go na kamap lukim tupela tim, Alubalup na Eagles i mekimsave long pilai soka i stap. Ol meri tu i mekimsave long pilai volibal long hapsait.

Ol lain long Lae siti i kam joinim ol lain long ples long ol pilai ya. na ol i amamas tru.

Ol pipel i pinis na ol pipel i go long wanwan haus bilong ol. Long nait ol manmeri mekim paia na kukim kaikai. Na tu laitim kerosin o coleman lam long givim lait. Mun tu i kam antap na ples i klia tru. Mekim na mipela i no laik slip hariap. Mipela kaikai pinis na bungim sampela boi, na go sindaun stori long bris bilong ol bot i sua long en.

Long bikmoning, san i kam antap na ol

pinis i singsing long amamasim nupela de. Ol pikinini i kirap na mekim nabaut nois long go waswas long wara.

Mi dring ti pinis na sampela yangpela man kam kisim mi, na mipela go lukluk raun long nambis long ples. Wanpela ful de mi lukim planti bikpela diwai, gaden, ol pelpa masin gan bilong Japan long Wol Woa 2, na ol kolwara we i kam aut long graun bilong waswas na kukim kaikai.

Wara Bubung em i kol nogut tru. Sapos yu waswas o pundaun i go daun long dispela wara, bai yu les long lusim wara ya. Bai yu laik waswas i go inap apinun.

Bihain mipela raun i go long nambis, kisim kanu na pul i go ausait long solwara. Mipela go sua long ol rif. Na kalap i go daun na waswas.

Long apinun mipela go bek long wanwan haus. Famili mi stap wantaim ol i kukim bikpela kaikai stret. Olsem na mi pulapim bel wantaim-pis, saksak na taro. Na bihain mi go slip.

Taro em i nambawan kaikai bilong ol Buakap pipel, na planti arapela ples long Morobe provins.


Tulait i bruk gen na em namba 3 de nau bilong mun Janueri we mi mas go bek long Lae.

Mi redi long kalap long bot. Na ol lain mi stap wantaim kisim sampela kulau kokonas i kam long mi dring long bot. Mi sekanim ol na bot i lusim bris.

Long namel bilong solwara mi tingim, watpo tru na mi no laik go klostu na lukim dispela Haus Kibung. Mi lukim planti arapela samting tasol Haus Kibung em mi no lukim.

Mi tingting tasol na tok, em i orait Buakap, bai mi kam bek gen ya. Yu stap yet long tingting bilong mi.

Moning yet na san tu i lait gut tru. Win i no strong tumas na solwara i slip gut tru. Na mipela k 3 3alap long bot. Namel long solwara ol




Mama karim pikinini bilong em na mekim save stret long danis long amamasim nupela yia. Raitan: Utula Samana, olpela memba bilong Morobe i kempen raun long bipo insait long ol nambis long Morobe provins.

QUALITY MEDICINE - PROFESSIONAL CARE


CHEMCARE PHARMACIES PTY LTD

20% Off




Q&Q Watches Ladies & Gents

20% Off




Kodak Cameras

K 4.99



Kodak Film 24exp 100ASA

K 1.99



Bic Disp. Razors

K 2.99



989 Baby Oil 125ml 989 Baby Powder 100g

K 1.89

K 1.99



Macleans Toothpaste 90g/110g Macleans Toothbrushes

K 2.75

K 5.25



Veet Cream 100g

K 5.85



Stayfree Spirit

99[†]



Heinz Baby Food

We really care at Chemcare

- | | | | | | | | |
|-------------------------------|-----------------|--------------------|----------------|----------------|------------------|-----------------|----------------|
| ERIKU & MOROBE PHARMACIES LAE | ALOTAU PHARMACY | HIGHLANDS PHARMACY | KIMBE PHARMACY | MELPA PHARMACY | CLARKES' CHEMIST | MADANG PHARMACY | WEWAK PHARMACY |
| | ALOTAU | GOROKA | KIMBE | MT.HAGEN | KOKOPO | MADANG | WEWAK |



Bik Bro

REBO



SIPAK MAIK



Young Gillis kirapim das long Mosbi So

JAMES KILA i raitim

PLANTI ol manmeri husat i save skin kirap long harim musik na stail bilong Tumbuna Trak i bin lukim na skelim pinis stail bilong ol "Tarito" bilong Manam Ailan taim Young Gillis i pilai las wiken insait long Mosbi So.

"Tarito" long tokples Manam em brata, na long so ol lain bilong Young Gillis i soim stret stail bilong ol. Planti manmeri i kalap na sakim skin stret taim ol bagaros ya i pilai.

Ol i soim tru olsem musik bilong ol i gat kik taim ol i pairapim wanpela song, planti ol lain bilong bipo, sapos ol i harim i ken tingim yet. Dispela song em "Manam i Paia".

Ol lapun i ken tingim yet dispela song bikos long gut-taim bilong ol i gat sampela i save singim. Song ya i go olsem, "Manam i paia, kisim ol samting, yumi ronowei."

Young Gillis i bin kam long Mosbi wantaim ol narapela grup bilong Tumbuna Trak olsem Wali Hits, Ziros, Yangkiss, Demas Saul, Mogoi na ol narapela musik enjinia bilong Madang.

Wantok Niuspepa i bin tok-tok wantaim lid-singa bilong Young Gillis, Charlie Sila bipo long ol i pilai.

Em i tok olsem Young Gillis i bin stat long 1990. Long dispela taim ol i gat 6-pela memba na ol i save pilai nabaut long ol pati long ol skul-pati long Manam Ailan long ol ples olsem Bieng, Tabele, Zogari na tu long Bogia stesin. Nau yet ol memba bilong ben em Charlie Sila, James Moarupu,

Peter Mariambe, Mathew Gale na Keni Aung.

Ol i bin kamap wantaim dispela nem "Young Gillis" bikos planti memba bilong ben i yangpela yet.

Dispela nem "Gillis" em sot nem bilong wanpela ples-masalai ol i kolim "Gilia" klostu long ples bilong ol Zogari.

Charlie i stori olsem i gat wanpela masalai man nem bilong em "Zoromota Gaugai" i save stap. Sapos ol lain long ples Zogari i laik go painim abus ol i save go na singaut i go na kisim strong long dispela ples-masalai bipo long ol i go painim ol abus nabaut.


Long 1992, ol dispela lain brata bilong Manam i soim tru olsem stringben stail bilong ol tu i gat kik ya. Dispela em bihain long ol i winim fes-prais long Madang Festival.

Bihain long win bilong ol long dispela festival, ol lain bilong Kalang i bin katim wanpela kaset bilong ol. Dispela em stringben stail stret, tasol i gat kik tu ya. Bihain olgeta memba i strongim tingting olsem ol bai katim kaset na dispela i bringim ol i go long Madang taun na rekot wantaim Tumbuna Trak.

Ol i bin stat long rekotim kaset bilong ol long 1996 wantaim enjinia Maniot Okole.

Dispela kaset i gat planti ol gutpela song we i ken bringim bek tingting long ol lain Manam i stap nabaut long PNG.

Charlie i tok ol i dediketim dispela kaset i go long olgeta pipel bilong Manam na ol manmeri bilong PNG.



• Charles Sila singa bilong Young Gillis.

Moa nupela Rohani kam long PNG

OL POP Rohani kaset bilong Irian Jaya i wok long painim gutpela maket tru long PNG.

Long tokples Bahasa Indonesia, Rohani i min olsem "Gospel" o toktok bilong Jisas long Baibel we i kamap long Song. Ol lain brata susa bilong yumi long narapela sait long boda long Irian Jaya i save bihainim stret nek bilong ol lain Maranatha Singers bilong USA taim ol i mekim ol kaset bilong ol.

Wanpela man husat i save go pas long promotim kaset bilong Irian Jaya long Papua Niugini em John Chew.

Mista Chew i tok olsem em i save amamas long harim "Terima Kasih tuhan" we i min olsem Tenkyu Jisas, we ol lain 'Gloria Trio 60 menit Non-stop Bersatt Teduh' i save singim.

Narapela song em "Syukur" mining bilong en Givim

tenkyu long Jisas, i stap tu long dispela kaset i gutpela tru long harim na i gat gutpela ol Kristen mining stret.

Mista Chew i tok olgeta gospel o Rohani song em i gat gutpela mining long laip, maski ol i stap long Inglis, Japanis o Korea.

Preis na wosip kaset bilong Maranatha Singers i bikpela tru long PNG, olsem na taim ol dispela kaset bilong ol Irian Jaya i kam long hia, ol i gat moa swit-pela mining tru.

I gat planti ol gutpela singsing bilong ol liklik pikinini we i stat long Kids Praise o "Lagu Anak-Anak." Dispela em Baibel stori tu we sapos ol liklik pikinini i harim bai i ken kisim gutpela ol skul. Em i stori long laip bilong Jisas taim em i stap mangi yet long dispela graun.



• Mista Chew wantaim ol wokman meri bilong em.

Mista Chew i tok i gat moa gutpela musik olsem dispela bilong wanpela top singa meri, Herlin Pirena.


Insait long wanpela album bilong em "Nyanyikanlah Kidung Baru" i gat planti ol gutpela na switpela song.

Wanpela em "Setiamu, Tuhanku tiada bertara" we mining bilong en em gutpela em laip bilong ol lain husat i

bilip long Krai. Dispela kaset i kam long T.o Chrisholm (1866-1960).

Narapela song em "Tiap Langkahku" we i min olsem wan wan lek-mak mi bihainim.


Olgeta ol dispela gutpela kaset i stap nau long Keystone Traders Pty Ltd, P O BOX 7908, Boroko. Yu ken telefon long 3236618 or feks long 3236648.



TOP

20

This Week!



L/W	T/W	SONG	ARTIST
1	1	LULU	QUAKES
2	2	MANU AFAI HIMENE	LAURENT DEGACHE
6	3	ACTING YANG	WALI HITS
3	4	IA LYNETTE	LEONARD KANIA
8	5	AI DAUE	WALI HIT
4	6	DESI	TELEK
7	7	ANGEL MANGAS	JUNIOR KOPEX
5	8	KAKAUL	KANAI PINERI
10	9	MERI WALI	WALI HITS
11	10	KULUNGI	JUNIOR KOPEX
9	11	KEPOKO	TARIKANA
14	12	AZZIMBAH	AZZIMBAH
12	13	RI USHIWA	NODEAK
16	14	SHERRY	S. SEREVI
13	15	MELBOURNE CITY	G. TELEK
15	16	LAMBADA RAGGAE	DAVID ANDREW
0	17	TAMATA	QUAKES
0	18	OPERESSEN RAUSIM	K PINERI
18	19	MANAM ISLAND	QUAKES
19	20	NA KUM BIO	MANDARAH SOULS



PNG FM PTY LTD
Trading as
NAUFM and YUMI FM

P.O. Box 774,
Port Moresby
Papua New Guinea
Ph: (675) 320 1996
Fax: (675) 320 1995

KANAGE



■ Kanage wantaim wanpela UPNG studen i go insait long Pres Klab long Mosbi. Sekyuriti i laik sekim tupela, na wanpela Pres komiti i stap insait i tokim sekuriti olsem Kanage em i Pres memba. Taim ol stap insait long klab, yuni studen i askim Kanage: Hamas yu baim long kamap memba? Na Kanage i bekim: Tripela yia i go pinis mi bin baim K25 taim klab i stat. Nau em ating mi mas laip memba ya. Olgeta manmeri i lap insait stret long Kanage.

□ Kanage i bilong Iaita long Maprik, Is Sepik provins. Wanpela de em laik go long wara, tasol narapela kain tingting i kisim em, na em bilas gut tru. Em supim long longpela trausis, putim longpela han siot wantaim su na wokabaut i go long wara. Em wokabaut i go long wara na lukim wanpela yangpela meri karim ol plet na wokabaut i go tu long wasim. Meri ya i lukim Kanage, na em seksek stret long stail bilong Kanage. Kwiktaim meri ya i kisim strong bilong tumbuna bilong em na tokim Kanage olsem em i laik toktok wantaim Kanage. Sem taim meri ya i askim long nem bilong Kanage. Na Kanage i kirap na tokim meri ya olsem: My name is seksek, bikos yu seksek long mi na mi putim dispela nem. Kanage grisim meri ya i stap na ol brata bilong meri i kamap. Kanage lukim olsem na brukim wara wantaim longpela trausis na su.

Waxs Boi WEWAK

□ Kanage wantaim sampela wanwok na poroman i kalap long ka na go painim 6 peks long taka sop bilong Mama Monica long Godens. Taim ol i tanim long go insait long taka sop, ol lukim wanpela yangpela meri i kam ausait long taka sop na wokabaut i go bek olsem long Godens Plis Bareks. Long beksait ol lukim meri ya i luk nais tru. Kwiktaim ol tanim ka na givim i go long Godens plis bareks na ron isi isi i kam bek. Ol ron isi isi i kam na op saita tromoi het i go ausait na laik tok pisin wantaim meri ya. Sampela seken bihain em tromoi het i go insait long ka na tokim draiva long tekov kwik. Em nau, olgeta i luksave olsem em i no meri, em wanpla geli geli man ya. Man ol sem pipia stret.


Papa Kanage MOSBI

TOKSAVE::

Sapos yu laik raitim Kanage na salim i kam, salim long dispela adres:

WANTOK NIUSPELA
P. O. BOX 1982,
BOROKO,
NATIONAL
CAPITAL DISTRICT

Kuka na anis i gutpela poroman long bipo



LONG bipo tru i gat tupela gutpela pren tru i stap. Wanpela em anis na narapela em kuka. Tupela pren ya i save bung wantaim long wokim ol samting na serim ol kaikai na olgeta kain kain samting tupela i gat. Wanpela de, kuka i tokim poro bilong em anis olsem. Mitupela i save serim olgeta kain kain samting i go i kam na mitupela i stap olsem tupela gutpela brata tru. Mi no lukim wanpela samting i krangki long mitupela na mi ting mipela i save amamas olgeta taim.

Kuka ya i tok, olsem na mi gat wanpela gutpela tingting long tokim yu. Sapos yu wanbel, orait bai mitupela i bihainim. Sapos yu no laik, orait bai mitupela i ken lusim na dispela tingting.

Nau em tokim poro bilong em olsem, mi laikim bai mitupela i

mas raun i go long sampela hap ples na lukim ol wanem kain ples i stap long dispela graun. Mitupela i stap tasol long wanpela na yumi i no lukim ol kain kain senis, ol ples, wara, maunten na ol yangpela meri bilong narapela ples. Olsem na mitupela i mas go na lukim ol dispela samting.

Em nau anis i wanbel long dispela aidia olsem na tupela pasim tok long go wanpela taim. Tupela mekim gut plen na stat long redim ol kaikai na ol samting bilong kisim wantaim na i go long dispela wokabaut bilong tupela.

Long bikmoning yet, taim anis i wok long slip yet, kuka i kamap pinis wantaim ol kago bilong em na slip long dua bilong anis i stap. Anis i slip gut tru na taim em i kirap opim dua, em lukim kuka i slip na pas long

dua i stap. Em nau anis i kirapim pren bilong em kuka na tupela kukim kaikai na kaikaj pinis, orait tupela stat long wokabaut.

Tupela wokabaut i go i go na brukim bikipela wara, go antap long maunten, go insait long bikipela bikbus na mekim save long go yet. Taim tupela i wokabaut i go, bai tupela i sanap na lukim ol nupela samting olsem pisin o arapela samting tupela i no save lukim long bipo. Kuka i bin mekim planti mawsara tu long planti kain kain samting we anis inap lukim na laikim.

Taim tupela wokabaut i go, tupela kamap long as bilong wanpela bikipela diwai kapiak. Em nau tupela i go sindaun na kisim win na malolo. Tupela rausim ol kaikai bilong tupela na mekimsave long kaikai i stap. Tupela kaikai i go na kol



win i mekim na ai bilong tupela i slip olsem na tupela stat long kilim skin long slip. Tupela slip i go na win i ron na i karim ol lip bilong kapiak na lip bilong kapiak i wok long sel long antap i kam daun.

Tupela bikman ya i slip i go na ai bilong tupela i op na tupela i kirap. Taim tupela kirap, ai bilong tupela i op nogut tru long lukim ol lip bilong kapiak i wel long antap na win i karim ol na ol flai gut tru i kam daun na i go pundaun.

Man ai bilong kuka na anis i op nogut tru na tupela mekim-save long lap indai. Bikos tupela i no save lukim dispela samting long bipo. Tupela lap lap i go na i no stop liklik. Tupela wok long lap yet na tupela i go sotwin nogut tru. Moa lip bilong kapiak i wok long kam daun yet na tupela i wok long lap i go i go olgeta strong bilong tupela i pinis na tupela i go malumalum olgeta.

Long dispela taim, anis i slek i go liklik tru olsem na nau yu ken lukim anis em liklik samting tru. Kuka bai yu lukim olsem em i gat spet i stap long sait maus bilong em. Bikos long dispela taim, em lap lap i go na spet i no isi long kapsait long maus bilong em.

Na tu kuka i save stap long hul bilong ston o arere long wara, em i mas kam antap sampela taim long painim gut-pren bilong em anis.

Mi wari tru long planti pipel smokim spak brus



Dia Laiplain,

Mi wari tru long planti smok nogut mariwana insait long kantri bilong yumi. Na tu long planti pipel husat i wok long yusim mariwana.

Orait, mi laik save long ol bagarap we mariwana i kamapim long bodi bilong man taim ol i kism. Mi laik save long dispela samting bikos mi laik tok klia i go long ol pipel na ol i ken save wanem samting i ken kamap long ol sapos ol i go het long kisim mariwana.

POISON WEED

Dia Pren,

Tenkyu long askim bilong yu na laik bilong yu long save moa long mariwana na wanem samting em i ken kamapim long man. Mariwana em ol i save kolim tu long hemp o kanabis. Toktok bilong mariwana em i bikipela samting we i pulim intres na laik bilong planti pipel long glasim na skelim.

Mariwana i save gro long bus bilong sampela nap long kantri long longpela

taim, moa yet long hailens rijon. Mipela i no klia olsem long hap ol i save smukim mariwana olsem wanem tasol mipela i bilip mariwana i stap pinis insait long hailens rijon long planti handred yia pinis. I gat bikipela intres long glasim-na skelim mariwana bikos long planti hap bilong wol tude, planti pipel i laikim tru long yusim (mariwana).

Em i klia tu olsem planti mariwana i wok long lusim PNG i go aut long ol ausait kantri maski lo i tambuim. Em i tambu tru long ol man i gat mariwana wantaim ol. Kot i sasim na salim planti lain pinis i go long kalabus bilong gat mariwana wantaim ol.

Namba wan samting we yu ken mekim em long tokim ol pren bilong yu long mariwana na wanem ol samting em i kamapim taim man i kisim. Tokim ol olsem sapos plis i painim man wantaim mariwana, ol bai i kisim em i go long kot na sapos ol i painim em i, asua em bai i go long kalabus.

Em i egensim lo bilong yusim mariwana bikos em i gat marasin nogut long en. Dispela marasin nogut em wanpela kemikol we taim i go long kru bilong man i save kamapim bagarapim (kru). Long sampela ovasis kantri sampela pipel i wok long traim hat tru long mekim lo i oraitim ol man long smokim mariwana. Ol dispela pipel i wok long skelim olsem mariwana em i olsem strongpela dring o tobako bikos dispela kemikol long mariwana em i stap tu long strongpela dring na tobako.

Plantu save man long sait bilong marasin i wanbel long dispela tasol lo i tambuim yet. Dispela em bikos planti taim ol manmeri husat i smokim mariwana bai i go het na yusim ol arapela moa strongpela drag o marasin. Em ol drag olsem opium, hero-

in na kokein. Ol dispela strongpela marasin i bagarapim ol man na kilim dai ol.

Wanpela as long planti pipel i wok long laikim mao mariwana em ol i kisim moa mani long en taim ol i salim ausait long kantri. Na taim ol manmeri i stat long kisim mariwana, ol bai i laikim moa yet na dispela pasin bilong kisim em bai i pas long blut bilong oi. Mekim na dispela pasin i hat long stapim, wankain tasol olsem ol man i kisim strongpela dring we ol i laikim moa na i hat long stapim.

Long planti yia nau yumi lukim ripot long ol niuspepa we ol i groim na salim mariwana long ol kantri long Esia olsem Tailen na Kolombia long saut Amerika. Ol dispela kantri i save mekim planti mani long salim ol drag ya tasol i gat planti raskol pasin, sik na dai i kamap long ol dispela kantri tu.

PNG em wanpela long ol kantri long wol we i groim mariwana na em i gutpela moa we planti ovasis pipel i laikim. Bikos long dispela bai yumi harim moa toktok long mariwana long kantri.

I moabeta yu tokim ol poroman bilong yu ol infomesen long mariwana na ol arapela strongpela drag we mipela i givim yu long en. Na wonim ol long noken yusim ol. Man i ken go long kalabus sapos ol atoriti i holim ol painim ol olsem ol i gat mariwana wantaim ol. Sapos man i stat long yusim mariwana em bai i bungim bikipela hevi bihain long helt bilong em na em i ken painim dai long en.

Mipela i ting bai yu helpim long stapim ol poroman bilong yu long noken yusim mariwana na ol arapela strongpela drag.

Laiplain

Pamuk pasin i paia long ilekesen taim

Dia Edita, MI lukim wanpela pasin long ai bilong mi na i no stret na mi laik autim. Nau long 1997 ileksen, pamuk pasin i paia tru long kempen taim. Mi manki Simbu long Gembogl distrik. Mi lukim dispela pasin long hap bilong mi i no stret. Wanpela haus lain i kirap na go long kofi nait, o singsing long haus bilong wanpela kendidet. Mi lukim ol lain i go long dispela haus i mekim pasin pamuk i go inap tulait. Mi askim wanpela meri husat i go mekim dispela pasin na em i tok: "Sapos yu tok nogat, wanpela vot bilong yu i lus nau." Long dispela as ol meri tok orait tasol long pamuk. Ol dispela pasin em ol marit meri ol i gat planti pikinini i wokim. God bai

ting wanem long dispela pasin ol marit meri i wokim? Long dispela as God bai i no amamas long 1997 ileksen. Long dispela pasin tasol God i bagarapim Sodom na Gomora. Ol manmeri bilong 1997 nogut yu bringim belhat bilong God i kam klostu? Tingting gut na wokim pamuk. God i no save amamas long dispela kain kempein. God i no laik man i baim vot long haus holi bilong em. Dispela haus holi em bodi bilong yumi. Long Goroka tu wankain pasin i pulap tu. Kempen long "kofai nait" wantaim pamuk pasin. N Siwi Goroka

Maski bagarapim nem bilong Muruks tim

Dia Edita MI wanpela mangi husat i save sapotim tru SP Inta Siti kap tim Mendi Muruks. Tasol mi laik bekim sampela toktok we i bin kamap long Wantok Niuspepa long Me 22, 1997. Ol bikman bilong Spia Kundiawa worias i bin tok olsem, 1996 SP Inta Siti kap em Worias inap long winim tasol ol sapotas bilong ol i kirapim pait, na ol i lus. Wanpela long ol i go pas long toktok em, siaman bilong bod, Joseph Mek Teine.

Na mi laik bekim toktok bilong em olsem, brata ating yu bikman tasol yu mas paul ya? Yu mas go long Kundiawa haus sik na bai ol dokta bai sekim yu laka? Brata, Muruks i no save givim sans. Na mi laik tokim tu yupela ol pablik olsem, ol sapotas bilong Worias i longlong na kirapim pait. Ol i save olsem i no taim yet tasol referi i winim wisol bipo long ful taim. Olsem na ol i kirapim pait. Bikos Muruks i stap wantaim bikpela poin olsem 22 na Worias

long 9 poin tasol. Na Worias bai abrusim Muruks long 10 minit tasol. Klostu bai fainol wisol, olsem na ol sapota bilong Worias i statim pait. Yupela mas tok stret laka? No ken tanim tanim na giamna. Mi laik tokim yupela stret Muruks em sampion. Maski Kumul pleia Ben Bire. Kam smelim han bilong Muruks. Mark Leo Mosa Trading Kimbe

Maski kempen long lotu

Dia Edita MI wanpela man long ples long Morobe Patrol Pos. Mi kam raun long Lae siti na mi lukim sampela kendidet ol raun long olgeta haus lotu long Lae siti na kempen insait long ol haus lotu taim lotu i pinis. Na ol kristen ol i kisim trupela tok bilong God pinis na ol kendidet i go na bagarapim gutpela tingting na mekim doti long haus holi bilong God. Na tu, ol putim posta bilong ol long geit bilong haus lotu na haus bilong ol pasto wantaim. Narapela samting mi lukim em ol i raitim ol baibel ves long sampela hap laplap na ol i hangamapim i stap long sampela rot long Lae siti. Mi man bilong ples na taim mi lukim dispela kain pasin i kamap mi no amamas long lukim ol kendidet. Na tu, ol giaman promis long ai bilong ol pipol. Ol bai i no inap i kam bek long bihainim wanem promis ol i mekim long ai bilong ol kristen na ai bilong God. Olsem ol pipol bilong Lae siti na ol kristen, lukluk gut na skelime em wanem kain man. Bisnis man o man nating? Skelim gut pastaim na votim ol. No gut em kisim biknem na bihain em bai sapotim na strongim sait bilong ol bisnis bilong em na lusim tingting long yumi.

Makim kristen man long Yangoru-Sausia sit

Dia Edita, MI wanpela mangi Yangoru. Tasol nau mi stap long sampela hap long dispela kantri. Yes mi laik sapotim pas bilong brata ya Togias Wara Sauve i kamap long Me 1, 1997. Em i tok ol pipel bilong Yangoru-Sausia i mas votim wanpela man long ples. Yes mi laik toktok stret long ol pipel bilong Yangoru Sausia. Yupela mas votim wanpela gutpela kristen man we em bai lukluk long yupela. Votim man we em i save long wokim bris, wokim rot, wokim haus sik, na man husat bai bringim sevis long komyuniti bilong yumi. Tingting ol 5-pela yia yupela i bin stap olsem ol tumbuna bilong yupela. Olsem na nau em i taim bilong yupela long lukluk gut na votim gutpela kristen man, man i pret long God.

Lus tingting long olupela kendidet. Sapos yupela i no lukluk gut na votim ol man tumora bai em raun long wanpela ekspensiv ka na lus tingting long yupela. Yupela votim kristen man na em bai lukluk long ol wari bilong yupela. Votim man we as tingting bilong em long sanap long Yangoru Sausia ilektoret em bilong bringim sevis long yupela. Na dispela man i mas i gat Kristen lidasip na i pret long God; Em i mas gutpela na strongpela tingting long stretim hevi long Bogenvil; Lukluk long ol hevi long Haus sik na skul fi na Stretim ol infrastraksa sevis i stap nau. Jacob Fixe Spy POM

Ol meri noken salim bodi long baim vot

Dia Edita MI lukim wanpela kain pasin insait long Gembogl distrik long Simbu province i no stret. Ol meri i save salim bodi bilong ol long baim vot bilong brata bilong ol long dispela 1997 ileksen. Mi stap long Lae na ol man i kam long ples i tokim mi long dispela pasin na mi no bilip. Tasol long pinis bilong wanpela wik, mi go long ples, na mi go daun long ples bilong wanpela kendidet, na tru tumas ol meri i kam na gritim mipela na mi baim buai na givim. Na long nait ol meri i kisim mipela na tokim mipela long raun kisim win. Ol i stat long toktok long politik na sem taim ol i askim mi: "Yu laik votim husat? Sapos yu givim vot long ????? bilong mipela mi

bai givim bodi bilong mi long yu." Na mi tokim em, "mi ken givim vot long yupela tasol mi no inap slip wantaim yu." Tupela poro bilong mi tu i slip wantaim ol narapela meri, wantaim sem stori. Bihain long tulait mipela lukim ol dispela meri, ol i marit na pikinini bilong ol tu i bikpela pinis. Ol meri wokim dispela kain pasin long bodi bilong ol i no stret. Salim bodi long kisim vote em i no stret long lo bilong God. Bodi em haus holi bilong God, na ol meri i mekim dispela kain pasin i no stret. Na tu ol i no porot long man bilong ol. Mi painim aut tu olsem ol dispela meri man bilong ol i wok stap long narapela hap. Jim Amos Morobe

Zizira Demo Morobe Patrol Post Lae

Maski tok bilas

Dia Edita MI laik bekim pas bilong Rokus Katikdu Mathew bilong Wosera. Mathew i tok olsem ol mangi buki save jeles long ol yangpela meri buki. Brata mi ken tokim yu stret mipela ol mangi buki i no olsem yupela ol Wosera na i save jeles long ol meri bilong yupela na kisim naip na ronim ol mangi Buki. Brata, ating yu mas askim laik long wanpela resa bilong Buki tasol em i no gat laik long yu na yu rait long Wantok niuspepa long bagarapim nem bilong Buki. Brata yu

tok mipela ol buki save bihainim ol meri Buki olsem ol dok. Brata mipela ol mangi Buki i no save mekim dispela kain pasin. Yupela ol mangi Wosera save bihainim ol meri Wosera olsem ol lang. Tingting gut pastaim na rait long Niuspepa. Yu laik agensim yu rait long Wantok Niuspepa bai mipela lukim. Mangi Buki Kimbe

Noken les long vot

Dia Edita MI wanpela mangi bilong ples tasol mi save laik tru long ridim Wantok Niuspepa. Planti taim tru mi save baim Wantok niuspepa na mi save ridim na lukim ol gutpela nius bilong planti samting na nau mi laik traim raitim wanpela pas tu. Dispela toktok bilong mi i go long olgeta pipol bilong Wes Niu Briten olsem, taim yupela i sapotim wanpela kendidet, plis no ken traim na askim em long baim X o vot bilong yupela pastaim. Sapos yupela i mekim olsem nogut bihain bai yupela votim em. Dispela pasin bai i bringim yupela long votim dispela man nating na bai kantri bilong yumi bai i go nogut. Na narapela toktok bilong mi tu i go long yupela olgeta pipol i olsem Papua Niugini em i kantri bilong yumi. Yumi olgeta mas vot long dispela ileksen bikos dispela em i salens bilong yumi long bringim bek gutpela sindaun na hamamas bilong bihain taim. Sapos yu wanpela man o meri yu no vot long dispela ileksen, yu dispela man o meri bai namba wan man o meri long komplek sapos kantri i bagarap bihain long dispela ileksen. Nau em i salens bilong yumi olgeta wan wan long lukluk gut na tromoi vot bilong yumi i go long rait man na kristen man o meri.

No ken simuk mariwana

Dia Edita MI stap long Aitape distrik na mi lukim long ai bilong mi lukim planti manki long Aitape i raun nating na ol pikinini bilong ol wokman tu i save smukim mariwana long ai bilong mi. Mi bilip pasin ol dispela manki i mekim em i no stret. Ol i no ken smukim mariwana long ai bilong ol meri pikinini. Pasin bilong smukim mariwana i mekim tingting bilong yumi i go longlong na yumi save wokim kankain bikhet na raskol pasin. Olsem na long dispela as ol ami long Aitape i askim ol plisman bilong Aitape yusim wanpela plis dok long Aitape insait long ol setelmen bilong painim smuk mariwana. Mi bilip dispela kain pasin i bagarapim sindaun bilong yumi long Aitape. Olsem na mi askim ol man husat i save smuk mariwana long stopim dispela kain pasii. Joel Misan Aitape.

Kusai tasol long mekim wok


Dia Edita MI wanpela mangi Kabum insait long Morobe provins. Mi laik autim bel hevi bilong mi i go long ol raiot skwat plisman long Lae. Pasin ol riot skwat bilong Lae i bin mekim long mipela long Wasu stesin long Krismas em mi no wanbel. Ol i sekim ol bek bilong mipela nating na kisim planti ol gutpela samting bilong mipela. Ol i paitm nating mipela nabaut na kisim sampela gutpela samting bilong mipela tu. Sapos yu ting long mekim wok bilong yu stret orait yu mas sanap antap long dispela wok na mekim na no ken kusai tasol o bilasim nating yunifom bilong gavman long skin bilong yu na mekim wok. Sapos yupela i ting long mekim wok tru i go long ol bikpela stesin olsem Lae na Mosbi orait mekim gut wok na noken kusai nambaut long ol liklik stesin olsem Wasu stesin na ol arapela liklik stesin long kantri. Matin Wakore, Kimbe



Gutpela marit i givim gutpela laip

Dia Edita, LONG Papua Niugini na long wol, yumi save lukim na harem olsem planti long ol marit i save igat hevi na proplem. Sampela marit is save painim dispela hevi o proplem bihain long 10-15 pela pikuin kaim hevi we i save kamap long ol marit, taim ol kristen felosip mama i hevum wanpela kibung long sarere wik ipo pinis. Ol i tok, dispela hevi na brukim marit pasin em i wanpela samting we i mekim ol man meri go bagarap na famili i bruk nabaut nabaut. Olsem as tingting bilong dispela hevi, ol manmeri i hevum ol dispela kain proplem na gutpela rot bilong bihainim tok bilong God na gutpela rot bilong bihainim tok bilong God na kristen pasin o bilio i bagarap na ol man meri i kamap wel enimol na lus tingting long ol kristen pasin. Mathias Male

Tok moa olsem, yumi marit mas sindaun wantaim na glasim gut lojn wanem ol kain rot i save kamapim dispela ol hevi long marit. Sapos yumi sindaun wantaim na glasim gut em bai orait. Ol dispela kain hevi tu isave kamap lojn planti ol kistem famili tu na i bagarapim rileisen-sip namel long 300 na ol, olsem na dispela em ino gutpela tumas, ol i tok. Ol felosip mama is tok moa olsem, ol i mas lukluk na glasim gut ol sdampel rot olsem; man i laik maritim narapela meri, o meri laik maritim narapela man, man i spak tumas na i no lukautim ol famili, tupela marit ino trastim wanpela narapela o kain hevi olsem, tupela nogat pikinini na dispela ol kain rot ol marit mas sindaun na glasim gut na prea em i wanpela gutpela rot taim ol i hevi dispela kain hevi. Ol mama i askim ol kristen brata susa long prei na askim God bai em i ken halivim ol lain husait i hevum dispela kain hevi long Kantri.



JAMES KOND

KENDIDET BILONG WESTEN HAILANS REGINOL SIA

1. SOTPEJA STORI BILONG JAMES KOND

Mama i karim James Kond long de 11 bilong mun Mas long, 1962 long Kokop peles klostu long Mt. Hagen, insait long Westen Hailands Provins. James Kond i wanpela memba bilong Luteran Sios na em i maritim Maria na tupela i gat foapela pikinini.

Long skul, James Kond i go mak long Hailans Didiman Koles. Bihain long dispela em i wok long DPI inap long faipela yia. Em i kirapim bisinis long 1987 long givim sevis long ol man na meri long peles. em i bin wok strong long kamapim ol liklik bisnis long ol peles ikam inap nau.

James Kond em i wanpela lida man long ples tu, we em i save wokim olgeta gutpela kain pasin bilong ples. Samplea bilong ol samtin em i save wokim em i olsem: em i gat ples singsing bilong em yet, em i save planim suga na banana na pasim tu, em i save kilim pik na givim long ol lain wanpelin bilong em, na em i save igo long hauskraik taim ol man o meri i dai na tem is ave givim kaikai long ol lain husat i bin lusim wantok bilong ol. Pikinini man bilong James i save lukim dispela pasin, olsem na pasin tumbuna i stap stornj yet.

Ol pipol beilong Kiu Konstituensi i bin makim James Kond long makim ol insait long Provinsal palamen long 1995 ikam inap taim Nesenal Gavman i mekim ol wok bilong reform long Provinsal na Lokal level Gavman. Long sotpela taim em i stap olsem mausman bilong ol Kui Konstituensi, ol i bin makim em olsem wanpela Provinsal Minister.

Olgeta dispela samting long antap i soim olsem James Kond i fit long karim hevi bilong Westen Hailands, igo long Nesenal palamen, maski sapos em ino gat bikpela skul. em i wanpela kristen man, em i stap gut wantaim femili bilong em, na em i save gut na bihainim ol gutpela pasin tumbuna, em i lukautim gut liklik bisinis bilong em na em i save istap wantaim ol pipol. Long dispela as, em i save long olgeta hevi dispela kantri i gat long nau.

2. PAPUA NIUGINI LONG INO LONGTAIM IGO PINIS

Ino long taim igo pinis wanpela bikpela win i bagarapim papua Niugini na ol man meri bilong kantri i stap longlong nambaut. Kepten bilong sip wantaim ol wokman bilong em i lusim ol pipol na igo long ol provins nambaut. Ol i soim olsem ol i no fit long lukautim dispela kantri.

Taim i kamap nau long dispela kepten wantaim ol wokman bilong em long givim rot igo long nupela kepten. Wanem samting i bikpela, em long dispela kantri long makim ol nupela lida husat igat nupela tingting long bringim senis ikam long wok bisnis na gutpela sindaun bilong ol pipol. Na tu, dispela kantri i ken kamaut long dispela bikpela wari nau istap yet.

Yupela ol pipol man soim pasin bilong tru demkrasi long dispela ikeksen na makim ol rait lida long makim maus bilong yupela long Nesenal Palamen.

Mi laikim vot bilong yu bikos mi save stap wantaim yu, wok wantaim yu na karim ol kainkain hevi wantaim yu. Mi save harim kraik bilong ol man, meri na tu ol pikinini bilong Westen Hailans Provins na ol narapela hap bilong dispela kantri long ol kainkain reform na hevi ol olupela Gavman i save karim ikam.

Bilong wanem na ol pipol bilong dispela Provins na Papua Niugini i kraik?

Bilong wanem na mipela i save painim rot taimdispela kantri i gat planti risos?

Bilong wanem na ino gat rot i go long Port Moresby?

Bilong wanem na planti ol lain i mas wokabout moa long 20km long kisim PMV?

Bilong wanem na ol man, meri na pikinini husat ino gat planti samting i baim bikpela pei tumas long ol haus sik?

Namel long olgeta dispela samting em kantri igat bikpela nid long ol gutpela lida long ronim dispela yangpela kantri. Dispela sip bai igo ananit long wara sapos olupela kepten na ol wokman bilong em i stap yet.

Long givim yu pisa long ol kain lida i bin ronim dispela kantri, mi bai toktok long ol samting i kamap namel long 1992-1994.

2.1. BAJET BILONG NESENL GAVMAN

Dispela taim mak long 1992 i impoten bikos ol samting bilong wok ikonmik, paul pasin na brukdaun long lo na oda i stat long dispela taim. Long 1992, Nesenol Gavman i yusim moa moni i winim bajet bilong em yet. Gavman i yusim olsem K231 milion moa long bajet long dispela taim. Long 1993, Gavman i yusim moa long K273 milion antap long bajet bilong en. Dispela tu i wanpela rekot. Long 1994, igat moa long K257 milion antap long bajet Gavman i bin yusim.

2.2. NESENL BAJET NA MAK BILONG OL DINAU

Olgeta taim Gavman i abrusim bajet bilong em, em i mas kisim moni long sampel rot long stretim dispela moni i sot. I gat tupela rot istap: Wanpela long insait long kantri yet long ol Benk, na narapela long autsait long kantri long ol Benk o al narapela kampani bilong moni. Namel long 1991 igo long 1994, Nesenol Gavman i kisim dinau inap long K657 milion insait long Papua Niugini na K390 milion long autsait. Olgeta dinau bung wantaim long pinis bilong 1994 i bin sanap olsem K2920 milion.

Long dispela taim tu, kantri i bin lukim bikpela senis i kamap long ol mine insait long kantri. Ol takis Gavman i bin kisim i K597 namel long 1992 na 1995. Wanem samting i kamap long dispela moni? Long pinis bilong 1994, dispela akaunt long Sentral Benk we al i save putim moni i kam long ol mineral i bin igat K190 milion tasol. Dispela i min olsem Gavman long dispela taim i bin yusim K407 milion. Long dispela taim tu, olgeta benk insait long kantri ino givim planti dinau igo long ol bisnis na ol man o meri bikos ol i bin givim bikpela dinau igo long Gavman we ol inap long kisim bek isi tru.

2.3. GAVMAN I YUSIM MONI OLSEM WANEM?

Namel long 1992 na 1994, Nesenal Gavman i yusim olsem K5.60 long olgeta K100 long mekim ol kain kain wok long rot na bris, skul na haus sik na ol dispela kain wok. Dispela i minim olsem K94.40 long olgeta K100 i bin igo long ol kain rol olsem ovasis wokabaut bilong ol minista, ol gutpela kain kar na kainkain pei igo long ol minista long wokim ol liklik kingdom bilong ol yet taim kantri na olgeta man na meri i kisim taim na istap isi.

Taim Gavman i wokim dispela kain pasin, em ino inap long givim ol liklik sevis igo long ol pipol. Dispela ol sevis em olsem helt, edukesin, wok long lo na oda na ol kainkain progrem long halivim ol yut long halivim ol yet.

2.4. HEVI LONG SENISIM MONI WANTAIM OL ARAPELA KANTRI

Dispela bikpela wei Gavman wok long yusim moni i kamapim bikpela hevi long 1994 we Papua Niugini igat ol resev long autsait bilong wanpela mun tasol. Dispela i minim olsem Papua Niugini i brukdaun pinis na i benkrapt na em ino inap long baim ol samting na sevis long ovasis. Dispela i minim olsem yumi tupela ino inap long baim ol tin pis o mit ol i wokim long Australia bikos kantri ino gat moni long baim ol dispela samting.

Olsem ol planti sitisen bilong dispela kantri, mi tu i bin pilim pen long 1994 taim prais bilong ol samting long ol stua igo antap moa long 7.8% long Desemba 1994 na igo antap gen long 17.3% long 1995. Prais bilong olgeta samting i go antap moa olsem 25.1% namel long 1994 na 1995. Long dispela taim Gavman ino gat wanpela rot, olsem na ol i daunim strong bilong kina igo daun long mak bilong 90 toea long September 1994 na bihain ol i surukim igo daun moa long 70 toea.

2.5. OL PATI ISTAP LONG PAWA LONG 1992 - 1994

Tupela pati husat i bin istap long pawa long 1992 - 1994 em People's Democratic Movement wantaim People's Progress Party. Ol i bin wokim planti disison i rong tru na ol i bagarapim kantri. Isi samting ol dispela man inap long wokim em long resain long Palamen long kisim gutpela nem, tasol ol ino wokim dispela.

Ol i karim dispela kantri igo long America, long Hedkota bilong International Monetary Fund na Wold Benk, na kraik long dispela tupela autsait lain long givim kainkain disison na strongpela tok long Papua Niugini. Olsem na kantri bilong yumi i luk olsem ol longlong tru long ai bilong ol narapela kantri. Dispela kain pasin bilong PDM na PPP long ronim kantri em i wankain long man i kisim susu long wanpela gutpela kau igo inap susu i pinis. Tasol taim susu i pinis, ol ino sori long kau na karim igo long haus sik long stretim em, nogat, ol i traim long kilim dispela kau.

Yupela i ting olsem wanem? Dispela kantri igat nid long ol dispela kain lida?

3. POLISI BILONG MI

Bai mi i brukim Westen Hailans Provins igo long thirty (30) zone o distrik. Bai igat wanwan Distrik Menesa. Ol dispela thirly districk, bai kamap Ekonomik Districk na tu bai lukautim ol narapela wok na ol Polisi wantaim ol Districk Menesa na ol wokman bilong em. Ol narapela wok bai lukluk long Ekonomik, Edukesin, Helt, Wok Lotu na ol arapela Sosal Polisi.

3.1. EKONOMIK POLISI

Bihain long moa long twenty (20) yia bilong Independens na wantim olgeta gutpela natural resos we planti risos we planti ol narapela kantri save driman tasol long en, Papua Niugini i stap yet

ADVERTISEMENT

olsem wanpela lus kantri stret. Dispela em bilong wanem ol olupela Gavman i bin wokim ol rong disisen long ol dispela risos olsem na ol papa bilong ol risos na graun, na tu kantri i nogat benefit.

Ol dispela toktok ikam bihain long hia, em ol Polisi bilong me bilong kirapim Westen Hailans:

(A) DISTRIK DEVELOPMEN KOPORESEN

Olgeta wanwan bilong ol thirty (30) distrik bai igat wanwan Developmen Koporesen na ol pipol insait long wanwan distrik bai kamap papa long ol dispela koporesen bihain long ol i baim sia.

Ol dispela Developmen Koporesen bai i wok strong long ol kainkain bisnis insait long Westen Hailans Provins. Sampela long ol kain bisnis em long Downstream processing. Dispela Polisi em i long skelim olget risos bilong Provins wantaim olgeta pipol insait long Provins.

(B) LIKLIK BISNIS

Mi bai givim sens long olgeta Westen Hailans man na meri long kirapim ol liklik bisnis inap long kirap ol nupela wok, wokim moni long baim skul fi na tu long mekim sindaun bilong ol man na meri long ples i moa isi.

Olgeta bisnis we Investment Promotion Authority i pasim bilong ol Papua Niugini tasol bai istap wantaim ol pipol bilong mipela tasol.

(C) PLENTESIN

Ol papa bilong graun mas kamap papa bilong bisnis long graun bilong ol yet. Olsem na olgeta plentesin we papa bilong ol i bilong autsait mas givim sia long ol papa bilong graun.

(D) BIKPELA BISNIS

Olgeta bikpela bisnis ikam insait long Westen Hailans mas karim planti moni kam insait long provins bilong yumi. Tu, ol dispela bikpela kampani mas fit insait long ol dispela kain pasin bisnis hia: Ol i mas kamapim resis namel long ol kamapni istap pinis, ol mas wokim nupela kain bisnis, ol i mas karim planti kapital olsem masin, moni na save ikam, ol i mas kirapim planti nupela wok, ol i mas kirapim bisnis long ol nupela ples olsem Lumusa o Mt. Au, ol i mas kirapim ol nupela wok long infrastaksa developmen, ol i mas kain wok we ol pipol bilong Provins yet bai ino inap long wokim na ol i mas wok we Investment Promotion Authority i tok orait long en.

(E) KREDIT GRANTI SKIM

Mi save olsem ol Papua Niugini grasrut i save painim hatpela taim tru long kisim dinau long ol Benk. Mi bai traim long mekim rol i isi long ol grasrut long kisim liklik dinau long ol benk long kirapim nupela liklik bisnis, long lukautim pik na kakaruk na ol narapela laivstok. Olgeta dispela bai halivim ol pipol long kamap "Self Reliant" na kam aninit long Liklik Bisnis Polisi bilong mi.

Gavman mas givim garanti long ol liklik bisnis. Mi yet, mi bai putim moni igo insait long Rural Developmen Benk bilong ol grasrut long kisim dinau long en.

3.2 EDUKESIN

Edukesin em i ki long olgeta developmen long Westen Hailans na tu Papua Niugini. Olsem na mi bai traim long wokim ol dispela samting olsem:

(A) NUPELA SKUL

Mipela mas wokim ol nupela skul na givim sens long olgeta pikinini bilong yumi long kisim nupela save na tingting. Dispela em i rait bilong ol.

(B) STRETIM OL OLPELA SKUL

Wan wan skul, maski ol Praimeri o High Skul, bai mipela i mas upgradim na wokim long kisim Grade 7 na 8 sapos ol i praimer skul na Grade 11 na 12 sapos ol i hai skul.

(C) OL VOKESINOL SENTA

Mipela mas stretim olgeta olupela Vokesinol Senta na givim save long ol yangpela man na meri husat i laik kisim save long wok long ol teknikal fild. Mipela

mas wokim ol nupela vokesinol senta tu long kisim ol skul drop aut.

(D) SKUL SABSIDI

Ol Nesenal Gavman long bifo i bin toktok strong long givim fri edukesin long ol pikinini bilong yumi, tasol kantri i nogat moni long mekim dispela tingting i kamap tru. Dispela tingting tu i mekim ol pipol i kamap les na ol i wet tasol long fri samting. Polisi bilong me em long al papa mama long baim haf skul fi. Long olgeta K100, Gavman inap long baim K75 na ol papa mama yet i ken baim K25.

(E) TRAINING SKUL NA YUNIVESITI

Mipela mas promotim na developim ol bikpela training skul olsem na ol pikinini bilong yumi i ken kisim gutpela training long mekim wok long kirapim kantri. Ol tisa long ol dispela bikpela skul i mas kisim gutpela skul tu long skulim ol pikinini gut.

Gavman mas yusim ol saveman na meri long ol Yuniversiti long kantri long painim ol isi rot bilong kirapim kantri. Gavman mas yusim save bilong ol Yuniversiti long mekim sindaun bilong kantri i gutpela. Mipela ino ken kisim planti wokman tumas long ol autsait kantri.

(F) GIVIM TRAINING LONG OL TISA

Sapos yumi laik mekim olgeta dispela samting long antap i kamap tru, orait, yumi mas hamamasim ol tisa na mekim sindaun bilong ol i isi na gutpela.

(G) STRETIM SINDAUN BILONG OL TISA

Sapos yumi laik mekim ol tisa i skulim ol pikinini bilong yumi gut, yumi mas stretim sindaun bilong ol long wokim gutpela haus na givim hadsip moni long ol tisa husat i stap long longwe ples.

(H) YUNIVESAL EDUKESIN

Taim olgeta samting insait long Edukesin Polisi bilong mi i karim kaikai, olgeta pikinini long Papua Niugini bai kisim sens long go long skul inap long prep igo long high skul.

3.3 HELT

Helt wantaim Edukesin i mas wok wantaim. Wanem ples em i gat ol pipol husat igat gutpela edukesin, na ol istap gut, dispela ples i save stap gut tu. God yet i givim rait long laik, olsem na olgeta man meri na pikinini i mas kisim fri marasin na servis bilong ol dokta nating o wantaim liklik pei tasol.

Long dispela as, mipela mas wokim moa helt senta na klinik na stretim tu ol olupela helt senta na klinik. Olgeta man meri na pikinini mas kisim dispela bikpela servis. Gavman mas wok wantaim ol Sios na ol narapela lain.

3.4 ROT NA BRIS

Sapos yumi laik skelim ol samting bilong Provins wantaim olgeta sistisen gut, mipela mas givim gutpela sens long ol man na meri long kisim skel bilong ol. Long mekim dispela i kamap tru, mipela mas stretim ol olupela rot na bris na tu wokim rot igo long ol ples we i nogat rot na bris long nau.

Dispela bai mekim isi long ol pipol bilong ples long kam long taun long salim ol kaikai bilong ol isi tru, na tu long ol pipol bilong taun long igo long ol ples long baim ol samting.

3.5 OL MERI NA YUT

Insait long wanwan ples, ol meri i makim hap bilong olgeta man na meri insait long dispela ples. Wantim ol yut (15-25 yia), ol meri na yut i kamap olsem 75 insait long wan handret pipol. Long dispela as, em i gutpela sapos yumi i skelim ol risos bilong Provins na ol meri na yut i ken kisim skel bilong ol gut.

Long dispela as, mi igat bikpela tingting long mekim rot i isi we ol meri na yut i ken wok wantaim ol narapela member bilong Provins long kirapim ol kainkain wok bisnis, lotu na gutpela sindaun insait long Provins na kantri tu.

3.6 LOTU

Nesenal Konstituson bilong kantri i luksave long lotu Kristen olsem lotu tru bilong Papua Niugini. Ol Kristen lotu i bin bringim kamap bikpela development long bifo long skul, helt na gutpela sindaun. Long dispela as, em i gutpela sapos Gavman i ken luksave long hatwok bilong ol Sios na givim moa halpim long ol.

Wok bilong ol Sios em ino long stretim spirit bilong man tasol, em i long stretim gutpela sindaun long graun tu. Olsem na mi bai traim hat long givim wanem kain halivim mi inap long givim long ol Kristen Sios insait long Kantri.

3.7 PILAI

Ol man na meri husat i stap gut na ino gat sik i ken wokim planti wok. Pilai em i wanpela rot bilong mekim ol pipol i strong na fit long wokim wok, olsem na mi bai stretim rot long givim olgeta man an meri kainkain pilai we ol i ken hamamas na istap fit na helti long body na tingting tu.

3.8 WOK DIDIMAN, FORESTRI NA OL RISOS BILONG WARA

Papua Niugini em i wanpela kantri we long dispela taim, igat planti natural risos i stap gut yet. Dispela ol risos i olsem ol samting long wok didiman, forestri na ol samting bilong solwara.

Ol gold na kopa long ol main bai pinis, tasol ol samting olsem wok didiman, forestri na ol samting long solwara bai istap long longpela taim tru sapos mipela i yusim ol gut. Westen Hailans ino gat gold o kopa na gas na wel olsem ol narapela Provins, olsem na mipela mas tingting gut long lukautim ol samting mipela igat long nau long givim sens long ol pikinini bilong yumi long bihain taim.

Ol samting we kantri yet i ken kamapim, olsem kau mit, pik na sipsip, yumi mas promotim gut, olsem na mipela i mas stopim ol rabis olsem lambflaps ikam long ovasis. Dispela bai kirapim nupela sens bilong ol wokman. Long stretim rot bilong dispela, yumi bai statim nupela Nesenal kampani we mipela yet i ken karim ol samting bilong ovasis ikam insait long kantri na salim ol samting mipela i kamapim igo long ovasis. Dispela bai rausim ol namel man nambaut.

3.9 LO NA ODA

Lo na oda mas stat long wanwan haus, olsem na mipela i mas promotim long haus na long ol wanwan liklik ples. Ol pis ofisa na viles kot megistret i mas kisim pawa long stretim ol liklik asua i kamap long ples. Ol yut tu mas igat respek long ol lo man long wanwan ples. Long givim strong long dispela lo man, mipela i mas stretim sindaun bilong ol.

3.10 OL NESEPOL ASUA

Bogenvil asua i bin istap klostu long tenpela yia, olsem na mipela bai lukluk long stretim dispela hevi insait long dispela Palamen.

Tu, igat sampela wari i kamap long Mt. Kare we ol papa bilong graun ibin ino gat pe bihain long tenpela yia. Dispela tu bai mipela mas lukluk gut long en.

James Kond i sanap long:

- * GUTPELA, HONES NA GAVMAN LONG BUNG WANTAIM NA;
- * GUTPELA STREPELA ROT BILONG SINDAUN BILONG OL PIPOL LONG WOK BISNIS, POLITIK NA LOTU.

ASKIM LONG KAM LONG RELI

Mipela i askim ol memba bilong pablik na ol narapela Kendidet bilong Westen Hailans Riginol Sia long kam long las reli bilong James Kond long Fraide, 13 June, 1997 long Pope John Paul Oval stat long 2.00 P.M. long apinun.

Authorised by Hon. Paul Pora, MBE, Member for Hagen and Leader of National Party




A • Nelly wantaim bal painim ol wan pilaia bilong em. University i bin nekim ol Guria 4-2.

B • I.C Fund University soka tim bilong ol meri. Nau yet ol meri IC Fund University i stap namba tri long PMSA soka resis. Poto: Watson Gabana.

C • Bipo long PNG skwat lusim kantri, Beltek i bin givim ol 'T siot long ol. (L-R) Willie Bera, Harrison Kamake, Gidix Nasa na Peter Paliwa. (SANAP) Tim menesa Philip Parkop na tupela bikman bilong Beltek, John Pora Schandt na David Bell. Poto: Ivan Bayagau.

D • Anda 10 salens namel long Ted Diro na Korobosea. Poto: Harry Kombega.

E • Kosa bilong PNG soka tim Rachard Nagai raitim nem bilong ol pilaia bilong em.





• Anda 19 tim bilong I.C Fund University wantaim nupela yunifom bilong ol. Ol i bin lus long Sobou 1-0 long Mosbi soka resis long las wiken. Foto: Watson Gabana.

Rapatona bungim hevi long han bilong Guria

TUPELA midfil pilaia na golpela bilong Rapatona Mosbi i stap long PNG skwat long Nu Silan nau. Olsem na dispela i mekim na tim bilong ol Rapatona i bungim bikipela hevi tru las wiken taim ol yangpela blut bilong Guria i nilim ol stret wantaim 2-0 skoa long fultaim.

Rapatona i lusim stret sevis bilong PNG kepten Geoffery Emang, Willie Bera na Paniu Karroll. Geoffery na Paniu i pilai long midfil na Willie em golmak bilong Rapatona na PNG tim.

Ol boi bilong Rapatona olsem Pascalis Atalou, Mark Loap, Peter Punau na Paul Kailo i mekim bikipela hatwok tru. Tasol bal i no ron gut long lek bilong ol i go long wan pilaia bilong ol na tu bal i no go painim golmak bilong Guria. Dispela em bikos tupela midfilda, Geoffery na Paniu i no stap long stretim na ronim gem long midfil eria.

Ol yangpela boi bilong Guria i no givim sans long Rapatona las wiken. Long namba wan hap bilong gem, ol i ronim bal i go insait long golmak eria bilong Rapatona na mekim planti kik tasol ol kik bilong ol i no painim umben bilong ol boi Rapatona. Tasol long namba tu hap, ol i laitim paia na kukim Rapatona 2-0 long fultaim.

Paul Uwari bilong Guria i kisim wanpela penalti kik na salim bal i go meknais long umben bilong Rapatona. I no longtaim gen na Allan i ronim wanpela bal bihain long Winter Fosing i winim bal long midfil eria na kisim bal i kam. Winter i abrusim tupela fulbek bilong Rapatona na salim bal long Allan na em pinisim long golmak bilong Rapatona na kamapim namba tu skoa bilong Guria. Dispela gol i kamapim win bilong Guria long fultaim.

Long arapela primia gem, ol boi bilong Babaka i givim skul tu long Kurti Andra. Ol i nekim Kurti Andra 2-0 long fultaim.

Hoods i mekim save long Momase na Difens brukim umben bilong Ela Yunaitet 2-1 long fultaim na Yunivesiti autim tiket bilong Sobou 5-0 long fultaim.

Yunivesiti i gat planti pilaia bilong ol i stap long PNG tim nau i pilai long Nu Silan insait long Wol Kap kwalifai. Tasol em i yusim ol junia pilaia bilong en long las wiken gem na winim Sobou.

Soka long Mosbi i wok long go strong nau bihain long ol manmeri i lukim na bel kirap long gutpela gem PNG i kamapim egensim Nu Silan long Mosbi.

Long dispela yia i gat planti tim tru i stap insait long Mosbi Soka Asosiesen (PMSA). Olsem na asosiesen i larim sampela pilai i go long Sir John Guise Stadium. Na ol meri, primia, divisen 1 na wan wan anda 19 long PMSA soka graun.

Yunivesiti soka klap kisim nem IC Fund Yunivesiti

WATSON GABANA i raitim

OL PILAI na sapota bilong Yunivesiti soka klap long Mosbi i no inap putim han i go insait moa long poket long baim yunifom, afiliasen na pilaia rejistresen fi long dispela sisen. Investmen Kopresen bilong PNG, aninit long Investmen Kopresen Fun i givim pinis foapela fulset yunifom na narapela helpim moa long K6.600 long Fonde las wik.

Yunivesiti, em wanpela olupela klap tru long PMSA. Long taim Yunivesiti klap i bin stat i kam inap nau, ol pilaia na spota i bin yusim moni na taim bilong ol yet long sapotim na ranim klap. Olgeta yia, Yunivesiti soka klap i bin mekim nem insait long PMSA na winim klostu olgeta primiasip. Long 1995, ol manki Yunivesiti i bin rausim Guria bilong Mosbi long Nesinel klap sempionsip long Lae. Bihain long dispela, Yunivesiti soka klap i bin win i kam. Yunivesiti soka klap tu i bin

kamap wantaim sampela gutpela pilai bilong Papu Niugini.

Tasol olgeta dispela hatwok i bin kamap tasol long han bilong ol liklik lain, husat i save givim bel bilong ol tru long klap. Kain ol femili olsem; Joe Turia na meri, Robert Popat na meri na ol sampela senia pilaia. Long dispela taim i kam, ol i bin askim planti kampani long sponsorim klap, tasol olgeta kampani i no laik sapotim ol.

"Olgeta taim mipela askim wanpela kampani long sponsasip, ol i save pasim dua long mipela," Turia i bin tok.

I kam inap nau, taim Investmen Kopresen bilong PNG, i bin givim K6,616 sponsasip i kam long Yunivesiti klap. Dispela sponsasip i bin kamap long taim we, klap i bungim bikipela hevi long moni bilong pilaia rejistresen na afiliasen fi. ICPNG i bin givim foapela ful set yunifom wantaim nem bilong kampani antap long siot.

Yunivesiti long fes taim long histri bin go insait long fil las Sarere wantaim nem bilong sponsa antap long yunifom bilong ol. Aninit long nupela nem; IC Fund Yunivesiti, Yunivesiti soka klap bai go difenim taitel bilong ol long ples PNGFA bai makim bihain.

Long taim bilong presentasen, Fun Administeta, Frederick Angoman i bin tok olsem, kampani bilong em i amamas tru long sapotim wanpela klap we i bin kamapim planti gutpela soka pilai bilong kantri. Em i bin tok, watpo ICPNG i bin tingting long sponsorim Yunivesit bikos, ol laik helpim long developim ol manki long kamap gutpela sitisen bilong kantri long spot. Angoman i bin tok, bihain long ICPNG i bin lukluk long planti klap husat i bin aplai long sponsasip, ol i bin makim Yunivesiti taim ol lukim wanem samting klap i bin kisim long taim em i bin stat i kam inap nau.

Nau yet, sikspela pilai bilong Yunivesiti klap insait long nesinel

tim, husat i stap nau long Nu Silan na bai i go long Fiji bihain. Ol manki ya em: Hans Gewabing, Joseph Aisah, Benong Luluai, Steven Mune, Roy Kalang na Batman Furi. Narapela tupela bois husat i bin stap wantaim tim long taim PNG i bin pilaim Nu Silan hia em: Manuel Tatau na Taku Niebo. Wanpela gutpela pilaia bilong PNG tu, i bin stap long trening kem tasol i no bin mekim i go insait long PNG tim em; Desmond Waku.

Long PMSA kompetisen, IC Fund Yunivesiti i go pas long leda wantaim 18 points. Olgeta divisen bilong Yunivesiti; Anda 19, Primia Resev, Womens na Primia divisen i wok long pilai gut nau na olgeta i stap long top tri posisen bilong PMSA komeptisen. Aninit long nupela nem; IC Fund Yunivesiti, ol meri i bin winim Guria 4-2 na Primia tim bilong ICFund PNG i bin bagarapim sindaun bilong Sobou 5-0. Anda 19 i bin lus long Sobou 1-0.

Madang bai holim Momase tonamen na i no nesinel klap sempionsip

MADANG i redi long holim Momase rejinel soka sempionsip long Independens wiken. Dispela tonamen bai bungim moa long 15 tim insait long foapela provins bilong Mamase rijen.

Namba tu siaman bilong Momase rejinel soka federesen (MRSF), Peter Angasa tok olsem, Madang i no inap go pas long ranim nesinel klap sempionsip olsem sampela man i wok long ting. Em tok, bihain long wanpela miting long Lae, tripela wik i go pinis, ol bikman bilong foapela provins; Morobe, Madang, East Sepik na Sandaun provins i bin pasim tok long holim Momase sempionsip long Madang. Na i no Nesinel klap sempionsip. "Mipela i no inap ranim nesinel klap sempionsip bikos PNGFA i no bin tok save

long mipela hariap. Na tu mipela pasim tok pinis olsem Madang bai go pas long Momase tonamen. Olsem na mipela ting lus long ranim klap sempionsip," Angasa tok.




Dispela tonamen bai pulim moa long 15 tim i kam long olgeta hap bilong Momase rijen. Nau yet, ol man husat i go pas long dispela tonamen i wok hat long redim ples bilong ol pilaia i kam

na slip. Ol redim tu ples bilong pilai na arapela samting we i ken mekim dispela tonamen i kamap gutpela.

Angasa i bin tok olsem, long neks wik bai ol holim wanpela miting we ol bai traim long stretim olgeta samting long dispela tonamen. Bihain long dispela miting bai MRSF luk save long hamas tim tru bai kamap long dispela taim na tu askim olgeta

tim long pinisim olgeta fi bilong ol. Sampela tim husat i bin tokaut long kamap long dispela tonamen em: Lahi, LFA, Gaifar, Kaiapit, Wau, Fisika, Morobe Federesen, Madang, Raicoast, Kar Kar, Bogia, Madang Country, Wewak, Aitape, Maprik, Vanimo, Rido na Angoram. Tasol dispela olgeta tim na arapela husat i laik pilai mas pinisim K200 rejistresen fi bilong ol pastaim bai pilai.

WANTOK SPOT



Nu Silan wilwilim PNG

... PNG lus 7-0

SANS BILONG Papua Niugini long stap insait long Wol Kap soka resis i popaia taim Nu Silan All Whites i wilwilim ol boi 7-0 long

HENRY MORABANG
i raitim

Auckland, Nu Silan aste nait. Win bilong Nu Silan i soim stret olsem ol i gat

bikpela sans moa long Fiji na Papua Niugini. Sapos PNG i laik salensim Australia, ol i mas winim Fiji long bikpela skoa.

Dispela em i namba tu raun kik resis namel long PNG na Nu Silan. Long namba wan kik, PNG nekim ol boi Nu Silan 1-0.

Long gem long Nu Silan, ol boi PNG i kisim taim stret. Ol boi i pilai wantaim ren na ples i kol tru na i bagarapim sans bilong PNG long skoa.

Insait long namba wan hap bilong pilai, midfil bilong PNG i bruk na Nu Silan i yusim dispela sans long skorim ol gol.

Namba wan gol bilong Nu Silan i kamap long 10 minit tasol taim Jim Steven i kikim. Stap olsem 5 minit ken, Nu Silan i meknais long umben bilong PNG wantaim namba tu gol. Waughan Conven i kikim dispela gol.

Olsem yumi save, Nu Silan i gat nem tu long kisim ol pilai long ovasis. Long dispela gem. Namba tri gol i kam yet long Wyncon Rufer long 22 minit na em i skorim namba foa gol insait long 30 minute. Rufer em wangepela profesenal pilai long kantri Jemani.

Na faiv minit bipo long fultaim, winga bilong Nu Silan Simon Elliot i putim wangepela gol. Dispela gol i hapim namba bilong gol long namba wan hap 5-0.

Insait long namba tu hap, PNG i kamapim gutpela pilai stret.

Kosa Richard Nagai i bin mekim strongpela toktok tru long strongim ol boi bilong em long pilai strong. Em i tokim ol boi olsem, ol i noken wari long lus, tasol ol i mas pilai na brukim kiau.

Orait insait long 15 minit long namba tu hap, stail mangi bilong PNG Francis Moyap i go insait. Em i senisim Steven Mune.

Ol Nu Silan i no givim sans tru long em. Ol i banisim em gut tru na i no givim em spes long raun-raun. Dispela i bagarapim tru sans bilong PNG long brukim kiau. Moyap i gat wangepela gutpela sans tasol em i no kisim gutpela bal long raitfulbek Joe Aisa.

PNG i kamapim gutpela gem taim ol i yusim opsait sistem.



• Dokta Hapo Maliaki (lephan) na ol opisal bilong PNG soka tim i karim Kepten Jefferey Emang i go outsait bihain long em i kisim bagarap long fes geni bilong Wol Kap Kualifia egensim Nu Silan long Pot Mosbi. Emang i go pas long PNG tim gen taim ol i pilaim Nu Silan aste long hap. Aninit: Francis Moyap (namel) i bin gat kisim wangepela gutpela sans long skoa long dispela namba tu gem egensim Nu Silan.



Dispela i givim hat taim tru long Nu Silan.

Ol Nu Silan i putim tupela gol tasol long namba tu hap. Namba wan gol long seken hap i kam yet long Waughan.


PNG i kamapim strongpela difens long namba tu hap olsem na Nu Silan i putim tupela gol tasol. Sapos ol i yusim dispela kain stail long namba wan hap, PNG bai pretim tru ol boi Nu Silan.

Nu Silan i win wantaim 7-pela gol, na PNG i kiau.

PNG nau bai bungim Fiji long Sande dispela wik na bihain kambek long Mosbi. Long Mosbi i kisim ples bilong wantaim Fiji long Sir Hubert Murray stadium.

Midfil bilong Papua Niugini i no strong tumas. Bikos ol Nu Silan i bikpela man na daunim tru tupela sotkik midfil bilong mipela Geoffrey Emang, Richard Daniels, Roy Karang na Batman Furigi.

I bin i gat sampela senis long tim, tasol dispela i no helpim tru PNG skorim gol. Wesley Waiwai i kisim ples bilong Hans Gewambing na Wesley Waiwai i kisim ples bilong Roy Karang.



Lukaut long ol Cowboys nau

Cowboys paia gen. pes3

• Guria kosa tok em savim Laxie Metta.


p2

• Ragbi lig poto.

p6

• Ragbi lig dro.

p7



OSCAR ZUGU, lapun pilaia bilong Goroka Lahanis.

Lukim stori bilong em long pes 3



Kuni top PNG referi

WANPELA nesenol referi i wok long surik isi isi i go na klostu bai kamap olsem wanpela top referi bilong PNG.

Man ya em, Tony Kuni husait i stap long Pot Mosbi na tu em i stap wantaim Supa Lig.

Planti ol man na pilaia i wok long lukim stail na wei bilong em long ref i wok long kamap strong na i no long taim bai em i kamap nambawan ref long PNG.

Bihain tasol long Graham Ainui i lusim gem, nogat sampela referi i kisim ples bilong em olsem wanpela top ragbi na, Kuni i wok long kamap klia olsem wanpela gupela referi.

Na yet long ol inta-siti pilai, Kuni i save go pas long planti bilong ol dispela gem, na em i gat ekspiens long kontrolim sampela ovasis pilai.

Stori bilong Tony

Tony i statim wok refri long yia 1986 long NCD lig.

Long dispela taim NCDD i gat lig bilong em yet, na Pot Mosbi i gat lig bilong em yet, olsem na dispela i givim save long Tony long refrim sampela gem.

Tony i ref, bihain tasol long em i lusim gem wantaim Kone Tigers olsem wanpela winga long 1984. Long dispela taim, mi stat long ref, mi traim long sanap strong long wanem kain divisen mi mekim. Em i bin hat tasol mi mekim yet, em i tok.

Taim NCDD i bung wantaim PRL. Tony i go long PRL na em i stat long ref long hap.

Em i kamap wanpela sinia refri, na long wanem em i kontrolim planti ol bikipela gem long dispela taim.



• Tony Kuni (raithan) wantaim sampela referi bilong ol arapela kantri long Fiji las yia.

Long 1990, taim PNGRFL i statim inta-siti resis, Tony i kisim sans long refrim ol Inta Siti gem.

Tony i stap olsem wanpela Inta Siti refri i go inap long yia 1955, taim em i kisim sans long kontrolim wanpela ovasis gem, em long Red Lion Kap long Inland.

Long seim yia em i kontrolim gem namel long France na Kumul bihain long dispela, em Wol Kap gem namel long Ireland na Morocco na Russia na Scotland.

Tony tu i stap insait long Wol Neins long Fiji long las yia 1996. Bikipela driman bilong Tony em long kontrolim wanpela test gem.

Em i tok olem dispela em i bikipela driman bilong em taim em i stat long refri.

Olgeta sampela gem em mi stap insait pinis tasol dispela tasol bai mi traim hat long apim ai bilong ol selektim, em i tok long ol tingting bilong em long yumi, Tony i tok olsem planti ol pipel na pilaia i no klia gut tumas long ol rule bilong pilai.

Em i tok olsem, long dispela pasin ol sapota i save moa statim na kros pait namel long ol yet, na dispela i save bagarapim gem.


Em i laikim ol wanwan klap ofisel long toksave gut long ol pilaia bilong ol long save gut long gem.

"Sapos ol pilaia na sapotas i save gut long ol rul bilong gem, em i bai isi tru long ronim gem, long wanem ol divisen bilong ol referi i bai bihain ol rul tasol," em i tok.

Tony i ave olsem wok bilong referi i no isi long wanem planti taim ol referi i save kisim pen na bagarap. Tasol em i bilip strong olsem sapos referi i fea long disisen bilong em, bai em i noken bungim ol birua long skin bilong.

Long dispela as Tony Kuni save traim long wokim ol stret-pela disisen na i no long taim bai ol selektas i makim em long kontrolim wanpela test gem.

STORI BILONG PILAIA



Nem: Simon P. Tunda
D.O.B: 1973

Asples: lalibu. Provins: S.H.P
Posisen: Faiv-eit, senta, winga

Ol bikipela gem yu bin pilai long en: 1992 - Junia Simbu skwat - U/19 kepten bilong Simbu tim. 1993 - U/21 Hailens jon. 1994 - Kombain hailens na Noten jon. 1995 - lalibu sait na go insait long Mendi Muruks. 1997 - Pot Mosbi, Capital City Cowboys.

Husat manmeri yu save laikim? Ol man o meri husat i save wok hat, tok tru na mekim samting long

laik bilong ol yet.
Ol man o meri yu no save laikim: Ol manmeri husat save smok, kros na ekt smat.

Feveret Ovasis tim: Broncos.

Feveret Ovasis pilaia: Steve Renouff

Feveret PNG pilaia: Bal Numapo.

Wanem samting yu save mekim taim yu no pilai? Mekim tok fani, bungim nupela pren na draivim ka raun.

Feveret kai kai: Rais na Ox & Palm.

Feveret dring: Coke.

Feveret muvi: Ani muvi bilong Terence na Bud Spencer.

Driman bilong yu: Stap insait long PNG Kumul tim na go skul.

Wanem gupela samting i bin kamap long yu long taim yu stat pilai ragbi? Long 1994, mi bin pilai poromanim bes pilaia bilong mi Bal Numapo. Bai mi no inap lus tingting long dispela. Mipela i bin

winim gren fainel na go pilai insait long Kembris kap salens. Numapo em wanpela klewa man tru bilong pilai ragbi.

Wanem samting i bin kamap long yu we i no gupela? Long 1996, mi bin kisim bikipela bagarap long lek na skru bilong mi, na mi no bin pilai liklik long sisen olgeta.

Yu ting wanem long tok pait namel long ARL na Supa Lig? Em hevi bilong tupela man tasol. Olsem na mi ting dispela tokpait i no inap bagarapim ragbi long PNG.

Cowboys putim tu points long SP Inta-siti resis

CAPITAL City Cowboys i putim fes tu points bilong ol i go insait long rekot buk bilong SP Inta siti salens taim long dispela yia taim ol i bin sotim win bilong Goroka Lahanis long Kone Tigers ovel long Sande wik i go pinis.

WATSON GABANA i raitim

Capital City Cowboys, husat i bin go daun long Lae Bombers long raun foa long Lae, i bin kam long baksait tru na winim dispela gem egensim

Lahanis long Sande wantaim 24-20 skoa lain. Aninit long lukaut bilong nupela kosa, Gaius Kula, ol manki POM siti pilai strong tru klostu long pinis bilong pilai na mekim planti sapota bilong Lahanis i go bek long haus bilong ol wantaim bikipela wari. Dispela win bilong ol i kisim ples bilong tu points ol lusim taim PNGRFL i bin rausim bikos bipo, Sam Kaia i no bin rijista.

"Mipela i no bin stap long sait bilong win long stat bilong gem," Kula, olupela kosa bilong Difens na nau statim wok olsem Cowboys kosa tok. "Mipela kam olsem anda dok na laki tru long mipela win."

Dispela tok tok bilong kosa bilong Cowboys i no giaman. Stat long nambawan wisel, ol Lahanis i go het long bisnis. Ol apaso bilong kol ples salim bal i go i kam na mekim ol manki POM siti luk sore na sotwin insait long fil long fes 20 minits. Mekim i go na wanpela liklik sans tasol bilong Cowboys i bin kamap, taim kepten, Joe Lema pundaun antap long trai lain long nambawan points bilong dispela apinun. Taim dispela trai bilong Cowboys i bin kamap, ol manki Goroka i skin kirap na salim bal i go i kam na salim Steven Sieke tas daun long hapsait bilong fil. Kik bilong fulbek Ferdinand i kisim kos gut na Lahanis i bin go pas wantaim 2

points (6-4). I no long taim, Lahanis i kisim bal gen taim ol pilaia bilong Cowboys i dropim bal insait long danja eria bilong ol yet, manki Heganofi, Tai Onise pundaun antap long trai lain bilong ol birua long namba tu trai bilong ol. Kik bilong Ferdinand i no bin kisim kos gut na ol skurim skoa lain i go antap long 6 points (10-4).

Wantu tasol, ol asples manki stretim ol yet na mekim sampela liklik stail pilai long salim kepten Lema gen long namba tu trai bilong em long dispela apinun. Kik i no bin kamap gut na long hav taim Lahanis i bin go pas wantaim 2 points (10-8).

Taim ol i kam bek long seken hav, Lahanis i go pas long ranim olgeta departmen insati long fil.

Ol muvim bal i go i kam na kamap wantaim tupela kwik trai long skurim skoa lain i go antap long 20 points. Ol kain strongpela ran bilong "dami god" Tuiyo Evei, kepten John Markham, Mark Mom, Tai Onise na Osca Zugu mekim ol manki Cowboys het pen. Tasol klostu long pinis bilong pilai, ol Cowboys i kam bek wantaim sampela gupela bal wok na salim Orbert Batia long fes trai bilong seken hav. I stap sotpela taim tasol, Zackery Kipsey tas daun gen long kompaun bilong Lahanis long apim skoa i go 16-20. Wanpela penalti kik bilong Kipsey skurim skoa i go antap 18-20. Antap stret long ful taim, Kari Moses, siksti abrusim foapela pilaia bilong Lahanis na slip antap long trai lain. Kik bilong Kipsey i kisim kos gen na ol kam aut long fil wantaim ama-



• Tai Onise bilong Lahanis i traim long takolim wanpela Kaubois pilaia.

mas wantaim 24-20 skoa lain.

Kosa bilong Lahanis, Leva Tete i no bin tok tok, lap o mekim wanpela samting taim em lukim ol manki bilong lus long dispela apinun. Em daunim het tasol, hatim olgeta pilaia bilong em kalap long bas na ol tek ov i go bek long hotel ol slip long en. Wanpela pren bilong mi husat i bin stap wantaim ol manki Lahanis long Granville i bin tokim mi olsem, taim ol i bin kamap long hap, kosa Leva i bin hatim ol manki Lahanis gut tru. Em tokim ol olsem, bekim bilong dispela belpen em kisim, bai ol mas winim Mendi Muruks long Goroka.

Long narapela sait bilong fil, nupela kosa bilong Cowboys, Kula i bin painim tok tok taim RLN i bin askim em long stori long tim bilong em. Nau yet, Cowboys nogat ol klap

we selekta i ken makim ol pilaia. Kosa i bir tok olsem, husat man i laik pilai, em i ken kamap na trening wantaim ol. Kula i bin kisim dispela wok long han bilong Samson Kaia, taim PNGRFL i bin saspensim em bikos em i no bin rijista. Long arapela gem, Kundiawa Warriors i bin nekim Rabaul Island Spear Guria 12-9, Mendi Muruks katim nek bilong ol Bombers 16-10 na Maut Hagen Eagles bagarapim sindaun bilong Madang Marlins 40-10.

Long dispela wiken, Guria na Cowboys bai bungim pes long Mosbi, Marlins na Bombers bai amamasim manmeri long Lae long Lae, Muruks na Lahanis bai brukim bun long Danny Leahy long Goroka yet na Warriors bai lukautim wan kange bilong ol Eagles long Kundiawa.

Kosa bilong Guria tok em sevim laip bilong referi

WATSON GABANA i raitim

"SAPOS mi no bin stap, ol sapota long Kokopo inap kilim referi bilong Lae, Laxie Metta pinis," kosa bilong Spear Island Guria, Dennis Reynolds tok. "Mi tasol kisim em na i go haitim em long baksait bilong ol ka bilong Securimax sikyuriti.

Kosa Reynolds i bin tokim Ragbi Lig Nius (RLN) dispela, taim em lukim long niuspepa olsem, em tasol i bin go pas long kirapim bel kros long Kokopo taim ol Guria i bin lus long Kundiawa Warriors 12-9, taim ol i bin pilai long Sande wik i go pinis long namba faiv raun

bilong SP Inta siti gem. We ol sapota i bin tromoi ston, stik na botol i go insait long fil bihain long gem.

"Hevi i stap pinis na mi bin go insait long fil. Olgeta manmeri long dispela taim i no bin amamas long we, referi Metta i bin ranim dispela gem. Long wanpela taim, i bin gat 14-pela pilaia insait long fil. Na tu i bin i gat sevenpela takel, tripela taim long taim pilai we referi i no bin panisim Warriors. Dispela i mekim na mi bin wakabaut i go long fil na tokim em olsem, sapos em intanesinel referi, em i mas refim gem gut," kosa Reynolds i bin tok.

Reynolds i bin tok tu olsem, insait long taim bilong pilai, ol

Warriors i bin pusim bal i go fowat (nok on) long trai lain bilong Guria bipo long ol tasim bal. Tasol, referi Metta i bin tok olsem em trai. Dispela na arapela liklik paol samting referi i bin mekim i no gutpela olsem, na Reynolds i kirap na i go insait long fil na traim long tokim Metta olsem em i mas ref gut.

Taim kosa i go insait long fil, ol manmeri, husat belhat na stap kirap na tromoi ston, stik, na botol i go insait long fil na laik paitim referi. Ol sapota na manmeri husat i bin kamap long Kokopo long lukim dispela pilai i no bin wanbel tru long we referi Metta bilong Lae i bin ranim dispela gem. Wanpela man long Kokopo, husat i no laik kolim nem bilong em i bin tokim

RLN olsem, ol i no laik lukim referi Metta gen long Kokopo o Rabaul. Em tok, we em long ranim gem i no bin gutpela. Man ya tok, we Metta refim gem tasol kirapim bel bilong ol manmeri long kros na pait, we nupela long Rabaul.

"Mipela i no manmeri bilong pait na kros long win o lus. Mipela save amamas tasol long lukim gem. Tasol long las Sande, mipela i no bin amamas liklik long we, Metta i bin refim gem. Olsem na mipela les tru long lukim em kam na refim wanpela gem hia long Kokopo o Rabaul," man ya i bin tok.

Kosa Reynolds i bin mekim wankain tok tok tu. Em tok tu olsem, ol manmeri na sapota

bilong Kokopo na Rabaul les long kirapim pait wantaim wanpela klap o asosiesen. Tasol em laik lukim ragbi lig develop long kantri. Em tok olsem ol man husat sapos long go pas long developim ragbi long PNG em ol referi. Reynolds tok olsem dispela kain samting Metta i bin mekim i no gutpela long kantri.

Ragbi lig nius (RLN) i bin traim long toktok wantaim Luxie Metta, tasol ol wanwok bilong em tok olsem em i bin sik na i no kam long wok. Nau yet, mipela i no bin kisim wanpela gutpela tok long maus bilong Luxie. Tasol long ol arapela Niuspepa, Metta i bin tok olsem, Hevi bilong Kokopo i stap long han bilong PNGRFL.

Bruk namel long ARL na SUPA lig em gutpela: Oscar Zugu

Taim yumi save stap longpela taim long wanpela hap o mekim wankain samting olgeta dei, yumi save tingting long lusim dispela ples na i go long narapela hap o tingting long mekim narapela nupela samting. Tasol i gat wanpela hap tok tu i stap olsem; "Sapos yu mekim wankain samting olgeta taim long laip bilong yu, yu kamap saveman tru long dispela wok na bos bilong yu i no inap larim yu go." Dispela hap tok i fitim tru laip bilong wanpela longtaim pilaia bilong Goroka Lahanis, Oscar Zugu.

"Dispela bruk namel long ARL na Supa Lig em gutpela. Dispela kain pasin helpim yumi long kamap wantaim tupela bodi, bai ol manki bilong yumi i ken mekim disisen bilong ol yet long pilai long wanem lig bodi ol laik. Bipo, mipela i save painim hat tru long makim kantri bikos i gat planti gutpela pilaia tumas. Ating nau dua i op bikpela long junia bilong yumi mekim nem long bikpela intanesinel levul," Oscar i bin tok taim mi bin askim em hau em lukim ragbi bilong bipo na bilong nau.

Mama i bin karim em long Okeiyufa viles autsait tasol long Goroka taun, 27 krismas i go pinis. Zugu i kaikai kaukau bilong Okeiyufa na kamap bikpela. Stap aninit long lukaut bilong mama papa bilong em olgeta taim, Oscar i no save ragbi em wanem samting. Inap long 1978, taim em i bin tenpela krismas, nau em luk save long dispela gem nau yumi kolim RAGBI LIG.

Taim Oscar lukim ol bikpela man pilaim dispela gem, em i save sindaun long sait lain na save driman tasol wande bai em mas go insait long fil na bamim wanpela man pundaun. Olgeta Sarere, Oscar i save ranawe long ples bilong em Okieyufa na go long Goroka tasol long lukim ol bikman brukim bun long fil. Em save sapatim tru wanpela tim, nau em lusim tingting pinis. Tasol Oscar bin tok olsem, dispela tim, taim ol save kisim bal, ol fowat i save ran longlong tru i no insait long kompaun bilong ol birua bilong ol na putim trai. Long dispela taim, ol traipela traipela man tasol i save pilai. We long planti taim, ol i save pait klostu klostu.

Long mekim stori sot, Oscar i daunim spet i go na kisim fes filing bilong tru ragbi long 1985. Long dispela taim, em i save stap long ples na i go

pilai long Goroka. Oscar stat mekim nem bilong em dispela taim i kam. Olgeta taim, em i save lusim ples na i kam trening long Goroka taun. Taim trening pinis, em save ran klostu tu aua i go bek long ples bilong em. Mekim olsem i go na Oscar i bin mekim nem long Goroka taun.

Long 1987, Oscar i bin stap insait long anda 17 junia sait bilong hailens jon. Dispela i stat tasol bilong Oscar long wokabaut bilong em insait long ragbi lig long kantri. Bipo long SP Inta-siti i bin kik ov long 1990, Oscar i bin pilai pinis long planti bikpela intanesinel gem.

Wanpela bilong ol dispela gem, Oscar tok bai em i no inap lus tingting em long 90 taim em i bin stap insait long hailens jon tim long pilai wantaim Gret Briten long Goroka.

Driman bilong Oscar long go insait long fil na bamim ol man pundaun i sans olgeta. Em lusim dispela tingting nogut bilong pilai na statim pait, we em i save tingim bipo na bihain narapela kain stail bilong pilai ragbi lig. Taim SP Inta-siti resis stat long 1990, kosa Leva Tete i no bin painim ol pilaia. Long ogeta hap bilong Goroka, planti gutpela pilaia i stap pinis. Kain ol pilai olsem; Ifie Sigiero, Tuiyo Eve, Ifisa Wanega, Agi Tete na Oscar Zugu. Ol dispela manki lidim Lahanis long stat bilong SP Inta-siti, na ol i bin bungim pes wantaim Mosbi Vipers tripela taim, we ol bin winim long 1993.

Bihain long dispela nupela taim bilong ragbi long kantri, planti bikpela sans i bin kamap long kantri. Ol ovasis kantri i bin kam na pilai wantaim PNG Kumuls. Long 93, Oscar i bin stap insait long Presiden 13 tim na pilai egensim Fiji. Long sem yia yet, em stap tu long tim husat i bin pilai wantaim Kwinslen. Oscar i bih stap tu long tim bilong PNG13, husat i bin pilaim Britain long 1996 long Hagen.

Dispela em liklik stori tasol bilong Oscar Zugu, wanpela longtaim pilaia bilong Goroka Lahanis. Manki Okieyufa, husat i save pilai winga, senta-na lok fowat bilong Lahanis long 1990 i kam inap nau ('97). Aninit long lukaut bilong kosa, Leva Tete, Oscar i kamap long kain mak olsem. Em tokaut olsem. Tasol long developim ragbi long kantri, Oscar Zugu i tok olsem ragbi mas kamap pat bilong skul wok we tisa i ken lainim ol pikini long skul.



Bai yu go we... • Kepten bilong Goroka Lahanis John Markham holim pasim Ben Randa bilong Cowboys tosal tim bilong em i go daun long ol Cowboys.

ATING; "TING TING BILONG WAYNE I BIN PAUL LIKLIK"

WAYNE BARTRIM
sanap arere
long ples

bilong was was long Suncorp Stadium, wantaim tawel long banis bilong em, bihain tasol long nam-bawan Stet ov Orijin. Tingting bilong em i paul olgeta na em i no save long mekim wanpela samting. "Mi bin stap insait long pilai inap long pinis o?" Bartrim i tingting tasol long het. Em i no inap tingim gut na tu ol arapela wan pilai bilong em tu ol i no save ol i pilai na kam aut na malolo.

Wantaim bikpela wari, Bartrim i tingim tasol, i no longtaim i go pinis em i bin kik na abrus sans tu poin bilong trai kepten Andrian Lam i bin putim bilong Kwinslen sait long 68 minit. St George lok fowat, i no bin misim wanpela kain inpoten gol long laip bilong em. Tasol dispela i bin wanpela samting Bartrim i no inap tru lus tingting. Long em yet, dispela gem i bin wanpela i bin wanpela laspela gem tru long histri bilong em olsem ragbi pilai.

Kosa Paul Vautin i bin askim Bartrim long pilai olsem huka namel long fis hav i no inap lusim tingting tu long wanem samting em (Bartrim) i bin mekim long misim dispela gol. Vautin i bin gat bikpela bilip long Bartrim na salim em i go pilai long dispela posisen tasol i no longtaim, kosa i lusim bilip bilong em.

"Mi no save wanem samting tru i bin kamap long Barts long dispela taim," Vautin i bin tok taim em i bin go bek na lukim vidio bilong namba wan Stet ov Orijin. "Em i bin pilai olsem Bartrim. Olgeta taim em i save toktok na mekim planti kain kain stail insait long fil. Bipo long gem mi no bin ting ting long sansim em. Ating ol birua i bin paitim em na em i bin lusim olgeta save bilong em long pilai. Dispela olgeta, mi no save yet."

Bartrim em wanpela paia lait man. Kain ol strongpela ran bilong em i bin mekim na Kwinslen i bin nekim Blues 3-0 long 1995. Tasol long Trinde, tupela wik i go pinis, em i no bin mekim 15-pela takel gut na seven hitap. Dispela em i bin wanpela sem pasin tru long kain

gutpela na stail pilaia olsem Bartrim.

Wanem samting i bin mekim Bartrim i no amamas tru em. Trening bilong em bipo long gem i bin gutpela tru. Em i bin mekim kain kain trening long mekim em i stap fit na redi tru long dispela namba wan Stet ov Orijin.

I tru olsem St George i bin winim wanpela gem tasol bihain long faipela taim ol i bin pilai, Bartrim tokaut olsem em i bin redi gut tru na bin kamap long dispela gem.

"Bihain long mipela i no bin pilai gut long las yia, mi bin redim mi yet gut tru long dispela gem. Na mi ting olsem mi bin fit tru bipo long kik ov," em tok. Bartrim tingim tu olsem Kwinslen selektas i no bin larim em pilai long las tupela gem long 1996.


"Mi bin slip gut long ples bilong kem na tu mi bin rilex gut tru. Mi no bin gat wanpela hevi. Nogat

tru. Mi bin tingim tasol hau bai mi pilai long dispela taim."

Bartrim i tingim olsem ating ol manki Kwinslen i bin gat hai filing tru na ol i mas ting ting strong bai ol win olsmen na mipela i bin lus. Long fes hav, Kwinslen i bin gat planti sans tru long skoarim trai tasol dispela i no bin kamap. Em ting tu olsem insait long gem, ol fowat i no bin givim spes long ol yet na ol bam i go i kam na mekim ol liklik mistek. Bartrim tok tu olsem em ting ting tu long ran na kamap wantaim spes bai em i ken givim bal long Adrian Lam o Ben Ikins, tasol dispela i no bin kamap.

"Mipela olgeta i bin paol nabaut long hap - olsem sampela bilong mipela i bin mekim arapela kain tokples," em tok. "Ating fes hav mipela i kamap wantaim narakain gem plen na mipela i no bin pilai gem bilong mipela."

- THE LEAGUE WEEK



Wayne Bartrim — a night to forget at Suncorp Stadium

STORI BILONG PILAIA

ANDREW DUNEMANN North Queensland

Posisen: Havbek/ faiv-eit.

D.O.B: Jun 10 1976.

Longpela: 178cm. Hevi: 85 kilo.

Marit o Yangpela? Yangpela.

Taim yu manki, yu save laikim husat ragbi pilaia? Wally Lewis, bikos em i bin pilai kain gem we mi save laik long pilai.

Wanem gem yu bin pilai we yu no inap lus tingting? Commonwealth Bank kap gren fainel, taim mi bin stap long Harristown haikul, we mipela i bin pilai wantaim Patrician Brothers Fairfield. Mipela i bin lus wantaim wanpela poin tasol. Na dispela em wanpela gem we, wanpela tim long Kwinnslen i no bin mekim bipo.

Husat em i namba wan kosa bilong yu? Carol Franklin. Krismas bilong mi bin siks taim mi bin pilai wantaim Newtown (Toowoomba) anda 8 tim. Bikos long dispela taim, i no bin gat wanpela anda 6 tim.

Husat tru mekim na yu kamap kain man olsem long ragbi lig? Kosa bilong mi long Harristown, Brian Gardner. Em i bin mekim wanpela liklik skul i kamap ples klia na mekim we long mipela sampela i ken pilai insait long bikpela tim nau.

Sapos yu gat sans long pilai wantaim wanpela biknem hapbek long wanpela de, husat tru yu tingting long pilai wantaim? Ricky Stuart. Em i save man tru bilong mekim kamap spes na mekim isi long ol outsait man long putim trai.

Wanem samting tru mekim na yu tingting long stap na pilai long North Queensland? I gat naispela ples bilong was was na go painim fis long solwara. Na tu i gat planti ol gutpela manmeri na kosing tim.

Sapos ol givim yu wanpela hos. Bai yu givim em wanem nem? Mi gat sampela hos mi bin givim ol nem bilong ol wan pilaia bilong mi bipo long haikul mipela save pilai wantaim long Harristown tim. Sapos mi kisim sampela nupela, bai mi givim nem bilong ol Cowboys pilaia long ol.

Sapos yu tingting long askim wanpela man long givim yu sampela gutpela stia tok. Bai yu lukim husat man tru? I nogat wanpela man mi gat tingting long askim em long stia tok. Tasol mi gat bikpela bilip long kosa bilong mi Tim Sheens. Tasol mi bai askim olgeta nupela man mi bungim long givim mi gutpela stia tok.

Sapos yu tingting long ranim na lukautim wanpela tim bilong yu yet. Yu tingting long ranim wanem tim? Cowboys. Bikos ol i gat planti gutpela pilaia na olgeta manki long hia i save wok bung wantaim.

Wanem taim tru long laip bilong yu, yu no save laikim tru? Taim namel long ol trening. Namel long moning na apinun trening, mi no save mekim wanpela wok long namel taim.

Sapos yu laik askim sevenpela man long wol long kamap long wanpela pati bilong yu. Yu ting ting long askim husat ol man? Michael Jordan, Madonna, Eric Cantona, Troy Aitken, Sharon Stone, Shane Warne na Wesley Snipes.


Bai yu kukim wanem samting bilong ol? Pot pulap long kain kain kai kai na wanpela galon sempein.

Sapos yu winim \$10,000. Bai yu mekim wanem samting long en? Bai mi yusim olgeta moni baksait tasol long haus bilong mi. Bai mi wokim wanpela bikpela kasino.




Wanem lo long ragbi lig, yu laik mas sens? 10 mita lo, mi laik ol mas sanisim i go bek long 5 mita. Bikos taim ol birua ran i kam long klostu bai i gat bikpela hul long yu ken ran.

Husat em fit pilaia long gem nau long sisen? Brett Mullins. Em i bin pilai gut tru long Tri-Siries fainel.

Wanem hap bilong ragbi lig wikli yu save ridim paslain? Hap we soim plaia ratings.



Oi eksen poto namel long Capital City Cowboys na Goroka Lahanis insait long Inta Siti Kap resis long Mosbi. Cowboys i strong moa na winim Lahanis 24-20.



TEAMS FOR SECOND ROUND OF WORLD CLUB CHALLENGE

FRIDAY:

Adelaide v Leeds at Adelaide Oval (8pm).

RAMS: Rod Maybon, Wayne Simonds, Chris Quinn, Solomon Kiri, Michael Maguire, Luke Williamson, Dean Schiffilliti, Mark Corvo, Kerrod Walters (c), Allan Cann, Bruce Mamando, David Boughton, Cameron Blair. res: Steve Stone, Kevin Campion, Andrew Hick, Kurt Wrigley, Brett Galea (one to be omitted).

RHINOS: Damian Gibson, Paul Sterling, Phil Hassan, Francis Cummins, Leroy Rivett, Iestyn Harris, Ryan Sheridan, Martin Masella, Wayne Collins, Barrie McDermott, Adrian Morley, Anthony Farrell, Gary Mercer (c). res: Graham Holroyd, Andy Hay, Jamie Mathiou, Terry Newton.

SATURDAY:

North Queensland v Oldham at Stockland Stadium (7.30pm).

COWBOYS: Shane Vincent, Luke Phillips, Mark Shipway, Scott Mahon, Adam Warwick, Ian Dunemann, Andrew Dunemann, John Lomax, Steve Walters, Martin Locke, Owen Cunningham, Peter Jones, Kyle Warren. res: Glen Murphy, Reggie Cressbrook, John Skardon, Bert Tabuai.

LDHAM: Paul Atcheson, Bob Myler, Vince Fawcett, Howard Hill, Alfei Leuila, Francis Maloney, Martin Crompton, Ian Gildar, David Stephenson, Brett Goldspink, Paul Davidson, Matt Munro, Luke Goodwin, Garty Lord, Joe Faimalo, John Clark, Paul Topping (four to be named on interchange bench).

SUNDAY:

Canberra v London at Bruce Stadium (2.30pm).

RAIDERS: Ken Nagas, Royston Lightning, Brett Mullins, Ruben Wiki, David Boyle, Laurie Daley, Ricky Stuart (c), Brad Clyde, David Furner, Ben Kennedy, Brett Hetherington, Luke Priddis, Luke Davico. res: Simon Wollford, Jason Croker, Jason Burnham, David Westley, Quenton Pongia (one to be omitted).

BRONCOS: Andrew Duncan, Scott Roskell, David Krause, Tulsen Tollett, Martin Offiah, Terry Matterson, Josh White, Peter Gill, Russell Bawden, Andrew Hamilton, Matt Dunford, Robbie Beazley, Tony Mestrov. res: Tony Martin, Matthew Salter, Greg Barwick, Andy Spencer.

Canterbury v Halifax at Belmore Sports Ground (2.30pm).

BULLDOGS: Matt Ryan, Hazem El Masri, Shane Marteene, John Timu, Daryl Halligan, Craig Polla-Mounter, Duncan McRae, Steve Price, Jason Hetherington, Mitch Newton, Robert Relf, Simon Gillies, Travis Norton. res: James Pickering, Barry ward, Solomon Haumono, Barry Berrigan.

BLUE SOX: Mike Umaga, Asa Omone, Daio Powell, David Bouveng, Fereti Tuilagi, Martin Pearson, Craig Dean, Martin Moana, Simon Baldwin, Michael Jackson, Carl Gillespie, Paul Rowley, Karl Harrison. res: Chris Chester, Richard Marshall, Michael Slicker, Paul Heighton.

MONDAY:

BRISBANE v WIGAN at ANZ Stadium (7.30pm).

BRONCOS: Darren Lockyer, Tonie Carroll, Steve Renouf, Anthony Mundine, Wendell Sailor, Kevin Walters, Allan Langer (c), Darren Smith, Gordon Tallis, Brad Thorn, Andrew Gee, John Driscoll, Glenn Lazarus. res: Shane Webcke, Peter Ryan, John Plath, Phillip Lee.

WARRIORS: (likely side): Henry Paul, Jason Robinson, Gary Connolly, Kris Radlinski, Andy Johnson, Nigel Wright, Tony Smith, Andy Farrell, Mick Cassidy, Simon Houghton, Lee Hansen, Martin Hall, Neil Cowie. res: Darryl Cardis, Gael Tallec, Stephen Holgate, Stu Lester.

IN ENGLAND:

FRIDAY:

Castleford v Hunter at Wheldon Road (7.30pm).

CASTLEFORD (likely side): Jason Flowers, Jason Roach, Adrian Vowles, Jason Critchley, David Chapman, Graham Steadman, Mike Ford, Brendan Tuuta, Ian Tonks, Andrew Shick, Dean Sampson, Richard Russell, Lee Crooks (c). res: Danny Orr, Lee Harland, Nathan Sykes, Chris Smith.

MARINERS: Robbie Ross, John Carlaw, Kevin Iro, Brad Godden, Gavin Thompson, Scott Hill, Noel Goldthorpe (c), Willie Poching, Paul Marquet, Tony Iro, Tim Maddison, Brett Kimmorley, Troy Stone. res: Anthony Brann, Neil Piccinelli, Keith Beauchamp, Darrien Doherty.

SATURDAY:

Bradford v Auckland at Odsal Stadium (6pm).

BULLS (likely side): Stuart Spruce, Paul Loughlin, Danny Peacock, Graeme Bradley, Jon Scales, Glen Tomlinson, Robbie Paul (c), Jeff Wittenberg, James Lowes, Paul Anderson, Mike Forshaw, Simon Knox, Steve McNamara. res: Brian McDermott, Nathan Graham, Paul Medley, Tahi Reihana.

WARRIORS: Matthew Ridge, Sean Hoppe, Tea Ropati, Anthony Swann, Marc Ellis, Shane Endacott, Stacey Jones, Denis Betts, Stephen Kearney, Bryan Henare, Joe Vagana, Syd Eru, Mark Horo. res: Brady Malam, Logan Swann, Gene Ngamu.

SUNDAY:

Warrington v Penrith at Wilderspool (3pm).

WARRINGTON (likely side): Lee Penny, Salesi Finau, Jon Roper, Nigel Vagana, Mark Forster, Kelly Shelford, Lee Briars, Paul Sculthorpe, George Mann, Tony Tatupu, Gary Chambers, Paul Hulme, Warren Stevens. res: Chris Rudd, Tony Thorniley, Willie Swann, Paul Wingfield.

PANTHERS: Peter Jorgensen, Jason Williams, Sid Domic, Ryan Girdler, Andrew Hinson, Steve Carter, Craig Gower, Darren Brown, Matt Adamson, Jody Gall, Phil Adamson, Danny Farrar, Carl MacNamara. res: Bobby Thompson, Duncan MacGillivray, Brett Boyd, Dave Alexander.

MONDAY:

St Helens v Cronulla at Knowlsey Road (7.45pm).

ST HELENS (likely side): Andy Haigh, Danny Arnold, Alan Hunte, Vila Matutia, Anthony Sullivan, Jason Johnston, Bobbie Goulding, Dean Busby, Chris Morley, Simon Booth, Julian O'Neill, Paul Anderson, Anthony Leatham. res: Alan Cross, Kevin O'Loughlin, Scott Barrow, Richard Shiel.

SHARKS: David Peachey, Mat Rogers, Andrew Ettingshausen, Russell Richardson, Richie Barnett, Mitch Healey, Paul Green, Tawera Nikau, Chris McKenna, Wade Forrester, Jason Stevens, Dean Treister, Danny Lee. res: Martin Lang, Geoff Bell, Nick Graham.

LAE RUGBY LEAGUE

ROUND 10

09.00am	U17	Brothers	vs	Morobe Tigers
10.00am	U17	Magani	vs	Royals
11.00am	U17	Spiders	vs	Panthers
12.00pm	U17	Tarangau	vs	Defence

Inside Ground

09.00am	B	Spiders	vs	Panthers
10.20am	B	Tarangau	vs	Defence
11.40am	B	Brothers	vs	Morobe Tigers
01.00pm	B	Magani	vs	Royals
02.30pm	A	Spiders	vs	Panthers
04.00pm	A	Tarangau	vs	Defence

Sunday June 15, 1997.

Outside Ground

09.00am	U19	Brothers	vs	Morobe Tigers
---------	-----	----------	----	---------------

Inside Ground

09.00am	U19	Magani	vs	Royals
10.00am	U19	Spiders	vs	Panthers
11.00am	U19	Tarangau	vs	Defence
12.00noon	A	Brothers	vs	Morobe Tigers
01.30pm	A	Magani	vs	Royals
03.00pm I/C		Lae Bombers	vs	Madang Marlins

Gate Fees
Adults K5.00
Kids K2.00

AGrade As At 6/6/97 - After Round 9

A Grade	P	W	D	L	PF	PA	PTS
Tarangau	9	6		3	208	188	12
Spiders	8	5		3	181	138	10
Morobe Tigers	9	5		4	188	189	10
Royals	9	4	1	4	197	187	9
Defence	8	3	2	3	190	208	8
Brothers	9	4		5	172	192	8
Panthers	9	3	1	5	190	212	7
Magani	9	3		6	185	151	70

B Grade

Spiders	9	8		1	104	70	16
Brothers	9	8		1	182	106	16
Tarangau	9	8		2	180	118	14
Royals	9	4		5	132	169	8
Panthers	9	3		6	107	134	6
Magani	9	2		6	148	154	6
Morobe Tigers	9	2		7	99	172	4
Defence	9	1		8	86	175	2

Under 19

Royals	9	6		3	93	53	12
Magani	9	6		3	93	68	12
Brothers	9	6		3	80	59	12
Spiders	9	5	1	3	102	78	11
Tarangau	9	5		4	132	96	10
Defence	9	2	1	6	59	114	5
Panthers	9	2		7	98	152	4
Morobe Tigers	9	2		7	47	104	4

Under 17


Spiders	9	8		1	122	42	16
Royals	9	4	2	3	50	50	10
Brothers	9	4	2	3	61	64	10
Magani	9	4	1	4	64	47	9
Panthers	9	4	1	4	70	70	9
Tarangau	9	4		5	66	90	8
Morobe Tigers	9	2	1	6	48	72	5
Defence	9		1	8	16	102	1

LAE RUGBY LEAGUE CLUB CHAMPIONSHIP AST AT 8/6/97 - AFTER ROUND 9

Club	A Grade	B Grade	U19	U17	Total Points
Spiders	40	48	22	16	126
Tarangau	48	42	20	8	118
Brothers	32	48	24	10	114
Royals	36	24	24	10	94
Magani	24	18	24	9	75
Morobe Tigers	40	12	8	5	65
Panthers	28	18	8	9	63
Defence	32	6	10	1	49



• Tripela pilaia bilong Goroka Lahanis bagaram-pim tru wanpela pilaia bilong Cowboys tasol ol i bin lus. Foto: hary Kombega.



I nogat ragbi lig long Tari dispela yia - bikos long ileksen 97

WATSON GABANA i raitim

TIM HUSAT i bin winim Mendi Muruks las yia long kisim plat na K1000 kes moni long Kembris kap salens i no ronim gut asosiesen long dispela yia bikos long wok bilong ileksen 97.

Tari ragbi lig long Sauten hailens i bin kik ov wantaim pri sisen long stat bilong dispela yia tasol i no bin go insait long propa sisen bikos, sampela man i bin kilim wanpela wok man bilong gavman long Tari stesin na wok bilong ileksen i paulim planti ragbi pilaia na sapota.

Presiden bilong Tari ragbi lig, Fabian Kawage i bin tokim Ragbi Lig Nius (RLN) olsem, les bilong ol wanwan klap ofisels na ragbi pilaia long Tari i mekim na em

saspenim ragbi long dispela sisen. Em tok olsem, long stat bilong dispela yia, ol i bin holim pri sisen gem bilong ol gut i kam tasol, taim sampela man i bin kilim wanpela wokman bilong gavman long Tari, ol i bin stop na stop olgeta.

Tasol Fabian i tok, ol baim pinis K1250 bilong ol i go insait long PNGRFL. Dispela moni, em tok bai i stap inap neks yia bai ol ken yusim. Fabian tok tu olsem long las yia (96), tim bilong Tari brukim histri long winim Mendi Muruks long fainel bilong Kembris kap plet pilai ov. Long dispela taim, Mendi Muruks i bin luksave long wanpela pilai bilong ol; Kambaiza Tagima na selektim em i go insait long Muruks tim. Na tu bihain, long dispela win, ol i bin kisim K1000 wantaim plet. "Mipela i bin mekim gut tru long las yia. Na mi

bin ting olsem, bai mipela mekim wankain dispela yia tasol, ileksen mekim na olgeta ragbi pilaia i lusim klap na kempein raun i stap," Fabian i bin tok. "Tasol neks yia bai mipela kam bek gen. Mipela bai pinis fi bilong mipela i go long PNGRFL. Olsem na mipela bai yusim dispela yia neks yia," em tok.

Tari em wanpela klap PNGRFL i bin saspenim long i no baim olgeta fi bilong ol. Ol fi olsem pilaia rejistresen, fi bilong kosa na refiri. Long saspensen bilong Tari lig, Fabian i bin tok olsem, dispela em gutpela skul long mipela olgeta ragbi lig senta long PNG. Em tok, kain pasin olsem i ken skurim ol klap na pilaia long wan wan senta long baim olgeta fi bilong ol hariap i go long asosiesen bilong ol, bai ol asosiesen presiden i ken givim

nem na moni i go hariap long PNGRFL. Presiden bilong Tabubil ragbi lig, Yapsie Tvengkofa i bin mekim wankain tok tok tu. Em i bin tok olsem, planti taim, ol liklik senta i no save baim olgeta fi bilong ol gut i go long PNGRFL. Em tok long kain rot bilong klap na pilaia saspensen, i ken kirapim bel bilong ol man husat i gat ting ting long pilai ragbi long pinisim ol fi bilong em hariap.

Yapsie i bin tok olsem, asosiesen bilong em, Tabubil em wanpela bilong ol asosiesen, PNGRFL i bin saspenim. Tasol dispela i no stapim ol tim long pilai. Em tok olsem, long wanpela miting long Tunde dispela wik, ol ofisel bilong Tabubil lig na wan wan klap i bin pasim tok olsem, ol bai pinisim olgeta fi bilong ol long Fraide dispela wik.

Sapos wanpela pilaia i no baim ol fi bilong em bihain long Fraide, dispela man i no inap pilai. Na tu sapos ol klap nogat inap rejistet pilaia, Tabubil lig bai saspenim ol.

"Sampela klap na asosiesen i wok long lusim PNGRFL na laik joinim Nesinel ragbi lig (NRL), tasol mi no ting dispela bai helpim long developim ragbi long PNG," Yapsie i tok. "Kain rot PNGRFL i yusim long sasim ol tim, klap na pilaia husat i no mitim wanem samtig PNGRFL i askim long en i gutpela tru. Dispela em skul bilong yumi olgeta," em tok.

Tasol Yapsie i ting ting strong yet olsem Tabubil bai i gat tim yet long nesinel 9's tonamen na tu long Kembris kap salens, sapos olgeta klap long hap i pinisim ol pilaia rejistresen fi bilong ol long Fraide.



CAMBRIDGE



Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.